


SIYA MAY KAHANGAWA.

MAY KAHANGAWA KA BA?

 Salamat, Igsoon. Magpabilin lang kita sa pagtindog sa makadiyut karon alang sa pag-ampo. Karon uban sa pagduko sa atong mga ulo, aduna ba mo'y gipadangat nga hangyo, o hangyo nga ginapahayag pinaagi sa pagpataas sa inyong kamot, kung mahimo ipataas lang ang inyong kamot, mismo, idangop lang ang inyong mga hangyo karon.

² Langitnon namong Amahan, nagaduol na usab kami diha Kanimo, alang sa niining mga hangyo nga . . . ilang gipataas ang ilang mga kamot. Ug nanginahanglan gyud sila niining buntaga, Ginoo, sa daghan nga mga butang. Ikaw ang nakahibalo sa kung unsa ang ilang ginahunahuna sulod sa ilang kasingkasing, tungod kay Ikaw mao ang Pulong, ug ang Pulong mao ang Magtutugkad sa mga hunahuna ug sa mga katuyoan sa kasingkasing. Nagaampo ako Kanimo, Dios nga Puno sa Grasya, nga magatubag Ikaw sa matag usa kanila sumala sa ilang mga panginahanglan, nga nahibalo niini, nga magahimo Ikaw niini sumala sa ilang pagtoo. Hatagi dayon kami og pagtoo sa diha nga among pagahisgotan ang Imong Pulong, Ginoo, hinaut nga magahatud Kini og pagtoo ngadto kanila. Tabangi ako sa paghisgot sa Imong Pulong, kay ang Imong Pulong Kamatuoran, nga magahatud Kini og pagtoo aron sa pagtubag sa niining mga hangyo. Ug dayon aduna tingali pipila nga ania dinhi, Ginoo, nga nahisalaag gikan nianang masigpit nga dalan, nga wala nagalakaw diha sa dalan nga Kamatuoran. Nagaampo kami, Amahan, nga may pagabuhaton Ka karong adlaw, ug maipasayod kini, aron mamalik sila sa gilayon sa nianang dalan sa pagpakig-fellowship uban kang Cristo. Ang mga adlaw nagakahaduol na sa katapusan, ang kadautan anaa na sa bisan asa, aduna na gayu'y dakung mga pagtipas. Ug nagaampo kami, Amahan, nga Imong ipadayag kanamo ang Imong Kaugalingon karon, pinaagi sa pagpang-ayo sa mga masakiton sa among taliwala, pagpamuhat og mga milagro. Dili tungod nga kinahanglan Mo gayud nga buhaton kini, Ginoo, aron mahibaloan namo nga Dios Ikaw, kondili tungod kay gisaad Mo man kini nga buhaton. Ug nasayod kami nga Imong itugot kanamo ang Imong mga saad kon magtoo lamang kami niini ug nasayod kami nga matuod kini. Ginapangamuyo namo kini nga mga paghangyo sa Ngalan Ni Jesus Cristo. Amen. (Makapanglingkod na.)

³ Kadiyut lang ako nga mibasa og pipila sa niining mga hangyo nga nakapahimutang dinhi, adunay duha o tulo, ang usa

niini usa ka paghangyo aron nga maiampo. Siyempre, adunay daghang mga panyo nga nakapahimutang dinhi nga malipayon kita nga—nga mag-ampo alang sa mga niini pagkataudtaod, pagmabati nato nga ang Presensiya sa Balaang Espiritu anaa—anaa na sa Iyang kinakusgan Niini. Dinha nga higayon ako mag-ampo alang sa mga niini, sa diha nga ang tibuok kongregasyon, ang tanan dinihogan na sa Iyahang Presensiya.

⁴ Pasayloa gyud kami sa—sa pagpalisod kaninyo, adunay daghan kaayong nagatindog, ug wala na’y lugar nga kalingkuran nila. Ug—ug kini ang adlaw nga ang mainit nga panahon diha gayud sa hilabihan niyang kainit, ania kita sa mga sinto porsyento nga kaigang ug mga usa ka gatus ang temperatura, busa mahagkot gyud kaayo ug mainit.

⁵ Ug ginapahinungod ko kining buntaga alang sa panerbisyo sa pagpang-ayo, o dili . . . Ang hinungdan nga gihimo ko kana nga mao’y panerbisyo alang sa “pagpang-ayo”, tungod nga ginatoohan ko kung unsay Iyang gisaad. Kita n’yo? Karon, dili ako makasulti nga buhaton Niya kini, apan nagatoo ako human madungog ang Iyahang Pulong ug ginabasi ang atong pagtoo diha sa kung unsa ang Iyang gisaad, nan aduna kita’y katungod nga maangkon ang Iyang mga saad sa pagpang-ayo, sama lang sa pag-angkon nato sa Iyang saad nga kaluwasan.

⁶ Kining duha ka mga hangyo. Wala ko kabalo kon gipaandar na ba nila ang mga rekorder para niini, o wala pa. Maayo unta. Bueno, siguro okey ra nga ang mga taga-gawas, ang publiko nga makadungog niini, usa ra man kini ka hangyo.

Nagpropesiya ka ba nga adunay usa ka—usa ka milyon nga mga negro ang mamatay diha sa . . . o imo lang ba gipahibalo nga aduna—aduna og ingon niini nga panghitabo?

⁷ Karon, kita n’yo, dugay ko na kamong ginahangyo nga magmaampingon sa kung unsa ang inyong ginapaminawan. Kita n’yo? Adunay daghan kaayo niini nga iya lang sa tawo. Apan sa kanunay kung aduna gyu’y butang nga igapahayag, kini ang igasulti niini, “Kini ang MAO KINI ANG GINAINGON SA GINOO,” bisan pa sa mga panan-awon o unsa man. Ang mga panan-awon diha sa entablado, diha sa mga mananambong, ikaw ang nagabuhat niana mismo; dili ang Dios, ikaw kini. Kita n’yo? Dili ang Dios ang nagapahatud niana nga panan-awon, ikaw ang nagapahatud niana mismo, pinaagi sa imong pagtoo diha sa usa ka Balaanong gasa.

⁸ Sama sa babaye nga mihikap sa Iyang bisti, wala Siya makaila kon kinsa ang maong babaye o kung unsa gayud ang sakit niini, kondili gibuhad kadto sa maong babaye mismo. Kita n’yo? Karon, dili pa kadto mao ang MAO KINI ANG GINAINGON SA GINOO. Kadto’y mao na ang MAO KINI ANG GINAINGON SA GINOO sa dihang misulti na’g balik si Jesus ug gisultihan ang maong babaye nga ang iyang pagtoo ang

nagluwas kaniya. Apan, kita n'yo, kinahanglan nga magbantay gyud kamo.

⁹ Dili, naghisgot lamang ako kaniadto bahin kang Martin Luther King, mahitungod niining dakung hitabong-dautan nga aduna sila didto sa Habagatan, may kahilambigitan sa—sa itum nga mga tawo. Ingon ko, “Kung ulipon kadto nga mga tawo, dalhon ko ang akong iglesia ug mangadto kami didto sa habagatan aron sa pagtabang kanila nga mga tawo pagawas gikan sa maong pagpangulipon.” Siguradong buhaton ko gyud, tungod kay tawo lang ang nagahimo og mga ulipon, dili ang Dios. Usa ra ang kaliwat natong tanan. Nagagikan kitang tanan sa usa ra ka punoan, ug gikan kang Adan kana. Ang Dios, pinaagi sa usa ra ka dugo, gibuhat ang tanang kanasuran. Ug kon kita, tabunon man ang atong mga kolor, o itum, o dalag, o pula, o bisan unsa pa man kini, kitang tanan binuhat sa Makagagahum sa Tanan, kita n'yo, ug walay unsa man nga mga kalainan diha kanato.

¹⁰ Ang pangutana didto mao ang “pagpahilain og eskwelahan.” Karon, didto ako niadtong unang kagubot, ug nadungog ko kadto, ug ako—nahibalo gyud ko kung unsay akong ginasulti. Ang mga itum nga tawo adunay maayo nga mga eskwelahan, usahay mas maayo pa gani kay sa ubang mga eskwelahan. Ug, pananglitan lang, didto sa Shreveport aduna sila og mas maayo nga mga eskwelahan kay sa eskwelahan sa mga puti. Apan ideya kadto sa usa ka tawo nga nagasugyot kanila nga sila mangadto ug isagol gyud ang ilang mga kaugalingon. Nga, sa hunahuna ko nga okey lang kana, apan sa diha nga ang mga tawo nagaprotesta niini, kadtong mga taga-habagatan nga mga tawo, kung ingon-ana unsa ma'y kalainan ang mahimo niana?

¹¹ Ug sa hunahuna ko nadasig lang si Martin Luther King sa mga Komunista, nga mao'y mohatud sa usa ka milyon ka mga tawo ngadto sa usa ka lit-ag sa kamatayon. Kita n'yo? Wala ako nagaingon nga ang Ginoo nagsulti kanako niana. Nagatoo “ako”, kita n'yo. Ug nagatoo ako nga unta dili kini angay buhaton. Sa hunahuna ko kinahanglan gayud nga magpaka-Cristohanon ang mga tawo ug ilhon ang usa'g usa ingon nga mga managsoon. Ug, apan siguro tungod lang kay. . .

¹² Niining Estados Unidos, niining pangagamhanan karon nagasulti kanako nga dili ako puede mopirma sa usa ka tseke nga—nga mamahimong. . .nga personal nang gihatag kanako. Kita n'yo? Usa kana ka pang-batakang-balaod nga mga katungod nga gihikaw gikan kanako, apan unsa ma'y akong buhaton niini? Ang magpadayon, kana lang. Kita n'yo? Ug kinahanglan pa kono nga moagi kini sa ubang sistema sa dili ko pa ingon nga usa ka lungsuranon sa Estados Unidos mahimong kobrahon ang tseke, kinahanglan gyud kono nga moagi sa niining iglesia, o dili ko mahimong kobrahon kini. Kita n'yo? Ug dili kana husto. Supak kana sa batakang-balaod.

Apan unsa—unsa ma’y akong mahimo niini? Wala gayud. Kining maniningil og buhis dinhi mao’y nagsulti kanako nga dili ko gyud kana mahimo, busa, bueno, mao na kana. Kung ingon-ana man, unsa pa man ang mahimo bahin niini. Busa pasagdan na lang kini.

¹³ Sa hunahuna ko mamahimong ingon niana usab kini, nga ang . . . nga ang mga itum ko nga mga igsoong lalaki ug babaye didto sa Habagatan dili unta angay’ng mag-alsa sa pakiggubat batok sa ilang mga igsoon ug mga butang nga sama niana tungod lang sa gamay’ng butang nga sama niana. Sus, unsa man diay nga kalainan ang mahimo kung moadto ka sa *kung asa man o unsa man* nga eskwelahan? Nakita ko ang usa ka maayo kaayo nga itum nga gining niadtong buntaga sa dihang sila . . . aduna sila kaniadto og pag-alsa didto sa Shreveport, ug aduna didto og usa ka itum nga tiguwang nga ministro nga sige ginasultihan ang mga sundalo, miingon siya, “Tugoti kong makigsulti kanila.” Ug busa usa siya ka diosnong tiguwang nga tawo, ug mitindog siya didto ug miingon siya, “Wala ko pa gyud sukad gikaulaw ang akong pagkaitum.” Miingon siya, “Ang akong magbubuhat mao ang nagbuhat kanako sa kung unsa man ako, ug wala ko pa gayud kini gikaulaw, apan, hangtud niining buntaga.” Apan miingon, “Pagmakita ko kamo, akong mga kabanay, nga nanagpanukol nga sama niini,” miingon, “nan naulaw ako ingon nga usa ka itum nga tawo.” Didto na ang nagrespondi nga mga sundalo, nga gisinggitan siya nga maghilum.

¹⁴ Busa mitindog ang usa ka maayo kaayo, edukado, maayo’g-manamit nga itum nga gining, nga may intelihensiya, sus, labing hawud. Miingon siya, “Unang butang, dili ko gusto nga tudloan ang akong mga anak sa usa ka puti nga babaye.”

Miingon, “Ngano man?”

¹⁵ Miingon, “Tungod kay wala man siya’y kaikag diha sa akong mga anak nga ang akong . . . kaysa sa usa ka itum nga magtutudlo.” Ug miingon, “Tan-awa ang atong mga eskwelahan dinhi. Unsa ba gyu’y inyong ginareklamo?” Miingon pa, “Aduna kita’y mga swimming pool ug tanan na diha sa atong mga eskwelahan, ug wala sila’y ingon-ani didto.” Miingon, “Karon, unsa ba gyu’y inyong mga ginareklamo?” Ug gisinggitan nila siya nga maghilum, kita n’yo.

¹⁶ Nasugyotan kini sa usa ka sayup nga butang, nakita n’yo, kita n’yo, sila, sila nga mga tawo. Ug mao kana ang hinungdan nga akong ginasulti kana, dili nga aduna og unsa man—unsa man nga propesiya mahitungod niana. Wala ako’y bisan unsa man nga gikan sa Ginoo mahitungod niini. Ug siguroha gyud ninyo karon, kung nagasulti ako og unsa man gikan sa Ginoo nga sama niana, isulti ko kaninyo, kanunay kini . . . Nagasulti ako karon. Apan sa diha nga nagasulti Siya, moingon ako “Dili niini ako, kini’y ang MAO KINI ANG GINAINGON

SA GINOO.” Ug dili ko mahimong isulti kana hangtud nga sultihan Niya ako. Mahimong masayup gayud ako diha sa akong panghunahuna bahin kang Martin Luther King. Wala ko kabalo, dili ako makaingon. Opinyon ko lang kana. Ang unsa man nga nagapahinungdan og kagubot, mao kana kon unsa ang mahitabo sa ulahing mga adlaw. Ug dinihogan kini tanan ni Satanas, aron sa pagbungkag sa atong nasud ug sa bisan unsa man nga aduna kita, ang unsa man nga nagaalsa nga sama niana. Busa dapig ako sa niadtong mga tawo, ayaw gyud ninyo hunahunaa nga ako dili dapig. Ako—dapig gayud ako para sa kagawasan ug para sa tanan na, apan dili kontrolado sa mga tawo ang maong sitwasyon karon. Apan unsa man ang mahimong mahitabo niini, nagatoo ako nga magapasugod kini og usa na usab ka rebolusyon kung walay magpahunong niini. Kita n’yo, ang mga Komunista ang nagamaniobra sa niining mga tawo.

¹⁷ Didto ako sa Africa kaniadto sa dihang gibuhathang nila ang mao ra nga butang. Kita n’yo? Ug nahibalo ako nga adunay mga Komunistang misulod didto nga nagasugyot niadtong itum nga mga tawo, “Oh, ikaw ingon *niini*, *niana*, o *uban pa*.” Ug mahibaloan mo na lang, nahimo kadtong hinungdan nga mapatay ang linibo kanila. Ug asa na man sila napaingon? Sa wala, kita n’yo, sa wala.

¹⁸ Ug ako—gimahal ko ang tawhanong kinabuhi. Alagaron nato ang Ginoo. Atua sa Itaas ang atong Gingharian; wala sa niining mga butanga dinhi. Samtang nga makakaon pa kita, makainom, ug nga magkaaduna pa, unsa pa man ang imong gusto? Kita n’yo? Busa kabalo ko kung unsa gyu’y paingnan niini. Ako—nahibalo ako nga maghatud lang kini og kagubot.

Karon, ania pa ang usa ka pangutana.

Si Juan Bautista, sa diha nga nagkita sila ni Jesus, kita n’yo, nganong miingon man Siya, “Kay angay kanato ang pagbuhathang niini aron sa pagtuman sa tibuok pagkamatarung”? Unsa ba’y ipasabot niini?

¹⁹ Bueno, madumduman ko si Dr. Roy Davis, ang usa—usa—usa ko ka personal nga higala, nga nagbautismo kanako sa bugtong higayon nga sukad ako gibautismohan. Ug miingon siya nga ang pagsabot kono niadtong ni Juan, madumduman ko kini sa ilang eskwelahan, miingon siya, “nahibalo si Juan nga wala pa gayud siya nabautismohan sukad, siya mismo, busa siya . . . si Jesus. Si Juan naghango kang Jesus nga bautismohan siya.” Bueno, niana, ako—ako dili uyon sa—sa ilado nga doktor dinha.

²⁰ Dili para sa pagpakiglalis, kondili alang sa Kamatuoran mahimong isulti ko kini. Dili, aduna kaniadto ang duha ka tawo, ang duha ka mga lider sa maong panahon, ang Mesias ug ang Iyang propeta nagtagbo didto sa tubig. Karon timan-i, nagabautismo si Juan kaniadto dili para sa kapasayloan sa mga sala, kondili ngadto sa paghinulsol. Dili para sa kapasayloan

sa mga sala, tungod kay wala pa nahimo ang halad, kita n'yo, wala pa'y Halad. Ug ang Halad miduol ngadto kaniya diha sa tubig. Karon himatikdi. Nagalantaw didto si Juan ug sa pagkakita kang Jesus, miingon siya, "Ako ang may kinahanglan nga Imong pagabautismohan. Ug ngano man nga Ikaw na hinoon ang mianhi kanako?"

²¹ Si Jesus miingon, "Itugot lang kini," nga mao'y nahitabo didto. "Itugot lang kini, kay angay kanato ang pagbuhat niini, o ang pagbuhat nato niini, aron sa pagtuman sa tibuok pagkamatarung." Dayon si Juan, ingon nga usa ka propeta nga kang kinsa miabot ang Pulong sa Dios, nagaabot lamang ngadto sa propeta. Si Juan, ingon nga usa ka propeta, nakasabot nga mao kadto ang Halad. Ug sumala sa Kasugoan, nga ang halad kinahanglan mahugasan sa dili pa maipresentar, ug mao kadto ang hinungdan nga iyang gibautismohan Siya. Kita n'yo? Miingon Siya, "Angay kanato ang pagbuhat niini aron sa pagtuman sa tibuok pagkamatarung." Ang Halad, nga mao Siya, kinahanglan mahugasan diha sa dolang sa dili pa maipresentar alang sa paghalad. Ug si Jesus mao kaniadto ang Halad; ug nahibalo si Juan niini, ug nahibalo siya nga si Jesus kinahanglan nga mahugasan sa dili pa maipresentar. Ug dihadhiha dayon pagkahuman, gipresentar na Siya ngadto sa publiko alang sa pagbista ug mao kadto ang Halad kaniadto para sa tanan nga tawhanong kinabuhi. Ang Ginoo magapanalangin kaninyo.

²² Karon magkaaduna kita og usa ka hamubo nga Mensahe, ug nagasalig ako nga ang Ginoo magahatag sa Iyang mga panalangin kanato. Karon, tingali, kung makabalik ako... pabiyahе ako sa sunod nga semana aron dal-on ang mga bata sa usa ka hamubong bakasyon didto sa mga kabungtoran. Ug dayon kung ako—kung makabalik dayon ako, gusto natong maghisgot pagkasunod nga Dominggo sa buntag, kung ikatugot kini sa Dios ug sa pastor dinhi. Ipahibalo namo kaninyo niining mga semanaha, kaninyo nga dili taga-dinhi, pinaagi og sulat. Gusto ko nga hisgotan ang usa ka hisgotanan sa eksakto gayud kon nganong nagatoo kita sa mga butang nga atong ginatoohan bahin kang Cristo, nganong kinahanglan man sa ingon niini nga paagi, ug dili gayud mahimo sa uban nga paagi. Kita n'yo? Ug pamatud-an kini pinaagi sa mga Kasulatan. Karon, kon itugot sa Ginoo. Kon dili ako makabalik, paninguhaon kong makita kamo sa niining tingtugnaw o sa sunod nga ting-init, usa sa niana, pagnakabalik na kami, kung magdugay pa ang Ginoo. Manguli kami karon didto sa Arizona, aron nga makuha namo ang mga bata sa eskwelahan.

²³ Karon, niining buntaga, sa dili pa ang pagpang-ampo alang sa mga masakiton, magabasa kita sa pipila ka mga Pulong sa Dios. Nga, nasayod kita nga kung wala ang Pulong, imposibli kini, wala gayuy kahimoan. Ug ang Pulong lamang ang maong makahatag niining mga panalangin nga atong ginapangamuyo

alang sa mga masakiton ug sa mga nanginahanglan. Ug gusto kong mobasa og pipila karon gikan sa Unang Pedro, ang ikalima nga kapitulo, sugod diha sa unang bersekulo. Ug dayon gikan sa Basahon sa Mga Hebreohanon, buot kong basahon ang Mga Hebreohanon 2:2-4.

Busa nagatambag ako sa mga anciano diha kaninyo, nga ako anciano man kauban nila, ug saksi sa mga pag-antus ni Cristo, ug umalambit usab ako sa himaya nga igapadayag:

Pasibsibon ninyo ang panon sa Dios nga anaa sa taliwala ninyo, nga magabantay kamo kanila, dili sa pagpugos, kondili sa kinabubut-on ninyo gayud; dili alang sa makauulawng pagpanapi, kondili inubanan sa kadasig;

Dili sa hinarihari nga pagdumala kanila nga gipiyal kaninyo, kondili ingon nga mga panig-ingnan nga pagaawat sa panon.

Ug inigpadayag kaninyo sa pangulong Magbalantay, pagadawat ninyo ang dili madunoton nga purong-purong sa himaya.

Ingon man usab, kamo nga mga batan-on, managpasakup kamo nga masinugtanon sa mga anciano. Oo, kamong tanan mag-inalagaray ang usa ug usa, ug dili nga binaksan lang. . . ug magbakus kamo sa pagpaubos: kay amo Dios nagabatok sa mga palabilabihon, apan nagahatag sa gracia sa mga mapaubsanon.

Busa magmapaubsanon kamo sa inyong kaugalingon. . . ilalum sa gamhanan nga kamot sa Dios, aron kamo ikatuboy niya sa igo gayud nga panahon:

Itugyan ngadto kaniya ang inyong tanang kabalaka; kay siya may kahangawa man alang kaninyo.

²⁴ Ug diha sa Mga Hebreohanon, ang ika-2 nga kapitulo, basahon nato kini nga mga Pulong. Karon nagakuha ako alang sa paghatag og usa ka teksto, “itugyan ang inyong kabalaka.” Ako. . . Ang akong teksto mao ang: *Siya May Kahangawa. May Kahangawa Ka Ba?* Gusto kong basahon kini nga bahin karon, samtang nga nagapakli kamo ngadto sa Mga Hebreohanon 2, nga aron mahibaloan ninyo ang—ang tinuod nga kahulogan niini nga mga Pulong, sa kung unsa sila, kung unsay gipakahulogan niini nga teksto.

Busa kinahanglan nga hatagan ta sa labing mainitong pagtagad ang mga butang nga hingdunggan, tingali unya nga ipang-anod kita gikan niini.

Kay kong ang pulong nga gisulti pinaagi sa mga manolonda nagapaila nga—nga malig-on, ug ang tanan nga paglapas ug pagsuki nakadawat sa matarung bayad sa balus;

Unsaon ta sa paglikay, kung talikdan ta ang ingon nga pagkadaku nga kaluwasan; nga sa sinugdan gisulti pinaagi sa Ginoo, ug gipamatud-an kanato pinaagi kanila nga mga nagpakadungog kaniya;

Ang Dios usab...gipamatud-an, pinaagi...sa mga ilhanan ug sa mga katingalahan usab, ug...sa mga nagkalainlain nga mga gahum, ug sa mga hiyas sa Espiritu Santo, sumala sa iyang kaugalingong kabubut-on?

25 Gusto kong gamiton ang hilisgutan dinhi, nga, “Siya may kahangawa” Ug, “Ikaw may kahangawa ba?” Sa ania pa Siya sa yuta, nagkahangawa Siya sa mga tawo. Ang panghunahuna bahin niini miabot sa akong hunahuna sa dili pa ang pagpakigsulti o pagpang-ampo para sa mga masakiton, ingon nga wala nahibalo kung unsa man nga matang nga—nga linya sa pagpaampo nga magkaaduna kita.

26 Ako, ako...una, ug aron sa pagsugod niini, kinahanglan gayud nga madihogan og pagtoo ang mga mananambong. Kamo—kamo, kung wala kamo og pagtoo, nan adunay—wala na kinahanglana bisan pa ang pagduol aron sa pagpaampo, tungod kay magkauban nga gikinahanglan ang inyong pagtoo ug ang akong pagtoo; ang akong pagtoo aron sa pagsalig Kaniya, ang inyong pagtoo aron sa pagsalig Kaniya. Busa dili kini nato hikalimtan samtang magapadayon ako karon. Kinahanglan nato nga magkaaduna gayud og usa ka butang sa walay duhaduha, uban sa kapanghimatuuran, ang buot kong ipasabot, butang nga mahimo natong ibasi ang atong pagtoo sa kung unsa ang atong ginapaninguhaan nga buhaton. Tungod kay kung ang usa ka tawo magabuhay og bisan unsang butang nga gusto niyang buhaton, nga walay igong pagtoo, paingon lang siya sa pagkapakyas. Apan kon iya kining buhaton inubanan og igong pagtoo, nan mamahimong molampus gayud siya kung uyon kini sa kabubut-on ug katuyoan sa Dios nga buhaton kini.

27 Karon, nagahunahuna ako Kaniya nga nagakahangawa. Kagabii, sa dili matino nga hinungdan, sa pagkatalagsaon, gipangunahan ako sa Balaang Espiritu. Sa dihang nagahulat ako sa pipila ka mga kaigsoonan nga moabot aron tabangan si Igsoong Wood aron isumpay ang—ang bagon nga gibuhay niya sa luyo sa iyang sakyanan. Wala ko masayod kung nganong ginapaninguhaan kong makita ang akong buutang higala, si Igsoong Evans, ug miadto ako, nagbiyahe didto sa dalan. Nga, ang akong asawa ug pamilya nga nagalingkod sa luyo dinha nahibalo nga tinuod gyud kini. Ug sa dili matino nga hinungdan,

sa pagkatalagsaon, mibalik ako ug miadto balik ngadto sa usa ka lugar, didto sa motel.

²⁸ Ug, oh, daw sa unsa nga kalipay sa akong kasingkasing nga makita ang daghan kaayong mga higala ko nga nagkatigum didto sa mga duha ka minutos ang gidugayon, hangtud nga nagpahuut na kadto sa dalan, dili na gayud makaagi ang mga sakyanan, tinuod gyud nga mga higala, nagmaneho og gatusan ka milya, gikan sa Georgia ug Tennessee ug Alabama, ug ang tanan na, aron lamang—aron makapaminaw diha sa usa ka panerbisyo. Dayon kadto nga panghunahuna miabot sa akong hunahuna, “Nan unsa may akong isulti nianang mga tawo, nahibalo nga sa Adlaw sa Paghukom manubag gayud ako sa kung unsa ang akong gisulti kanila?” Ug usab ako usa ka—usa ako ka tighigugma niining madagayaon nga kinabuhi nga magaabot, ug ako—gusto kong maanaa didto.

²⁹ Ug dayon pagkatalagsaon nga miadto ako sa usa ka lugar kon diin gihimo ko ang usa ka talagsaon nga pagliko. Imbes nga mibalik ako didto, miadto hinoon ako sa unahan aron sa pagliko. Nadan-agan sa akong mga suga ang hiligugmaon nga mga magtiayon didto sa gawas, duha ka buutan nga mga batan-ong gining nga bag-ohay ko lang gikasal ngadto sa duha ka buutan nga mga batan-ong ministro. Ug si Satanas, human niyang makita ang—ang ministro, ang usa kanila nga ang iyang ministerio nagsugod na ug mikuha siya og usa—usa ka kauban sa kinabuhi dinhi mismo, niining halaran. Nanglakaw sila nga malipayon paingon sa ilahang honeymoon, ug—ug miatake ang kaaway sa niining batan-ong lalaki. Ug ginasulti ko kini aron ipahayag kung unsay akong ginahisgotan “Nagakahingawa ba Siya?” Sa unsa mang paagi, uban sa pagtoo nga dili gayud modawat og “dili,” namalik sila ug namauli balik dinhi, nahibalo nga human sa ilang pagbiyahe og halayo kaayo (didto pa sa sidlakan) didto kung asa man ang ilahang honeymoon, mibalik ug nanglingkod, nga nagahulat. Ug misulod ako, usa ka maayong ambungan nga batan-ong lalaki; ang iyang asawa nagalingkod didto sa gawas, nagahilak, siya ug ang ilang gamay’ng kauban. Ug usa ka laing lalaki ug usa pa ka igsoon ang miabot, nagadagan, nga higala sa niining batan-ong lalaki, nagasulti, “Oh, Igsoong Branham, *ingon-ani* ug *ingon-ana* ang nahitabo.”

³⁰ Miadto ko didto ug nakita kining gwapo nga batan-ong lalaki nga nagalingkod didto, nga anaa pa sa kabaskugon sa iyang kinabuhi, usa ka lider sa mga batan-ong kalalakenan, nagalingkod didto, ug nagapos siya ni Satanas. Wala siya nakamatikod, gigunitan ko siya sa akong kamot (nga wala) aron lamanohon ang iyang kamot (nga tuo), aron tan-awon kon may sakit nga mihampak kaniya. Apan walay sinyales aron magkurogkurog ang akong kamot. Bag-o lang ko migawas niadto sa akong kuwarto gikan sa mga pag-ampo ug mga pagpuasa, ug sa paghulat sa Ginoo, anaa gyud niadto ang

pagdihog sa Balaang Espiritu, ug mao nga gipangunahan kami Niini, kita n'yo. Ug dayon nakita ko kadtong landong sa kangitngit diha ibabaw niya. Wala gyud ko niadto misulti kon unsay akong ginabuhat. Apan sulod sa diyutay'ng pipila lang ka gutlo nahanaw kadto tanan, nawala ang kabugnaw sa iyang mga kamot, nagasinggit ug nagadayeg na siya sa Dios, human sa pipila ka minutos nga naulian siya. Ug ania sila naglingkod mismo dinhi niining buntaga, nagalingkod dinha uban sa mga mananambong. Makita ko kon giunsa ni Satanas sa pagpaningkamot aron samukon kanang batan-ong lalaki, nga nagpahinumdom kaniya sa pipila nga mga kagubot, nga nahibaloan na sa Balaang Espiritu, ug nakita ko na kini pinaagi sa usa ka panan-awon gikan sa Ginoo. Apan nagkahingawa gayud ang Dios alang nianang lalaki. Nagkahingawa ang Dios alang nianang batan-ong lalaki.

³¹ Adunay bag-o pa lang misulod sa pipila pa lang ka gutlo ang milabay, usa—usa ka gining, nakita ko siya nga nagalingkod dinha dapit sa pasilyo, nga walay...medyo bag-o lang siya nakakuha og lingkuranan, ug nakalingkod na. Miingon siya, “Siyam ka tuig, Igsoong Branham, gipanguhaan ko nga maabtan ta gyud ka.” Ug miingon siya, “Nawad-an na gayud ako og paglaum! Miabot ko dinhi nga ulahi na, ug dili man lang gani makakuha og prayer card aron nga makaapil diha sa linya.”

³² Si Billy, siyempre, iya kining katungdanan aron masigurado nga dili gayud ako masamok, sa pagpasulod kanako ug pagpagawas. Ayaw'g kasuko kang Billy, gimandoan lamang siya niining mga trustee board aron sa pagbuhat niana. Ug kung dili niya kadto gibuhat, dili ako makaanha nianang linya sa pagpaampo, makaanhi dinhi. Hunahunaa ninyo kana. Kita n'yo, kinahanglan aduna gayu'y sistema sa bisan unsa man nga ginabuhat nato. Kita—kinahanglan nga magkaaduna kita niini, kita n'yo. Pero moingon siya, “Sige na, daddy, pagdali,” na niini.

³³ Misibog ang maong gining. Ug miingon siya, “Igsoong Branham, may isulti lang ako kanimo.” Sa diha nga nagatindog ako didto, usa ka panan-awon ang miabot mahitungod niining medyo maanyag nga batan-ong babaye, ug nasuta nga ang iyang kasingkasing may kabug-aton. Ug nagapaningkamot siyang motrabaho aron nga naay mapanginabuhian. Ug usa—usa ka dakung butang ang nahitabo kaniadto, kaniadtong panahon pa sa iyang mga ginikanan, nga nagpahinungdan niining grabeng butang nga nahitabo kaniya, ug gipadayag Kini ni Ginoong Jesus ug gipakita sa kung unsa kadto. Ug didto, sa kalit lang, gitangtang kadto gikan sa maong babaye. Milakaw siya didto nga nagakalipay. Ug karon nagalingkod dinhi uban sa mga mananambong nga kauban nato karon, nga nagakalipay, nagahilak, samtang nagapahid siya sa iyang mga mata karon, nasayod nga naipahayag na ang kamatuoran bahin sa maong butang. Ug kana, nga, kanang gamay'ng makaluluoy nga pagka-

nerbiyosang babaye, nga hilabihan ka nerbiyosa gayud wala na siya mahibalo sa kung unsay buhaton niya sa iyang kaugalingon, ug naghunahuna nga nawala na siya, ug walay Balaang Espiritu, ug nga mao na kadto ang iyang ulahing adlaw. Naningkamot siya sulod sa siyam ka tuig ug hapit na siya sa katapusan sa iyang pagkawalay paglaum, nagkahingawa ang Dios alang nianang gamay'ng babaye nga wala gayu'y nagkahingawa kaniya. Kita n'yo? Daw sa unsa kadto nga takna! Nagakahingawa Siya.

³⁴ Sa ania pa Siya sa yuta, sa gikaingon ko na, nagkahingawa gyud kaayo Siya alang sa mga tawo hangtud nga giayo Niya ang ilang sakit, gilipay ang ilang mga kasingkasing, nagsulti kanila mahitungod sa usa—usa ka dapit nga diin magaadto Siya ug iandam para kanila, ug nga mobalik pag-usab aron sa pagdawat kanila ngadto sa Iyang Kaugalingon. Nagkahingawa Siya alang kanila. Ug himatikdi, nagkahingawa gyud kaayo Siya hangtud nga, sa dihang nasayod Siya nga kinahanglan Niyang molakaw aron madala Niya kining dakung butang nganhi kanato, miingon Siya, “Dili Ko kamo pagabiyaan nga mga ilo, apan igapadala Ko ang Balaang Espiritu, ug igapadayon Niya ang Akong pagbantay para kaninyo,” hangtud nga magabalik Siya. Walay ni usa nga nagakahingawa nga sama kang Jesus. Nanghibalo nga ang Iyang lawas, ingon nga usa ka Labaw'ng Sacerdote, diha sa usa ka pagpatigpataliwalang buluhaton nga ginabuhat Niya karon, kana nga Lawas kinahanglan nga maanaa dinha sa Presensiya sa Dios sa tanang panahon, alang sa pagpangaliyupo, aron dili makita sa Dios ang kalapasan sa makasasala; ang makita lamang Niya mao ang Dugo sa Iyahang Kaugalingong Anak. Ug nanghibalo niana, gipadala Niya og balik ang Balaang Espiritu aron sa padayon nga paglipay sa Iyang katawhan. Nagakahingawa ba Siya? Sigurado gayud, Siya may kahangawa. Karon, kinahanglan Niyang mopadayon sa pagbantay sa Iyang mga tawo, sa Iyang katawhan dinhi sa yuta, diha sa mao rang paagi nga gibantayan Niya sila sa dinhi pa Siya. Tungod kay miingon Siya diha sa San Juan, ang ika-15 nga kapitulo, kung gusto ninyong . . . Aduna ko og mga sinulat nga nakapahimutang dinhi uban niining mga Kasulatan kon diin mopahinungod ako, sa San Juan 15:26 ug 27.

³⁵ Makita ko nga daghan kaninyo ang nagasulat sa mga Kasulatan. Busa mahimong mapahinungdan ko kini kung wala kamo mahibalo niini, sa daghang panahon, diha sa Kasulatan. Ginasulat ko ang Kasulatan, dayon mahibal-an ko kung unsa ang ginahisgotan ko gikan dinhi, tungod kay sa kanunay anaa man kini sa Pulong sa Ginoo. Kita n'yo?

³⁶ Miingon Siya, sa dihang moabot na ang Balaang Espiritu, Nga igapadala sa Amahan sa Iyang Ngalan, Siya magapamatuod Kaniya. Sa lain nga pagsulti, pagabuhaton gayud Niya ang mao rang butang nga Iyang gibuhat kaniadto. Ang Balaang Espiritu nagapamuhat pinaagi sa usa ka tabernakulo nga gibalaan na

Niya, magapamuhat sa mao rang butang nga Iyang gibuhat. Karon, unsa ma'y angay'ng mabuhat niana para kanato! Kung ingon-ana mahibaloan nato nga sa taliwala nato mismo karon aduna kanato ang mao rang maglilipay'ng Ginoong Jesus diha sa porma sa Espiritu Santo, usa na usab ka opisina nga pinaagi niini nagapamuhat ang Dios mismo.

³⁷ Usa Siya ka Kahupayan para sa Israel kaniadto sa dihang mahangad nila ug makita ang Haliging Kalayo, ug madungog ang propeta nga nagasulti sa mga Pulong nga matuud, ug nga ginapanghimatud-an Kini sa Dios. Mao kadto ang ilang Kahupayan.

³⁸ Usa Siya ka Kahupayan sa dinhi pa Siya sa yuta ingon nga usa ka tawo, ang Dios nga nahimong unod. Ang Dios nga nagarepresentar sa Iyang Kaugalingon ug nagapadayag sa Iyang Kaugalingon pinaagi sa usa—usa ka Tawo, si Cristo Jesus, Nga nagsaad nga “Ang mga buhat nga Akong ginabuhat pagabuhaton usab ninyo. Ug magaadto Ako ngadto sa Amahan, ug magapadala sa Balaang Espiritu, Nga mao Ako sa pormang Espiritu. Ug magauban Ako kaninyo, ug magapuyo diha sa sulod ninyo. Ug ang mao ra nga mga butang nga Akong gibuhat dinhi, pagabuhaton usab sa Balaang Espiritu diha sa Akong Ngalan, pagmoabot na Siya.” Kita n'yo? Mao nga nag-ingon Siya, “Ang pagsulti batok Niana” karon human nga ang pagtabon sa sala nahimo na, usa na kini ka dili mapasaylong sala, ang “pagpasipala sa Espiritu Santo.”

³⁹ Ug pagabuhaton Niya kini sa mao rang paagi, aron nga mahibaloan nato kon kini ba usa ka kahupayan gikan sa pipila ka yutan-on nga baruganan, mahibaloan nato kon kini ba usa ka kahupayan gikan sa kung kinsa man nga tigulang tawo nga mahimong moagbay kanato ug mogakang kanato og diyutay ug mopabati kanato og maayo, o—o kung unsa man nga pang-teologong termino sa usa ka denominasyon nga moingon “nahisakup ka na kanamo karon, ug anaa kanamo kini; ug ayaw na pagpasakup ngadto sa uban pa kanila, tungod kay wala sila.”

⁴⁰ Gihimo Niya kini nga direktang sigurado gayud, kita n'yo, “Diha sa Akong Ngalan Siya magasulti. Ang mga buhat nga Akong ginabuhat pagabuhaton usab ninyo, sa dihang anaa Siya nganha kaninyo.” Kita n'yo, magalipay Siya sa mao rang paagi, pinaagi sa pagpasaylo sa tanan natong mga kalapasan, pagpang-ayo sa tanan natong mga balatian, ug magasulti kanato sa kalipayan mahitungod sa usa ka Gingharian nga moabot. Kita n'yo, nagapanghimatuod sa Iyang Kaugalingon sa taliwala nato, ingon nga ang Dios nagpamatuod sa Iyang Kaugalingon sa taliwala nato pinaagi ni Jesus Cristo. Ug diha sa—sa Ikaduhang Timoteo . . . Unang Timoteo 3:16, nahisulat kini sa ingon niini, mahibalo mahitungod sa Dios, “Dili malalis nga maamgo nato nga daku ang tinago sa pagkadiosnon, kay ang Dios nadayag diha sa unod.” Nakita nato ang Dios diha sa unod. Kana ang

kahupayan nga iya sa Dios, nga mahibaloan nga miabot Siya (nagkahingawa gyud Siya para kanato) hangtud nga nahimo Siyang usa kanato. Ang Dios nga nadayag diha sa unod. Dili nga ubang tawo, kondili ang Dios Mismo!

⁴¹ Ug karon sa pagpahiduol pa niini, Iyang ginapadala ang Balaang Espiritu aron magbantay para sa atong mga kahupayan, ug nagapabilin Siya *sa sulod* kanato. Oh, Siya nagakahingawa gayud!

⁴² Karon magpadayon kita ngadto sa uban pa nga bahin sa Kasulatan dinhi, o usa pa ka ideya aron suportahan kini. Sa dili pa ko mopadayon, mahimong isulti ko kini: ang tanan wala magkaaduna og niining Maglilipay. Sila, wala sila’y, wala sila Niini. Balaang hinungdan nga wala sila Niini, tungod kay wala nila Kini gidawat. Para sa ila Kini, apan wala nila Kini gidawat. Karon, nagalaum ako nga igo na kamo ka ingon niana ka espirituhanon nga—nga masabtan kung unsay akong ginasulti. Kita n’yo? Nagapakigsulti ako ngadto sa usa ka grupo sa mga tawo nga gikinahanglan nga maiampo taudtaod. Ug aduna kita niining Kalipay diha sa Balaang Espiritu nga gipadala ingon nga Maglilipay, apan ang tanang tawo dili modawat Niana. Wala sila nagatoo Niini. Kita n’yo? Sila, aron nga mahimo kana, ilang ginakuha ang ilang kalipay gikan sa laing pipila ka mga kapanguhaan, sa laing mga pamaagi. Kung wala nila ginadawat ang gitagana sa Dios nga Maglilipay, nan kinahanglan nilang mokuha og uban pa nga maglilipay, kita n’yo, tungod kay dili ka mabuhi kon wala ka’y usa ka butang nga aron ikinabuhi.

⁴³ Ug nagalaum ako nga nasabtan kana sa matag usa kaninyo, ilabi na gayud kamong mga gikinahanglan nga maiampo, dili gyud kana kahamugaway niining buntaga, mahimong tungod sa mga sakit nga dili na mahilabtan sa mga doktor.

⁴⁴ Ug nagatoo kita nga ang mga doktor nagatabang sa mga tawo. Nagatoo ko nga nagaayo ang Dios pinaagi sa medisina. Nagaayo ang Dios pinaagi sa pag-opera. Nagaayo ang Dios pinaagi sa pagsabot. Nagaayo ang Dios pinaagi sa gugma. Sa diyutay nga gugma lamang daku na ang kahimoan. Tugoti nga mabalaka kaayo ang usa ka tawo, ug ipakita lang kanila nga nagakahingawa ka para kanila. Kita n’yo? Nagaayo ang Dios pinaagi sa gugma. Nagaayo ang Dios pinaagi sa pag-ampo. Nagaayo ang Dios pinaagi sa mga milagro. Nagaayo ang Dios pinaagi sa Iyang Pulong. Nagaayo gayud ang Dios! Asa man nga kapanguhaan kini gikan, nagaayo ang Dios pinaagi niini. Ang Dios kini nga mao ang nagaayo, kay Siya miingon man, “Ako mao ang Ginoo nga nagaayo sa tanan mong mga balatian.” Busa ang tanan-tanan niini kinahanglan magkauban nga magapamuhat, ug ang tawo sa nagkalainlaing mga ministerio kinahanglan maghiusa nga nagapamuhat para niana. Kita n’yo? Karon, apan wala nila kini ginabuhat, tungod kay usahay gidid-an sila sa pagbarug sa pipila ka

kinahanglan barugan diha sa Pulong sa Dios, kay ang ilang mga denominasyon wala man nagatugot kanila sa pagbuhat niana. Apan dili kana makapugong sa Kamatuoran, bisan pa man, nagapadayon sa gihapon ang Dios sa pagpang-ayo.

⁴⁵ Busa gasulay sila sa pagkuha og kahupayan gikan sa kung unsa man nga mga kapanguhaan. Hisgotan nato una ang mahitungod sa kalag.

⁴⁶ Nahibaloan nato nga daghang mga tawo ang nagasulay og pagpangitag kahupayan pinaagi sa paghubog-hubog. Kabalo na mo, aduna kita'y usa ka panultihon nga nabantog gayud sa atong taliwala karon, nga—nga usahay daghang mga ministro ang moinom og ilimnon'g makahubog sa dili pa sila moanha sa pulpito, moinom og—og—usa ka igong ilimnon nga makahubog. Nabantog na kini nga makakita ka og mga ministro ibabaw sa entablado, nga nanggibarag na gani tungod sa impluwensya sa ilimnong makahubog. Ug kana—dili unta angay kana. Dili gyud puede. Tungod kini nga daghan nang mga higayon nga atong ginakondena ang maong tawo sa diha nga dili unta nato gibuhat kana, angay unta nga ghibalo usa nato kung unsa ba gayud ang problema. Daghan kanila ang nangakabig gikan sa pagkahilig sa alcohol. Ug mahibaloan nato, nga kung anaa sila sa ingon-ana nga kahimtang, usa kini ka kaulawan ug usa sa ka kasalawayon. Apan wala na'y mas makauulaw pa niini kay sa pagpamakak, pagpangawat, o pagpangibog sa mga babaye, o unsa pang butang nga anaa sa kasugoan. Kita n'yo? Ug siguro ang usa ka tawo nga natawong mapangibugon kaayo, ug makita niya kining mga modernong paghubohubo diha sa kadalanan, ug siya—kanunay gayud siya magkaproblema. Kita n'yo? Siya, nga, ang maong tawo natawo nga sama niana. Karon, ang angay niyang buhaton, ang ministro nga nagainom og ilimnon nga makahubog, o ang—o ang babaye nga nagapanigarilyo o nga . . .

⁴⁷ Nagapamisti nga mahilas, nagasulay sa pag-angkon og kahupayan gikan sa ingon ka maayo kaayo nga pagkaporma, nga gusto niyang magkahinungdan ang lalaki nga motan-aw diha kaniya. Wala gyu'y laing rason. Siya may pagkabuangbuang. Kita n'yo? Walay but-an nga babaye ang kabalo maghubohubo sa iyang kaugalingon sa atubangan sa mga lalaki, kung anaa siya'y hustong panghunahuna. Kita n'yo? Wala gyu'y rason para buhaton niya kini. Ug siya, pero gusto niya gayud buhaton, kining mga batan-ong babaye nga nagalakaw diha sa kadalanan karon, tinuod silang . . . Bueno, pasayloa ko sa maong sinultihan. Ug hinumdumi, kining teyp dili lamang para sa niining mga tawo dinhi, kondili nagaabot kini sa tibuok kalibutan. Kita n'yo?

⁴⁸ Ug ang usa—usa ka babaye nga ginahubo ang iyang mga bisti gikan kaniya, kay kono naigangan siya. Maglakaw-lakaw ka didto sa kainit sa adlaw, nga hubo, ug dayon maglakaw nga nakabisti, ug hain man ang mas bugnaw? Ang mga Indian

didto sa Papagos ug Navajos; ang Papagos, ilabi na, ug ang sa reserbasyon, kadtong mga kababayen-an manggawas didto nga nagsul-ob og dagkung tinahing mga panapton palibot diha kanila, ug manglingkod didto sa kainit sa adlaw aron padayon nga mabugnawan. Ngano man? Panington man sila, ug ang hangin nga nagahuyop mao ang nagapabugnaw, nakita n'yo. Ug kini naman nga mga kababayen-an wala gyu'y uban pang rason kondili lang... Wala sila mahibalo niini, wala sila makahunahuna niini. Wala ako nagaingon nga wala sila mahibalo niini. Daghan kanila mga buotan nga babaye, ug wala ko ginasulti kini para magsinalbahis. Ginasulti ko kini sa—sa paninguha nga—nga—nga mapukaw sila. Kita n'yo?

⁴⁹ Si Satanas lamang kini, kita n'yo. Kung nahibaloan lang ninyo ang mga lalaki, mga ingon niini ang ginalantaw sa mga lalaki, nagahatag kini og dakung ipekto kanila hangtud mang-igiik ang ilang—ilang mga ligid sa sakyanan ug managhoy nga—nga—nga pangkiniat nga taghoy. Ug—ug—ug para sa unsa man nga ginabuhat nila kana? Ginabuhat kini sa mga babaye para makuha nila ang lalaki nga buhaton kana. Nganong mogawas man kamo, diha mismo sa kainiton sa adlaw, ug alas kuwatro sa hapon, aron sa paghabas sa mga sagbot sa diha nga mao man ang pagpanguli na sa mga tawo gikan sa ilang trabaho ug mga butang nga sama niana? Nagapakita kini nga kini espiritu sa pagkabuang. Ug nahibalo ko nga daghan kanila siguro adunay IQ nga minilyon ka milyas ang kalabaw niini kay sa akò, apan sulayan ko ang inyong IQ diha sa Pulong sa Dios ug hibaloon kon asa kini nagagikan. Kita n'yo? Kana mao'y pangmodernong IQ, apan ang labing kapanghimatuuran ug ang mga bunga sa kinabuhi mao ang magapamatuod. Busa ginasulayan nila nga makakaplag og kahupayan diha niana.

⁵⁰ Daghan kanila ang moingon, “Bueno, wala ko kana ginabuhat.” Pero ginabistihan n'yo ang inyong mga kaugalingon sa ingon ka makapadani hangtud maninguha na nga mamahimong mas moderno kay sa babayeng katapad niya sa paglingkod sa simbahan pagkasunod buntag, magsul-ob og mas nindot nga kalo o mas nindot pa gyud nga mga bisti, tungod kay mahimo mo man ang pagbuhat niini. Kita n'yo? Kita n'yo, nagalahus ang sala ngadto sa ingon niana ka lawum. Ug ginasulayan nila nga makakaplag og kahupayan pinaagi sa pagbuhat og mga ingon niana. Ug aduna silay... .

⁵¹ Nahimo na kining ingon niana hangtud hingpit nga giigo niini ang tibuok nasud, dili lang ang nasud, kondili ang tibuok kalibutan. Daghang mga butang ang mahimo kong isulti dinhi, pero, aron dili ta maglangan, ang panerbisyo sa pagpang-ayo igasunod na, ako—mahimo akong magsulti og daghan pa bahin niini, apan igo na. Sigurado ko nga masabtan na ninyo kung unsay buot kong ipasabot. Kini, giigo niini ang pulitikanhong kalibutan, ang pulitikanhong pagkinabuhi, ang pangkatilingban

nga pagkinabuhi, ang pamatasan nga pagkinabuhi sa nasud, ang tanan nang mga tawo sa tibuok kalibutan. Miabot na kini sa punto hangtud nga gusto na sa tawo nga mamahimong usa ka pulitiko aron lang magkaaduna og ngalan ingon nga usa ka pulitiko. Aduna ma'y daghan kaayong kuwarta, makakuha og mga boto ug mahimong mobayad og mga makinarya aron mahimo kini, ug—ug uban pa, aron lang nga matawag, ug nagkantidad og minilyon ug minilyon ka mga dolyares, kita n'yo, aron lang nga matawag og ingon nga usa ka halangdon nga pulitiko. Igo na ang nasulti bahin niana, kabalo na mo kung unsa ang ginahisgotan ko.

⁵² Ug ang pang-sosyal gayud nga pagkinabuhi! Ginapaninguhaan sa mga tawo nga makig-uban niining nabuang na nga pang-sosyal nga pagkinabuhi. Ayaw ko'g sultihing nga ang kalibutan dili buang, ug ang pamaagi nga ginabuhat niya kini. Mao gyud. Sigurado gayud. Usa kini ka buangbuang na nga kalibutan. Ug pinaagi sa grasya sa Dios nga mao lang ang bugtong paagi nga makaikyas kita niini. Himatikdi, dinhi niining pang-sosyal nga pagkinabuhi, ang mga tawo miabot na sa punto nga sila—naghimo na sa ilahang mga grupo-grupo, ug magpasakop sila dinha ug hunahunaon nga, “Mas maayo pa man kami kay sa sunod nga pundok.” Kita n'yo? Ug kini, nagakahimo kini sa ingon niana lang nga paagi. Ug ang mga pamatasan kini, giigo niini ang mga pamatasan sa mga tawo hangtud nga, sa tinuod lang, mga higala, dili na gani ako motoo nga (ang kalibutan) ang pulong “pamatasan” naila ba gayud sa nobenta porsyento sa mga tawo sa niining nasud. Wala gani sila nakahibalo kung unsay buot ipasabut sa (ang kalibutan) sa pulong “pamatasan.” Kini—mihawa na kini gikan kanila. Ug nabuhat kini sa malimbungon kaayo.

⁵³ Malinglahon kaayo si Satanas, kita n'yo, ug ginabuhat niya kini nga sayon kaayo, sa hilabihan ka—malinglahon kaayo, usa lang ka gamay'ng diyutay *dinhi* ug usa ka gamay *didto*, ug palihokon na kini. Aduna siya'y daghang panahon, busa mopalihok lamang siya og diyutay *dinhi* ug diyutay lamang *dinhi* ug, mahibaloan mo na lang, hinayhinay nang miirrog ang mga tawo paingon niini. Unsa kaha ang mahitabo sa usa ka babaye, niadtong panahon nga batan-on pa ako nga mga dise-sais pa ang panuigon, pagmolakaw siya diha sa dalan nga sama sa iyang ginabuhat karon sa niining pormang paghubohubo? Aba, mahimong gipabilanggo na nila siya. Bueno, kung sayup man kini kaniadto, sayup usab kini karon. Kita n'yo? Apan, nakita n'yo, gisugdan lang usà ni Satanas ang pagputol sa mga palda, ug nga mas pamub-an pa gyud kini, ug—ug mahitabo gayud nga aduna na'y mohimo og usa nga mas grabe pa kay sa mikini o bikini, o kung unsay tawag ninyo niining butanga, paingon na ngadto sa dahon na lang sa higuera. Timan-i gyud ninyo! Husto kana, mobalik kini mismo sa kung unsa kini kaniadto. Ug kini,

sa tinuod anaa na gyud kini karon.

⁵⁴ Ug atong mahibaloan karon, nga kining tanan mao'y tungod nga ang mga tawo gapaningkamot nga makakaplag og kahupayan. Nagapaninguha sila nga makakaplag og usa ka butang nga ilang. . . Ug hinumdumi, ang inyong kahupayan mao ang inyong relihiyon, ug ginahimo ninyo kanang mga butanga nga inyong relihiyon. Kita n'yo? Daw sa unsa ka makaluluoy gayud hunahunaon nga ang kamatayon anaa na mismo diha sa inyong atubangan. Kita n'yo? Hangtud nga, nangahitabo na lang kini tanan nga daw sama kini nga wala na'y usa—usa ka nahabilin nga malig-ong pundasyon sa nasud aron nga pagatukoran og bisan unsang butang.

⁵⁵ Tugoti lang ko sa paghangyo kaninyo og usa ka butang. Wala'y bisan unsa man nga mahimo ninyong toohan, halos, gawas lamang sa Biblia. Aduna sa gihapon kanato si Cristo; salamat sa Dios. Kita n'yo? Kamo—dili ninyo mahimong toohan ang bisan unsa mang butang. Inyong ipa. . . Pananglitan, kung ablihan ninyo ang inyong telebisyon (kamo nga adunay ingon niana), ug kung ablihan ninyo ang inyong telebisyon ug makita ang—ang mga komersiyal, bueno, kung paningkamotan sa usa ka tawo nga ikinabuhi ang usa sa usa ka gatus nianang mga komersiyal, mamatay ka sulod sa usa ra ka semana. Kita n'yo, dili mo mahimong buhaton kini. Ug ang pinaka-hinungdan sa pagkabangkarota sa pipila ka kumpanya, sama sa usa ka produkto, ug moingon, “Mao *kini* ang produkto dinhi, ug ayaw pagkuha *nining* usa dinhi,” ug ang mao ra nga kumpanya ang nagabaligya sa mao ra nga produkto. Dayon mogawas ang lain na usab nga komersiyal, nga pilion kono *kining* usa dinhi ug dili *kana*, ug mao ra man unta nga kumpanya. Nangailad ang mga tawong Amerikano sa ingon-anang mga butang nga sama niana, hangtud nga nahimo na lang nga mga pagpanikas ang tibuok butang, hangtud nga wala na gyu'y paglaum. Wala na'y ni usa ang nakahibalo kung unsay toohan. Apan isulti ko kaninyo sa dili madugay kung unsay toohan, kung gusto ninyo og kahupayan, kung itugot sa Ginoo.

⁵⁶ Ang mga tawo, nagapamakak sila, nagapanlimbong, nagapangawat, hangtud nga kinahanglan mo na og security bond aron nga makahulam og lima ka dolyar gikan sa kang kinsa man. Usa kini ka. . . Kabalo mo, ang Biblia nagasulti nga, nga wala na gayuy gugma sa kaulahiing mga adlaw kondili diha sa taliwala lamang sa mga pinili. Husto kana. Ang Kasulatan nagasulti bahin niana, nga ang bana mamahimo nang batok sa iyang asawa, ug ang asawa batok sa bana, ang mga anak batok sa mga ginikanan. Diha lamang sa taliwala sa mga Pinili sa Ginoo nga aduna pa'y gugma nga mahibilin.

⁵⁷ Ang mga kaiglesiahanan napaingon sa mao rang butang tungod sa pang-sosyal nga pagkinabuhi. Gidala na nila kini pasulod sa iglesia, ang ilang pang-sosyal nga pagkinabuhi ug

ang ilang mga pulitika ug ang ilang uban pa nga mga butang, hangtud nga gilibog na nila pag-ayo ang iglesia hinungdan nga wala na kini mahibalo sa kung unsay buhaton. Gidala nila pasulod sa iglesia ang pulitika. Gidala nila usab ang pang-sosyal nila nga pagkinabuhi, ang pang-sosyal nilang pagkinabuhi pasulod sa iglesia, ang pang-sosyal nilang mga kalihukan, mga pag-binggo o mga pag-bunco, o unsa man ang tawag nila niini, ug kining mga pagkumbira ug mga pagsayaw-sayaw, ug uban pa, diha sulod sa balay sa Ginoo. Aba, kini—makaluluoy gayud kini.

Moingon sila, “Bueno, karon, dili man kana, anaa lang kana dinha sa sumpay nga bilding.”

⁵⁸ Hinumdumi, sa sumpay nga bilding usab kaniadto nga gipangbunalan ni Jesus ang—ang mga magpapatigayon gikan sa ilang mga butang nga baligya, ug miingon, “Nahisulat kini, ‘Ang balay sa Akong Amahan hinimo ingon nga usa ka balay’ng Alampoanan,’ ug kini gihimo ninyong langub sa mga tulisan.” Kita n’yo? Sayup kini, dili ko igsapayan kung asa man kini. Samtang nga ang iglesia... Ang iglesia dili gayud kini ang bilding, ang mga tawo kini nga anaa sulod sa bilding. Ug kung kana nga mga tawo nagadahum niana, aba, sayup kana. Ug gidala na nila kana nga batasan.

⁵⁹ Mahibaloan nato karon nga ang mga iglesia, usab, kanunay’ng nagasaad og usa ka butang, sama diha sa telebisyon ug uban pa, nga wala man gani nila tumana ang—ang butang nga gisaad nila. Ingon sa makadaghan ko nang giingon, ang usa ka daan nang panultihon, “Ang tawo kanunay’ng nagadayeg sa Dios tungod sa kung unsay nabuhat Niya, nagadayeg sa Dios tungod sa kung unsa pa’y pagabuhaton Niya (nagapaabot sa kung unsay pagabuhaton Niya), ug dayon ginabaliwala kung unsa ang ginabuhat Niya sa karon.” Kita n’yo, sila—sila—nangapakyas sila. Ug sa ingon niana sila nahimo sa kasaysayan, ingon nga mga nangahugawan, kita n’yo, tungod kay napakyas sila nga ilhon ang sa karon! Mahisgotan mo ang kahupayan nga sa makausa gihatag kaniadto ni Cristo, ug pagahisgotan mo ang kahupayan nga igahatag Niya sa umalabot nga mga kapanahonan, apan ginabalibaran ang maong kahupayan nga gikahatag Niya dinhi para kanimo sa karon. Kita n’yo? Nagabasi kini sa mao ra nga pasikaranan nga nahibaloan nato kana. Bueno, nahimo na kining usa ka dakung butang. Nahibaloan na lang karon nga sila—sila miabot... .

⁶⁰ Nagakahitabo usab kana bisan sa mga Pentecostal, sa mga kaiglesiahan. Nagakahitabo usab kana diha sa mga Pentecostal, nga kanunay sila magsaad og usa ka butang nga wala gyud nila natuman. Kanunay kini nga ang matag tawo adunay nagkalainlaing sensasyon, ug—ug himoon kon kini uyon man sa Kasulatan o dili, ug nagasaad sila og usa ka butang nga dili man nila matuman, hangtud nga daw sa miabot na kini sa

punto nga diin daw sa wala na'y pagkasinsero. Ang—wala na sa maong mga tawo ang tinuod nga unod sa pagkamatinuuron. Nawad-an na kini og. . . Ang mismong Ingles nga pulong nga *pagkamatinuuron* nawad-an na kini sa iyang—iyang bili ngadto sa mga tawo. O, tungod sa pamaagi sa—sa pagkinabuhi sa mga tawo, nawala na kining pagkamatinuuron diha kanila. Karon mora og wala na sila makasabut.

⁶¹ Bisan gani sa atong mga pagsugid! Karon, buot ko nga kamong mga tawo nga nagaanhi, o mga ania ug nagagunit. . . o diha sa—sa teyp, gusto ko nga maminaw kamo og maayo karon sa makadiyut lang sa niini nga kinutlo. Kini—kini. . .

⁶² Gawas kon sinsero gayud kamo! Ug dili kamo mahimong sinsero hangtud nga positibo gayud nga nakasabut kamo. Kung nagapamasin lang kamo, o nagapangaggpas, o nagalaum pa, nan dili mahimo nga magkaaduna dinha og halawum nga pagkamatinuuron nga gikinahanglan sa Dios. Kini, pagtoo, dili nga usa lang ka “nagalaum” o nga “mahimong husto kini.” Kinahanglan nga hingpit gayud kini nga “Amen!” Mao kini ang inyong pinakabásihanan. Kini—kini—inyo kining—mao kini ang inyong absolute. Mao kini ang butang kon diin kamo nahigot. Kita n'yo? Kinahanglan nga modangop kamo ngadto sa inyong pinakabásihanan, nga “Mao kini ang Kamatuoran ug nga. . . Kini wala na'y uban pa kondili ang Kamatuoran, ug kinahanglan nga ingon niana gyud Kini!” Ug dayon pagmaamgohan na ninyo kana sa inyong hunahuna, nan kinahanglan ninyong moduol Niini uban sa tibuok ninyong kinabuhi, kalag, lawas, tanan-tanan nga anaa kanimu, ipamaligya ang tanan para lang niini. Ingon nga magrasyanhon nga gitudloan kita ni Jesus mahitungod sa tawo nga nagapamalit og mga mutya, ug nakaplagan niya ang Usa nga labing bililhon gayud ug gibaligya niya ang tanang uban pa nga aduna kaniya aron lang nga maangkon Kini. Ang tanang kamatuoran ug ang tanang butang nga aduna siya kaniadto, bisan pa og mapuslanon kadto nga mga mutya, siya—siya. . . kining Usa mao'y pinakabililhon sa tanan para kaniya. Ug pagmakaplagan na ninyo ang Pinakabásihanan nga iya sa Dios, ang Iyang Pulong, usa ka saad bahin sa usa ka pihong butang, kinahanglan nga hibalong ninyo úsa nga Pulong kini sa Dios, nga ang butang inyong nakit-an nga nahimo iya gayud sa Dios. Wala—walay—walay “basin tinuod diay, posible, daw sa mao gayud.” “Ang Dios gyud Kini!” Dayon pagmoabot na kamo sa niana nga punto, nan mao na kana ang Mutya nga labing bililhon, kinahanglan nga mopahilayo kamo gikan sa unsa mang butang nga ginaingon ni bisan kinsa nga sukwahi Niini. Ayaw gayud pagtan-aw sa kung unsay nakab-ot sa tawo. Kinahanglan nga motan-aw kamo sa kung unsay giingon sa Dios ug kung unsay Iyang gisaad, ug makita Siya nga ginatuman kini, nan mao kana mismo ang imong Pinakabásihanan. Ug dayon ang tanan-

tanan sa kung unsa kamo, ang tanan-tanan kung unsa kamo kaniadto, ang tanan-tanan sa kung unsay inyong ginalauman sa umalabot, kinahanglan nga mapahiluna sa ibabaw Niini sama nga daw sa kamatayon ug kinabuhi kini para kanimo nianang higayona.

⁶³ Sa hunahuna ko ang usa sa mga butang nga nagapahilayo sa atong mga katawhan gikan sa pagkaayo mao ang kakulang sa mga pagsugid, mao ang kakulang sa mga sinsero nga pagsugid. Karon, pananglitan, mahimong dili kaayo kini maayong paminawon, pero wala ko kini ginatuyo sa ingon niana nga paagi. Apan, samtang nagatan-aw ako sa akong asawa nga naglingkod dinhi. Kung mogawas ko karon dinhi ug mogakus sa laing babaye ug—ug magkari-karinyo kaniya, ug nahibalo na gyud ako nga, human kong buhaton kana, nga sayup gyud ko, sayup kaayo. Karon, siyempre, ipahilayo gayud ako sa akong Maglilipay gikan sa pagbuhat niana. Kita n'yo? Kita n'yo? Apan buot kong ipasabot kung ako—kung gibuhat ko kana, ug ako. . . mahitabo man nga nabuhat ko kini o unsa mang butang nga susama niini. Ug dayon nasayod ako nga ang unang butang mao ang pagtug-an sa akong asawa, sa dili ko pa mahimong itug-an sa Dios, “pasayloa ko,” tungod kay nakasala ako batok kaniya. Kung moduol ka ngadto sa altar ug timan-i nga kinahanglan gyud nimo, nga tul-iron usà kana, sa dili pa nimo buhaton ang imong paghalad. Busa kinahanglan ko nga moadto kaniya. Nagatoo ako nga ang pagsugid usa ka pagtul-id usab. Dili kini tinuod nga pagsugid gawas kon ingon niana kini.

⁶⁴ Unsa kaha kung moingon ako karon, “isugid ko kini, nga nakabuhat ako og sayup, moingon ko, ‘Buutan nga Ginoo, Oh Higala ko, Ikaw nahibalo nga nakaila gyud ako Kanimoo. Dalaygon ang Dios! Alleluyah! Ako—ako—ako—Nagatoo ako nga Usa gyud Ikaw ka suod nga Kauban. Pasayloa ko. Kabalo Ka, suod, suod nga Higala, ako—wala ko tuyoa nga maingon niana kini’”? Kita n'yo?

⁶⁵ Karon, moingon ka, “Pagpanamastamas kana.” Mao gayud. Ang paghimo og pagsugid nga sama niana, panamastamas gayud.

⁶⁶ Apan unsa kaha kung moingon pud ako, “Ginoo, ako—wala ko tuyoa ang pagbuhat niini nga mamaingon kadto, ug tabangan Mo ako ug dili ko na gyud kini buhaton pag-usab”? Balibaran gyud Niya ang akong halad hangtud nga moadto una ako ug tul-iron kadto diha sa akong asawa.

⁶⁷ Dayon unsa kaha kung moduol ko ngadto kaniya diha sa mao ra gihapon nga pagkawalay pagtahud, ug mosulti, “Hoy, suod kong babaye, suod kong higala, suod nga inahan sa akong mga anak, ug suod kong sweetheart, kabalo ka baya nga daan na tang suod kaayo nga magkahigala sa dugay nang panahon. Ay, unsa

kaha kung moagbay ako sa laing babaye? Ug unsa ma'y isulti nimo bahin niini, suod kong kauban, pasayloon kaha ko nimo?"

⁶⁸ Unsa na lang kaha ang iyang hitsura. Maghunahuna siya, "Unsa ma'y nahitabo sa akong bana?" Kita n'yo? Karon, ang unang butang, dili siya mahibalo kon nagkomedyang lang ba ako o kon wala.

⁶⁹ Ug wala ka nagabuhay og ingon niana aron sa paghimo og mga pagsugid ngadto sa imong isig-katawo o sa Dios. Ginahimo mo kini nga may pagkasinsero gayud, inubanan sa diosnong pagkasubo tungod sa imong sala. Una, kinahanglan nga mangayo ka og pasaylo. Kinahanglan nga sultihan ko siya, "Sweetheart, ari ka, mahimong mangahulogan kini sa tibuok natong kaminyoon. Ang babaye nga kauban ko, mao kana'y akong sweetheart, ug kung giunsa ta ka gimahal sa daghan na niining mga katuigan. Apan karon mahimong biyaan mo na ako, sugod karon, mahimong dili ka na magpabilin kanako, mahimong dili mo na ako dawaton. Ug nahibalo ako niana. Apan bisan pa man, aron lang nga matul-id kini, kinahanglan ko gayud nga matul-id kini." Kinahanglan ko nga sultihan siya sa tibuok kong kasingkasing.

⁷⁰ Dayon gikinahanglan ko nga sultihan ang Dios sa mao ra nga paagi. Ug isulti sa asawa ko ug sa Dios, sa pagkamatinuuron, nga dili ko na gayud buhaton kadto pag-usab, pinaagi sa grasya sa Dios. Kita n'yo? Dili lang nga . . . Karon, mahimo kong itago kini kaniya, ug dili niya (kita n'yo?) makita. Tingali ang akong pagsulti kaniya mahimong—mahimong makapakumbinse kaniya, apan ang akong pagsulti dili gayud makapakumbinse sa Dios. Nagatan-aw Siya sulod sa akong kasingkasing ug nasayod Siya. Ug bisan pa man, pipila na lamang ka tuig makauban ko siya, kon itugot man sa Dios, ug pagakuhaon na kami gikan niining kalibutana. Apan diha sa Dios, kini Walay Katapusan, busa kinahanglan ko gayud nga magmatinuuron sa Dios. Ug dayon kung ako matinuuron, pagadunggon Niya ako. Apan kung ako dili matinuuron, dili ko na kinahanglan nga usik-usikan pa ang oras sa Dios sa pagpaminaw kanako.

⁷¹ Ug sa ingon niana nahibot kini karon, diha sa taliwala sa mga tawo, daw sa wala na gayu'y halawum nga pagkasinsero nga—nga angay untang aduna sila.

⁷² Ug nagatoo ko nga ang usa ka lalaki o babaye nga nagaanhi aron maiampo, kinahanglan una nga isugid nila ang tanantanang nga nabuhay nila, ug mahitul-id ang tanan. Tungod kay, nakita n'yo, nahimatikdan na ninyo sa makadaghang higayon ibabaw sa entablado, mahimatikdan n'yo, mabantayan n'yo ang kahalayo niana sa kung unsa ang MAO KINI ANG GINAINGON SA GINOO. Kita n'yo? Kita n'yo? Ang mga tawo, ang pananawon nagakahitabo, siyempre, tungod sa ilang pagtoo, gisaad kana sa Dios pinaagi sa usa ka gasa. Apan ang pagpang-ayo usa

ka butang nga lahi, kita n'yo; mailhan dayon kini sa Dios, kita n'yo.

⁷³ Karon, nahimatikdan nato, nga, ang mga tawo nga nagahimo sa ilang mga pagsugid, kinahanglan nga magduol sila nga may kahalawum sa pagkasinsero. Aduna ako dinhi, wala na ko'y igong oras aron sa pagbasa niini, apan anaa kini sa Binghamton, New York, nagatoo ko. O, sayup ba ako niana? Oo, Binghamton, nagatoo ko nga husto kini. Ang lugar kon diin anaa ang Endicott Shoe Company didto. Binghamton, nagatoo ko nga gitawag kini og Binghamton, Binghamton, husto kana, sa New York. Atua kami didto sa lugar-sapatosan sa Endicott-Johnson, usa ka dakung awditoryum, ug nagkaaduna kami kaniadto og usa ka tigum didto. Ug usa ka buntag, si Billy Paul nga atua sa pikas ko nga kuwarto, bugnaw kaayo kaniadto, nga nagahaguros pa ang hangin. Ug nahibaloan ko, didto sa taliwala sa mga tawo, ang kakulang sa pagkasinsero, mora'g ingon niana. Ug ako—nahibulong ko kon ngano. Adunay usa ka tawo nga naayo kaniadto, sa katuyoan, o usa ka lalaki nga—nga mao'y akong gihisgutan. Ang maong lalaki adunay grabe nga balatian, ug naayo siya niadtong gabhiona samtang nagatindog didto. Ug sa wala pa kami mihawa, sa lima ka adlaw, mibalik kaniya ang maong balatian. Kita n'yo? Tungod kay, diha sa Presensiya sa Balaang Espiritu, gitangtang Niini kadto nga balatian gikan kaniya. Sama lang sa gibuhat Niini sa batan-ong babaye sa dili pa lang dugay dinha sa gawas, ang batan-ong lalaki usab sa miaging gabii, kita n'yo. Apan kinahanglan nga aduna gayud og halawum nga pagkasinsero sa pag-ila nga mahimong tangtangan kini sa Dios gikan kaninyo karon, nga sa nianang mao ra nga pagdihog diha kaninyo, padayon nga mapahilayo Niya kini gikan kaninyo. Kita n'yo? Ug dayon nakigsulti kanako ang Balaang Espiritu usa niana ka buntag, mga adlaw'ng daku, ug miingon, "Pagtindog didto sa entablado o sa kung asa man, ug dalha kini nga mga tawo didto ug himoa nga masugid nila ang tanang butang nga nabuhat nila, sa dili pa ka moampo para kanila." Kita n'yo? Ang kahalawum gayud sa pagkasinsero!

⁷⁴ Gawas kon maghinulsol ang kalibutan, malaglag gyud kini. Kita n'yo? Ug ang pagsugid mao'y gikinahanglan sa kalibutan karon, ang matinud-anon nga pagsugid.

⁷⁵ Sama kini sa tambal nga para sa sakit. Mabasa natong tanan sa sudlanan kung unsa kini nga matang sa tambal ug kung unsa nga sakit ang—ang matambalan niini. Apan, kabalo na mo, ang pagbasa sa mga pahimangno, buhaton ko kana sama sa Biblia, ang atong mga eskwelahan ug mga seminaryo mahimong makabasa man sa tibuok Pulong. Apan, kabalo na mo, kon sa pagbasa lang sa mga pahimangno ug kung unsaon sa pagtumar niini, kini—dili kini makapaayo sa sakit. Kita n'yo? Kini—anaa na ang tambal, busa kihahanglan nga tumaron gyud kini! Busa mahimo man ingnon sa usa ka tawo, "Ako usa ka—

usa ka teologo. Karon, ayaw ako sultihi, ako—ako—ako... ang mahitungod sa mga ingon niini-ug-ingon niana, nahibalo ako sa mga Kasulatan. Ako—nahibalo ko nga ang Biblia nagahisgot sa ingon niini-ug-ingon niini, *niana*.”

⁷⁶ “Ang nagapatalinghug sa Akong Pulong,” San Juan 5:24, pananglitan. “Ang nagapatalinghug sa Akong Pulong ug nagatoo Kaniya nga nagsugo Kanako, may Kinabuhi nga Walay Katapusan.” O, ang ginaingon sa King James “nga dayon,” nga mao ang “Walay Katapusan,” husto gayud. “May Kinabuhi nga Walay Katapusan tungod kay mitoo siya.” Daghang mga tawo ang nagaingon nga nagatoo sila. Karon, tinuod kana. Ang—ang—ang Kasulatan husto. Ako—nagabasa ako sa—sa—sa Reseta, nagabasa ako sa kung unsa ang Reseta, ug sa Tambal para sa akong sala, apan mahimo ko ba nga tumaron Kini? Mahimo ko ba ang pag-too? Mahimo kong ingnon “Ako nagtoo,” apan nagatoo ba gyud ako? Mao kana ang sunod nga butang. Basahon lang Kini ug hibaloon ang mga pahimangno, dili kana makatambal sa sakit. Ang problema mao nga (sa atong sitwasyon) wala nato ginabuhat kung unsa ang ginaingon sa Tambal nga pagabuhaton. Aduna na kanato ang Tambal, apan dili nato ginatumar Kini. Nagaingon kita nga nagatoo kita, tungod kay mabasa man nato Kini; apan sa pagtumar gayud Niini, wala nato ginabuhat kini. Kita n’yo, ingon niana usab ang Maayong Balita, usa ka tambal, sa niini nga sitwasyon. Kung ang pasyente... Ug kung ang tambal napamatud-an na nga makaayo sa pasyente, ug nabasa sa pasyente ang tanan mahitungod sa—sa pagkadiskubre niini nga tambal, ug nahibalo sila sa matag sangkap nga aduna niining tambal, naila nila ang tanang—ang ngalan sa siyentista nga nagdiskubre niining maong tambal, sama sa bakuna sa Polyo ug uban pa. Kung kita—kung nahibalo kita sa tanan nga Pulong mahitungod Niini, apan nagdumili sa pagtumar Niini, dili Kini makatabang kanato. Kita n’yo, Kini—dili gayud Kini makatabang kanato.

⁷⁷ Apan, ug kung ingon-ana nganong moingon man kita, “Apan gitumar man namo kini!” Ug kung moingon ka nga gitumar nimo kini, ug makita man sa pasyente nga walay resulta, wala niya gitumar kini. Mao lang kana. Unsa kaha, kung ang kanang orasan diha sa bungbong dili ingon nga usa ka hilabtanon, kita n’yo. Gusto ko nga magpabilin sa paghisgot dinhi ug ipatuhop gayud ngadto sa atong—atong mga tawo, sanglit nga gipamatud-an man sa Maayong Balita kining mga butanga, ug moangkon sila nga gitumar nila Kini, ug nagapakita sila nga wala gayud nila gitumar Kini! Unsaon man sa usa ka tawo sa pagbasa sa mga Kasulatan mahitungod nianang gamay’ng mga butang nga akong gihisgutan, mahitungod sa mga babaye nga mugbo ang mga buhok ug nagsul-ob og mga purol, ug uban pa nga sama niana, giunsa man nila pagtawag sa ilang mga kaugalingon nga mga Cristohanon sa diha nga ang pinaka Tambal Mismo lahi

man ang ginaingon! Kita n'yo? Giunsa man? Moingon ka, “Apan nagsayaw man ako diha sa Espiritu, nagpanulti man ako og laing mga dila.” Wala gayud kana nagpasabot og usa ka butang. Ang imong kinabuhi mismo nagapamatuod nga wala gyud nimo gitumar Kini! Kita n'yo? Miingon ka nga imong—gitumar nimo Kini, apan wala gayud! Kay, imo pa man sa gihapon ginapakita ang tanang sintomas nga giayo na unta sa maong Tambal. Ug ang Tambal, diha sa Maayong Balita, usa gayud ka garantisado nga tambal! Mao gyud. Karon, nakita n'yo, kinahanglan nga makapakita ka'g mga resulta.

⁷⁸ Pagkuha og usa ka tawo nga nagaingon nga sila, “Ako. Usa ako ka magtotoo. Nagatoo ako.” Igoa sila sa Kahayag sa Maayong Balita, igsoon, tumaron nila Kini dihadiha dayon mismo! Ug magapakita sila og mga resulta. Sigurado gyud. Dili nimo makit-an kana nga lalaki sa bisan asa man nga mga bilyaran, dili nimo siya makit-an dinha nga may sigarilyo sa iyang kamot, dili nimo siya makit-an nga nagainom og ilimnon nga makahubog. Oh, dili. Dili nimo siya makit-an nga magbirigbirig uban sa laing mga babaye. Dili, dili, dili. Dili ko igsapayan bisan unsaon pa nilang mga babaye pagpakita sa ilang lawas kaniya, ilingiw gyud niya ang iyang ulo ngadto sa kawanangan ug molantaw ngadto kang Cristo. Unsa man kini? Nagapakita kini nga miipekto ang Tambal. Ug kung Kini wala miipekto, moingon ka, “Bueno, kabalo gyud ko nga gitumar ko Kadto,” bueno, nan hain ka na man diay karon? Naghimalatyon ko na. Makita gyud diha kanimo! Makita ko kanimo sa paghiling ko sa imong kahimtang, pinaagi sa—pinaagi sa Biblia, nga anaa pa gihapon ka diha sa sala. Ug ang bayad sa sala mao ang kamatayon. Ayaw'g hunahunaa nga kinahanglan pa kini himoon og mas klaro pa. Kita n'yo, ang imo mismong mga buhat nagapamatuod, ang imo mismong mga buhat nagapamatuod nga wala nimo gitumar Kini. *Abi mo gitumar mo. Amen.* Ikaw—tingali mahimong nagmatinud-anon gyud ka sa pagbuhat niini, apan wala nimo gibuhat kini! Kay, kung gibuhat mo pa unta, nagsaad ang Dios nga moipekto Kini diha kanimo. Ug ang karaang sala anaa pa gihapon dinha, ang karaang kinaiyahang Adan nagpabilin pa sa gihapon dinha, ang karaang pagkawalay-pagtoo. Apan ginapaningkamotan nimo sa imong kaugalingon nga ingon niana ka, diha sa atubangan sa isigkatawo nimo, nagaingon, “Bueno, usa ako ka magtotoo. Oh, himaya sa Dios! Oo, usa ako ka magtotoo.” Apan, tan-awa, wala gyud Kini nakatabang nimo og bisan unsa.

⁷⁹ Tingali ang pasyente mismo dili gayud pinili nang daan para sa—para sa maong Tambal. Kung ingon niana kini, dili gyud Kini moipekto. Husto kana. Nakita n'yo?

⁸⁰ Apan tan-awa kadtong makaluluoy'ng mahugaw nga babaye sa diha nga miigo ang Kahayag diha kaniya, adunay usa ka butang nga anaa na dinha aron nga mosulbad sa iyang

kahimtang. Kita n'yo? Kung nagatoo kita ug matinuuron gayud nga nagasugid, kining Tambal nga mao ang pamaagi sa Dios moipekto gayud. Aduna ang Dios og gitagana na nga paagi alang niining mga butanga.

⁸¹ Karon, kita n'yo, molakaw ang tawo, moingon, “Bueno, nagpamiyembro man ako sa iglesia. Mao na gyud kana alang kanako.” Dili kana mao'y gikatagana nang pamaagi sa Dios.

⁸² Ang gikatagana nang pamaagi sa Dios mao ang paghinulsol, mga pagsugid, ug pagpakita og mga resulta, pagpamunga og bunga nga alang sa paghinulsol, makita ang pagkamatinuuron. Kamong mga tawo kung mahimo lang ninyo unta kana niining buntaga, kanang mga igaampo! Ug kamong mga nakadungog sa niining teyp, sa tibuok kalibutan, ug human nga mapatukar kining teyp, ug ang ministro o ang tawo nga nagapatukar niini diha sa mga pang-kongregasyon nga panon didto sa mga kalasangan o bisan asa man kamo, nga nagapatukar niini, ipangtino usà ang inyong mga pagsugid, ug dayon magduol nga walay bisan unsa man sulod sa inyong kasingkasing, gawas sa pagtoo, ug maiampo, dinha magapamuhat ang maong Tambal.

⁸³ Si Jesus miingon, “Paghinulsol kamo, ang matag usa kaninyo!” Ang buot kong ipasabot si Pedro ang miingon kaniadto sa Adlaw sa Pentecostes, “Paghinulsol kamo, ug pabautismo sa Ngalan ni Jesus Cristo para sa kapasayloan sa inyong mga sala, ug madawat ninyo ang gasa nga Espiritu Santo.” Pag-maghinulsol ka sa hingpit gayud ug magtoo sa Ginoo, ug nabaustimohan na sa Ngalan ni Jesus Cristo, ginahimo mo nga usa ka bakakon ang Dios kung wala nimo madawat ang Espiritu Santo. Kung. . . Ingon niini ang giingon ni Jesus, ang katapusan nga sugo ngadto sa Iyang iglesia, “Maganunot kini nga mga ilhanan ngadto kanila nga nagatoo. Pandongan nila sa ilang mga kamot ang mga masakiton, mangaayo kini.” Ug makita ninyo kana nga mga ilhanan nga nagauban sa usa ka magtotoo, ug pagmoanha ka ug kana nga magtotoo mopandong sa iyang mga kamot diha kanimu, ug walay nahitabo, nan aduna gyu'y sayup diha sa imong pagtoo. Kita n'yo? “Ang magtotoo!” Nagsaad ang Dios og usa ka gikatagana nang pamaagi.

⁸⁴ Nagasulay kita nga makakaplag og kahupayan sa pag-ingon, “Dili ko kinahanglan nga maminaw.” Dili, tinuod kana, dili nimo kinahanglan nga maminaw.

⁸⁵ Apan kung ikaw pinili nang daan ngadto sa Kinabuhing Walay Katapusan, maminaw ka gayud Niini ug malipay ka Niini. Mao kini ang imong Kahupayan. Mao kini ang Butang nga gipangandoy mo sa tibuok nimong kinabuhi. Mao kini—mao kini ang Mutya, nga, imong—imong andam biyaan ang tanang butang tungod niini. Kita n'yo? Gusto nimo Kini tungod kay nahibalo ka nga mao kini ang mahigugmaong kahingawa sa Dios para kanimu. Mao kini ang usa ka butang nga mao'y

mosulbad bahin sa problema sa sala, nga mao'y mosulbad sa pagkawalay-pagtoo, nga mosulbad sa tanang butang, dinha kanimo, kung gusto nimo Kini. Ang nagmasakiton kaayo ug ang nahibalo nga siya masakiton, ang mao'y nagapangita sa usa ka mananambal. Kita n'yo? Dili kadtong dili nagmasakiton, wala man siya nagkinahanglan og mananambal, miingon si Jesus. Apan kini mao kadtong mga masakiton. Kung nahibalo ka sa imong kahimtang, nan kinahanglan mong buhaton ang sama sa giingon Niyang gikinahanglan buhaton. Dayon mahitabo gyud kini, kay kon dili nagsulti ang Dios og usa ka butang nga sayup. Kita n'yo?

⁸⁶ Daghan kaayong mga tawo usahay, diha sa mga panerbisyo og pagpang-ayo, wala ka nagasugod gikan sa ubos niini. Kinahanglan aduna ka'y hinlo na nga kinabuhi, kinahanglan nga anaa ka diha sa maong kahimtang, kinahanglan makaingon gyud ka, "Oo, nagatoo ako Niini," ug kana kinahanglan nagagikan gayud sa imong kasingkasing. Dayon ikaw, dili kinahanglan nga aduna pa'y mobebi-bebi kanimo, moingon, "Karon, oh, minahal nga igsoong lalaki, minahal nga igsoong babaye, kinahanglan mo baya buhaton *kini*, kinahanglan mo baya nga buhaton *kana*." Usa ikaw ka magtotoo, walay bisan unsa nga mahimong moagaw Niini kanimo. Dili ko igsapayan kung unsa ma'y isulti ni bisan kinsa man, bisan unsa nga maglilingaw, bisan unsa nga maglilipay, bisan unsa nga doktor, bisan unsa nga ospital, unsa ma'y mga diagnoses, dili ka motoo niini sa gihapon. Nahibalo gyud ka Niini! Dili na kinahanglan magsulti pa og bisan unsa man mahitungod Niini, nasayod gyud ka Niini! Karon, ingon niana ang tinuod nga butang.

⁸⁷ Aduna kita og daghan kaayong mga pagsundogsundog sa tanang butang. Ingon-ana man gyud kini. Ayaw pagkasubo bahin niana. Kinahanglan anaa man gyud kini dinha. Ingon niana na kini kaniadto pa ug mamahimong ingon niana kini sa umalabot. Apan ginasulti ko kaninyo niining buntaga kung unsa ang Kamatuoran ug ang tinuod. Ania na kita sa kaulahiag kapanahonan. Kinahanglan nato nga ipahiluna kini nga butang diha sa Kamatuoran, kita n'yo, ug mapahibalo kung unsa ang Kamatuoran.

⁸⁸ Karon makita nato nga ang mga tawo dili modawat sa pamaagi sa Dios mahitungod niini. Gusto nila, sila . . . Aduna ang Dios og gikataganang paagi para sa imong kahupayan. Aduna ang Dios og gikataganang paagi para sa tanan niining mga butang. Apan dili Kini gusto sa mga tawo, laing ubang mga paagi ang sundon sa mga tawo. Ug sa matag higayon nga sundon sa mga tawo ang laing ubang paagi gawas sa paagi nga iya sa Dios, ilang ginahatud ang kapungot sa Dios nganha mismo kanila sa matag higayon nga ginabuhat nila kini. Husto gayud.

⁸⁹ Ug ang tanan niining mga butang nga gihisgutan ko, nagahatud kini kanato ngadto niining, iya sa kalibutan, ang

tanan niining mga pagpanglimbasug alang sa uban pang siyentipikong mga kalampusan, pagpanglimbasug alang sa pang-iglesiang mga kalampusan, pagpanglimbasug alang sa nagkalainlaing mga butang nga mao'y naghatud kanato ngadto sa katapusan sa kalibutan. Ania na gyud kita sa katapusan. Wala na'y ni usa ka paglaum nga nahibilin pa. Wala na kita'y paglaum sa pagkabuhi. Wala gani kita ni usa ka kahigayonan sa pagkabuhi. Karon tugoti lang ako nga mapatin-aw kini sa pipila ka mga minuto, ug nga pamatud-an lang kini diha kaninyo.

⁹⁰ Ug ang matag usa kaninyo, nakuha n'yo, kung wala ninyo nakuha, angay nga magbasa mo og mga peryodiko bahin sa medisina, angay nga magbasa mo og Reader's Digest, ug uban pa, kon diin mabasa ninyo ang mahitungod niining mga kalampusan. Karon aron sa paghimo og . . .

⁹¹ Usa ka ministro dinhi ang nagapadala sa niining Mensahe sa tibuok kalibutan. Aron sa paghimo og usa ka pagpahayag nga sama niini, nga kono wala na kita'y paglaum, nga lagpas na kita sa katubsanan, nga nalabang na kono nato ang utlanan tali sa katubsanan ug paghukom, karon kinahanglan kong hatagan ang kongregasyon og pipila ka mga basihanon kon nganong nahimo kini nga pagpahayag. Aduna gayud og unsa mang hinungdan nga ang usa ka tawo, kung anaa siya sa husto niyang panghunahuna ingon nga ako mao usab, mohimo og usa ka pahayag nga sama niana, aron sultihan ang iyang nasud, aron sultihan ang iyang kongregasyon, aron sultihan ang mga tawo kon diin nga mokuyanap kini sa tibuok kalibutan ngadto sa traynta o kuwarenta ka nagkalainlaing mga nasud, tingali, sa tibuok kalibutan gayud, ug sa mga tawo ug ang mga pinulongan, nga "ania na kita sa kaulahiang takna," kinahanglan lang nga mohatag kita og usa ka pahayag o—o—o ipatin-aw ang diyutay'ng bahin niini hangtud moabot kita ngadto sa atong pinaka-hilisgutan para karong buntaga.

⁹² Tan-awa, karon kung unsa ang gihatud kanato sa siyensiya ug edukasyon, ug mao kana ang mismong butang nga gidawat sa tawo imbes nga ang Pulong sa Dios, usa ka siyentipikong pagpamatuod. Ug ang kanunay'ng ginabawi sa siyensiya kung unsa ang ilang ginasulti. May ginabasa ako dinhi dili pa lang dugay nga diin ang usa ka siyentista nga taga-Pransiya miingon, mga duha na ka gatus ka tuig ang milabay, o tulo na ka gatus, "Diha sa pagpaligid og usa ka bola dinha sa yuta," ug miingon, "kung kini nga bola, sa ingon ani kakusog. . . Kung ang kalibutan maka-imbento man og usa ka matang sa butang nga magpabiyaha kanila sa dili magminos og traynta ka milya kada oras, mora'g ingon niana, sa tibuok kalibutan," nga siyentipikanhong mapamatud-an gyud niya kini, "nga ang gibug-aton niini bisan pa sa grabitasyon pagaalsahon kini gikan sa yuta." Kita n'yo? Karon, sa hunahuna n'yo ba mobasi pa sa gihapon ang siyensiya sa nianang tawhana? Dili gayud. Sa

kaniadto pa kana, para kanila.

⁹³ Karon, ato lang hunahunaon karon, gusto natong tanan moingon, “Gusto ko nga siyentipikanhong pamatud-an kini.” Ingon niana ang ginaingon sa daghang mga denominasyon sa mga tawong relihiyoso sa karon. Gusto nila og usa ka siyentipikong kapanghimatuuran. Bueno, puede kong lingion sila ug moingon, “Pamatud-i kanako sa siyentipikanhon gayud, ang Dios diha sa inyong kongregasyon. Pamatud-i kanako ang bisan unsa man, sa siyentipikanhong pamaagi, nga matuud gyud kana. Pamatud-i. . .”

⁹⁴ Unsa man ang matuud? Ang kinabuhi. Gusto kong hatagan ninyo ako og ikaupat ka bahin sa bili niini, o—o tugoti ko sa pagbaligya sa tanang butang nga aduna ako, aron lang nga maangkon kana nga bahin sa kinabuhi. Ug tinuod ba gayud ang kinabuhi? Kung kini dili tinuod, para man diay sa unsa nga ania kita dinhi?

⁹⁵ Ang kinabuhi, pagtoo, gugma, kalipay, pakigdait, pagkamapuanguron, pagkamaayo, kaaghop, pailub, ang siyensiya dili makahikap niini. Ug ang mga ingon niana lang ang matuud, ang malungtarong butang nga ania dinhi. Ang tibuok Cristohanong hinagiban nagalantaw ngadto sa mga dili makita. Apan dili mapadayag sa mga pagbati kining mga butanga, apan anaa lang kini dinha. Mao kana’y hinungdan nga nagkinahanglan kini og pagtoo aron sa pagtoo niini, ug ginapamunga niini diha kanimo kung unsa ang gipahayag dinha sa pagtoo. Ginahatud niini kanimo, ang Balaanong pagpang-ayo ug ingon-anang butang. Dili nila mapamatud-an kung giunsa ka pagkaayo sa Balaanong paagi, apan nahibalo sila nga adunay Balaanong pagpang-ayo. Ako. . . Dili nila mapamatud-an kung unsa’y makapaluwas gikan sa sala, apan nahibalo sila nga nagakaluwas ang mga tawo gikan sa sala. Busa dili kini mahimong mapamatud-an sa siyentipikanhong paagi, apan kini siyentipikanhon nga anaa gyud sa paagi sa Dios sa pagtan-aw niini.

⁹⁶ Karon, unsa man ang gihatud sa siyensiya kanato? Karon, sa makadiyut lang mahimong makurat kamo. Ang gihatud kanato sa siyensiya mao ang sakit, kamatayon, ug mga balatian. Karon, usa ka bahin lamang sa hulagway ang gitudlo kaninyo. Apan adunay duha ka bahin niini. Moingon kamo, “Ang siyensiya man ang nag-imbento *niini*, *niana*, ug sa *uban*.” Bueno, ihatag namo kaninyo kana nga pribilihiyo. Apan atong tan-awon usab ang pikas nga bahin niini. Ang siyensiya naghatud kanato og sakit. Ang siyensiya naghatud kanato og mga balatian, kamatayon.

⁹⁷ Tan-awa! Ang siyentipikong pagpang-hybrid nagdala og kamatayon ngadto sa henerasyon, sa mga kalan-on ug sa ingon-anang mga butang. Nagpahuyang kini sa mga tawo ug busa, hangtud nga ang—ang mga kalalaken-an ug mga kababayen-an

binuhat na gikan sa usa ka binugkos nga basura, ug walay—walay—wala na’y kalig-on sulod niini. Nahimo na kining usa ka binugkos nga mahumok nga bukya. Dili sila mabuhi kung walay air conditioner, mangamatay sila. Dili na sila makadula og baseball, kung ang usa kanila madagpi diha sa usa ka dapit, makapatay kini kaniya, diha sulod sa boksinganan ug kung unsa pa. Ug pagkamahuyang gayud niini hangtud nga ang mga kalalaken-an ug mga kababayen-an, bueno, kini ang nagahimo og pagkadaut diha kanila.

⁹⁸ Ug ilang ginahimo kini nga mga pagpang-hybrid diha sa mga baka nga mibalik kini ngadto sa mga tawo karon, sumala sa siyensiya mismo, ug nga nagahimo og mga pagkadaut diha kanila. Tungod kay, kung ang—ang usa ka baka hybrid, o bisan unsa nga kalan-on hybrid, kana nga kalan-on nagahimo og selula sa dugo, ug ang selula sa dugo mao man ang imong kinabuhi. Nakita na ninyo kung unsa ang nahimo niini? Ug dayon, diha sa karne, ginahimo nila kini nga mga pagpang-indyeksyon diha sa mga karne, ug karon napamatud-an nga kini nga mga pang-indyeksyon adunay ipekto diha sa tawo. Siyentipiko gayud!

⁹⁹ Gina-isprihan nila ang mga kaumahan niining DDT, nga nakita ko niadtong miaging adlaw, ug karon aduna na kita og walo ka gatus nga nasakit nga mga tawo gumikan sa pagkaon og mga itlog dinhi niini nga lugar. Nahinumduman ba ninyo pila ka tuig na ang milabay sa dihang una kong, sa kaniadtong aduna kita’y gamay’ng tigumanan dinhi, ug nga nagpanagna ako, ug miingon, “Mahitabo kini sa kaulahiing mga adlaw, ayaw kamo pamuyo sa walog ug ayaw pagkaon og mga itlog.” Nasulat ko kini diha sa akong libro. Naghunahuna ako nga aduna gyu’y usa ka butang bahin niana, ug miadto ko ug gitan-aw kini. “Ayaw pagkaon og mga itlog.” Kana mao’y sa kaniadto pang 1933. Aduna na karon og usa ka butang diha sa mga itlog, ug akong nakita kon diin ang siyensiya nagaingon nga ang usa ka tawo’ng lagpas na sa singkwenta ka tuig ang panuigon dili na gayud magakaon og itlog, tungod kay pinakalisud kini nga butang diha sa kasingkasing nga puede’ng kaonon. Mga balatian gayud!

¹⁰⁰ Ang gatas, naandan na kini nga ang atong pinakabalanse nga pagkaon mao ang gatas. Ang mga doktor moingon kanimo, “Pahilayo gyud gikan niini.” Nagakahinungdan kini og sinusitis ug tanan na. Mao ra man kini nga tawo ang naanad sa pag-inom niini ug nabuhi pa sa pila ka mga katuigan ug wala man gani nanghibalo bahin sa sinusitis, apan ang pagpang-hybrid ug uban pa ang nagdaut sa lawas sa tawo hangtud nga kini wala na’y lain kondili usa na lang ka binugkos nga basura, usa ka bola—usa ka bola sa sakit. Unsa man ang nagpahimong ingon niini? Ang siyensiya!

¹⁰¹ Tan-awa! Nagpahinungdan kini sa semilya tali sa—sa lalaki ug sa babaye nga mamahuyang, ang lawasong kahuyang sa

tawo, tungod sa maong semilya, ug ang pagdaghan sa mga batang kombulsyonon anaa na sa mga katloan ka porsyento. Pataas na ug pataas ang gidaghanon sa mga mongolian. Ug kini nga mga kahuyang tungod sa pagpang-hybrid sa mga kalanonon nga atong ginakaon para mabuhi, mao'y nagapahuyang sa lawas, nga nagkahinungdan og kanser, mga problema sa utok, ug ang tanan na nga matang sa mga balatian nagasugod na sa pagsulod sa lawas sa tawo tungod sa kahuyang niini. Ang siyentipiko, ang mao'y nagadaut mismo kanila, ang pagpahilayo gikan sa plano sa Dios.

Miingon Siya, “Tugoti nga ang matag binhi magahatag og bunga ingon sa iyang matang.” Um-hum.

¹⁰² Nakita n'yo kung asa na kita? Mahimo kong mopadayon ug mopadayon; nagakaubos na ang atong oras. Apan, himatikdi, unsa man ang nagapahimong ingon niini? Ang siyensiya ang mao'y naghatud og kamatayon, balatian, ug kalaglagan.

¹⁰³ Ug akong nakita sa miaging adlaw, samtang nagpakig-istorya ko sa akong buutan nga higala, si Doctor Vayle nga nagalingkod dinhi, nga diin adunay usa ka artikulo nga ang mga tawo kono nangamatay gumikan sa penicillin. Sa tinuod dili ang penicillin, kondili ang hugaw kini nga gitugotan nilang makasulod ngadto niini sa dihang ginahimo nila ang penicillin. Usa kini ka pagpanguwarta, hinakog nga mga pamaagi. Ang mga doktor moreseto niini usahay nga wala man gani nakahibalo sa pormula sa usa ka aspirin, ug paadtoon sila sa ilang amahan aron magkuha og usa—usa ka espesyalista diha sa kung unsa mang butang, ug wala man gani nakahibalo kung unsaon sa pagtambal sa sakit sa tiyan sa usa ka bata. Apan unsa ma'y atong nakuha? Kahangol, mga pagpanglimbong, o usa ka gamay'ng alibyo. Halos wala na kanila kining kinaraan nga banwahanong doktor nga motagad gyud ug makig-istorya kanimo ug mohupay kanimo ug nga buhaton ang tanang butang. Giwala na nila ang Dios diha sa esena, tungod kay ang ila man kaugalingong paagi ang ilang gisunod. Aron nga mapawala nila ang Dios diha sa esena, palayo nila Siya nga gisaysay. Ingon niana kita.

¹⁰⁴ Mao kana ang atong nabuhat tungod sa pagpang-hybrid. Nakita n'yo, ang lawas... Unsa man ang nagapahimo nga himsog ang tanum, tungod ang kagaw nga halos dili makasulod niini. Ang kining mga tanum nga kinahanglan pang amumahon, gikinahanglan mong isprihan sa tanang panahon ang kining mga hybrid nga tanum. Ug daghan kaninyo ang nakabasa sa akong mensahe mahitungod sa *Hybrid nga Relihiyon*, padayon gyud kini nga ginaisprihan ug ginabebi-bebi ug—ug uban pa. Himatikdi, apan ang matuud gayud nga tanum dili kinahanglan nga isprihan, orihinal man gyud siya.

¹⁰⁵ Unsa ma'y makapahimo sa balatian nga makasulod sa lawas sa tawo? Mao'y tungod nga ang lawas... Ingon nga gikasultihan

ako sa usa ka bililhon nga higala kong doktor, nga dili ko buot nga hinganlan siya karon, apan usa siya ka maayo kaayo nga igsoon, nga bag-o lang niya gibasa kanako ang usa ka peryodiko pang-medisina, usa ka basahon sa iyang opisina nga diin didto niya ginatipig kining mga maayo nga basahon ug mga labing bag-o nga butang mahitungod sa medisina. Tungod kini sa kahuyang. Himatikdi ninyo ang si bisan kinsa nga . . . Pananglitan pag-nagkaluya ang imong lawas, dali kaayo ka sip-onon. Unsa man kini? Tungod kini sa kahuyang sa imong lawas nga mao'y nagapagawas og sip-on gikan sa imong mga glandula. Ug, dinha, mismo motaput ang kagaw sa sip-on ug aduna ka na dayon og sip-on. Pero kung lig-on kana nga lawas, ibalibag niini kanang kagaw sa sip-on, dili niya kini matakdan.

¹⁰⁶ Busa, nakita n'yo, sa diha nga gibuhath sa Dios ang tawo sa sugod pa lang, dili siya matakbuyan sa bisan unsa man nga sakit. Kita n'yo? Apan tungod sa pagkawalay-pagtoo ug siyensiya, ang siyensiya ug ang edukasyon mao ang unang butang nga nagpahilayo sa tawo gikan sa Dios, ug ginapahilayo siya niini sa gihapon.

¹⁰⁷ Tan-awa lang sa kung unsa ang gibuhath sa niining mga pagpanigarilyo ug mga pag-inom sa mga ilimnong makahubog, ug kining mga paghubohubo ug uban pa, giut-ut niini ang henerasyon. Tingali kanunay kamong natingala . . . Maghimo ko og usa ka pagpahayag dinhi. Dili ko unta ipahayag kini, apan nagtoo ko nga ako gyud ipahayag kini.

¹⁰⁸ Kita n'yo, matigala sila usahay, kanunay silang moingon kanako, "Igsoong Branham, unsa—unsa man ang nakapahimo kanimong sawayon ang mga butang nga sama niana? Wala nimo madungog kini . . . Pananglitan moadto ka sa iglesia sa usa ka tawo, aba, mahimo kong dal-on ang akong grupo sa mga kababayan-an ug dili gani sila maka-relaks sa paglingkod pagnagasulti ka na. Kanunay mo silang ginabadlong, bueno, mahitungod sa ilang mugbo nga buhok, ug mahitungod sa pagpanul-ob og mga bisti nga para sa lalaki, ug ang tanan na niining mga butang nga sama niana. Hoy, nganong ginabuhath mo man kana?" Karon ako—ako—ako . . .

¹⁰⁹ Mahimong mao na kini ang akong ulahi nga Mensahe hangtud sa sunod na nga ting-init, kabalo na mo, apan gusto ko nga sultihan kamo. Mao kini. Kini mao ang Espiritu sa pagpang-ila para sa niining kaulahiang mga adlaw, nga nahibalo nga usa kana ka tinunglo nga butang sa atubangan sa Dios. Maghunahuna lang ko usahay kung aduna ba ang usa ka ministro og unsa man nga pagpang-ila mahitungod sa kaulahiang mga adlaw? Ang mismong Dios nga nagasulti ibabaw sa entablado dinhi sa inyong mga kahintang ug sa kung unsay nabuhath ninyo, ug—ug sa kung unsa kamo sa umalabot, ug—ug kung unsa nga mga kalisdanan aduna kamo, kanang mao ra nga Espiritu sa sulod mo nagatan-aw ug makahimo sa

pag-ila sa mga ilhanan sa panahon, ug dili mapugngan Niini ang pagsinggit. Ang Espiritu kini sa pagpang-ila, tungod kay Siya Mismo nga Balaang Espiritu ang nagaingon nga kana nga butang sala, ug ang si bisan kinsa nga makig-ambit niini mamatay. Ug dayon unsaon ko man pagkahimo nga matarung diha sa panan-aw sa Dios, ug ingon nga makita ang akong mga igsoong babaye ug igsoong lalaki nga anaa sa nianang matang nga kahintang, kung dili ako magasinggit batok niini? Bisan pa man og mangasuko sila kanako, sa gihapon kinahanglan ko nga magasinggit batok niini. Kini mao'y pagpang-ila. Usahay molahi sila diha sa Pulong ug uban pa, ug nga kulang kini sa pagpang-ila. Pagduol og pamalandungi kini diha sa Pulong. Kita n'yo? Kita n'yo, kita—kita nahibalo nga husto kana. Bueno, kini, nahibalo kini nga mao kini ang kamatuoran. Kini mao ang pagpang-ila sa kaulahiang mga adlaw.

¹¹⁰ Karon nakita nato ang mahitungod sa siyensiya, ako—dili ko gustong maghigot og dugang pa bahin niana, ang akong oras paspas kaayo nga nagakaubos. Karon atong tan-awon pag-usab ang edukasyon ug hibaloon kung unsay gihimo niini. Kita n'yo? Karon aduna kita'y duha ka mga iglesia sa kinatibuk-an.

¹¹¹ Karon, atong nahibaloan nga mao kini kaniadto, nga kadto mao ang pagpangatarungan, sagad nga mga pagpangatarungan nga mao'y nagsugod sa pagpaligid sa bola sa sala didto sa sinugdanan. Sa unsa man kadto nga pagpangatarungan? Pagpangatarungan batok sa Pulong sa Dios. Sa dihang gisultihan sa Dios si Adan ug si Eva, “Sa adlaw nga kamo mokaon niini, kana nga adlaw kamo mamatay.” Igo na kadto, mao na kadto tanan. Ug Iyang gipanalipdan sila batok sa kaaway, luyo sa Iyang Pulong. Apan sa diha nga si Eva, naminaw sa mga pagpangatarungan ni Satanas, kita n'yo, sa mga kultura, kahibalo, edukasyon, mga kalambuan, kita n'yo, migawas siya gikan sa luyo didto, ug naminaw ngadto sa mga pagpangatarungan ni Satanas, ug gibuhat ang butang nga giingon sa Dios “ayaw buhata.” Ug kung ang usa ka pagpangatarungan, ang pagpaminaw sa usa ka pagpangatarungan batok sa Pulong naghinungdan sa tanan niini nga kagubot, dili ka mahimong ibalik ngadto sa maong kahintang kaniadto pinaagi sa usa na usab ka pagpangatarungan batok sa Pulong, tungod kay mamahimong daw sa unsa ka hangal ang Dios nga ibalik ang tawo didto basi sa mao rang kapasikaran nga gipagawas Niya siya gikan didto. Kita n'yo? Kita n'yo? Kinahanglan nga modangop ka ngadto sa inula nga Dugo ni Cristo. Ang imong denominasyon dili magpulos, ug ang imong mga pagpangatarungan dili magpulos. Kini mao ang Dugo ug ang pagkatawo pag-usab, ug mohimo Kini diha kanimo og usa ka bag-ong binuhat, si Cristo, ug nagakinabuhi ka nga subay na sa mga gawi ni Cristo, tungod kay ang Hilong-panambal nga imong giinom nagapakita nga

mopatay Kini og sala sa pagkawalay-pagtoo, batok sa bisan unsa man nga butang gawas sa Pulong sa Dios.

¹¹² Ang edukasyon nagahatag kanato . . . dinha . . . Adunay duha ka iglesia sa atong atubangan niining buntaga karon. Ang usa niini mao ang Iglesia sa Pentecostes nga gitukod kaniadtong Pentecostes pinaagi sa Balaang Espiritu; ang ikaduha mao ang iglesia sa Romano Katoliko nga naorganisa kaniadto didto sa Nicaea, sa Roma. Ang usa niini usa ka espirituhanon nga pagkahimugso; ang laing usa niini usa ka pang-intelektuwal nga pagpasakup. Nagagikan nianang iglesiaha ang tanang mga Protestante, ang tanang mga denominasyon. Mao kadto ang unang denominasyon. Ang tanang mga denominasyon nagagikan nianang iglesiaha ug may kalabutan diha niana, mao kana ang ginaingon sa Pinadayag 17, “Usa siya ka dautan nga babaye ug siya ang inahan sa mga bigaon.” Husto kana. Busa wala’y . . . Dili mahimong tawgon sa kaldero ingon nga grasahon ang takuri, kita n’yo, tungod kay kini, husto kini, ingon niana man kini. Nag-organisa kini, mao nga namatay kini, atua kini sa Roma. Dili ko igsapayan kung unsa pa man kini, patay kini! Ang Biblia, bag-o lang kitang nahuman bahin nianang mga kapanahonan sa iglesia, aron mapamatud-an kana. Pinasikad ang usa niini diha sa espirituhanong pagpang-ila; ug ang laing usa pinasikad sa pang-edukasyon ug pang-intelektuwal nga mga konsepto.

¹¹³ Karon, ginapabalik kita mismo niana didto sa Tanaman sa Eden pag-usab, pabalik mismo sa mao ra nga dapit. Ang babaye (ang iglesia) mao ang usa nga naminaw, dili si Adan, ang babaye gayud! Karon gusto nila nga mamahimong inahan nga iglesia, sige! Eksakto gyud. Wala gyu’y bisan unsa man nga wala sa panahon niini. Nagahimo sila og ila mismong mga pagpahayag, kita n’yo. Kita n’yo, balik diha mismo sa mao ra nga butang, ngadto sa dili pagtoo sa Pulong sa Dios! Didto sa Nicaea, sa Roma, sa dihang nahisgotan ang pangutana mahitungod sa bautismo sa tubig, mahitungod sa laing mga butang sama niana, ug mahitungod sa bautismo sa Balaang Espiritu, ang—bug-os nga giorganisa sa mga obispo ang gitawag nga iglesia sa Romano Katoliko, nga usa kaniadto ka “harianong” pang-Roma, mao’y tawag niini. Bag-o lang ako nahuman sa pagbasa sa maong kasaysayan kagahapon, ug nagapaminaw niini, nga gisusi kini pag-usab. Ug para lang gayud kadto sa Roma, anaa didto sa Roma ang pinaka-haring iglesia. Ang uban mao’y gagmay’ng kaigsoonan lamang nga mga iglesia niini, nga gitawag lang og Katoliko.

¹¹⁴ Ang atong Iglesia usa ka katoliko usab, pangkinatibuk-an nga Iglesia, nga mao’y usa—usa ka pangkinatibuk-an nga tinooan sa tanang mga magtotoo. Ang usa niini natawo diha sa Espiritu sa Dios ug adunay Balaang Espiritu sulod Niini, ug ginapamatud-an Niini diha sa iyang Kinabuhi, Doktrina, ug sa

buhat, nga anaa ang Balaang Espiritu sa sulod dinha, tungod kay Kini mao ang Maglilipay nga si Cristo—nga gisaad ni Cristo, nagapamuhat diha sa Iyang iglesia, ug nagapamuhat sa mao rang butang nga Iyang gibuhat sa sinugdan. Ingon niana kon giunsa pagpamuhat sa Hilong-panambal sa kaluwasan ni Cristo didto sa sinugdan, sa ingon nianang paagi Kini nagapamuhat sa karon, ginapamuhat ang mao rang butang.

¹¹⁵ Ang laing usa mao’y pang-intelektuwal nga konsepto lamang sa usa ka denominasyon nga hinimo sa usa ka grupo sa tawo, nga adunay “porma sa pagkadiosnon,” sama sa gisulti na kanato sa propeta, “ug ginalimod kining Gahum sa Kamatuoran” Karon, ingon niana ka klaro kini sama sa nahibaloan ko kung unsaon pagsaysay niini.

¹¹⁶ Karon, mao kana ang duha ka iglesia. Ang usa niini natawo didto sa Nicaea; ug ang laing usa natawo niadtong Pentecostes. Ug—ug ang usa sa kanunay gayud nga batok sa laing usa. Nahisgotan na nato ang kapanahonan sa iglesia sa pagpamatuod niini, nga ang usa batok gyud sa laing usa. Ang usa niini mao’y usa ka maayo, madungganon, intelektuwal nga iglesia nga may mga eskolar ug uban pa, ang laing usa giklasipikar ingon nga usa ka “pundok sa mga holy roller.” Mao kini kaniadto sa sinugdan, “mga hubog, dili kabalo mobasa nga mga mananagat,” ug mao ra usab kini sa karon, giklasipikar kini sa mao ra gihapon nga kategorya. Ang usa niini siyentipiko; ang laing usa usab espirituhanon. Ang usa may siyentipikong paghan-ay; ug ang laing usa usab espirituhanon nga pagpang-ila sa Pulong. Ang usa siyentipikanhong gihan-ay, sa kung unsay ginaingon sa mga grupo sa tawo, sa intelektuwal nga obispo. Ang laing usa usab bug-os gayud nga natawo sa Espiritu sa Dios, ug nga nagakinabuhi pinaagi sa Espiritu sa Dios, ug ginabuhat niini ug ginapahitabo niini ang mga Pulong nga gisaad sa Dios. Nagapakita lang sa kung unsa nga hilong-panambal ang inyong ginatumar. Pang-edukasyon ba nga hilong-panambal ang natumar n’yo? Hilong-panambal ba nga Balaang Espiritu ang natumar n’yo? Kita n’yo? Sige.

¹¹⁷ Oh, kanang pagkamalinglahon gayud ni Satanas! Daw sa unsa gayud nga mahimo niya ihulagway kana nga esena, nga sa intelektuwal nga paagi mahimo niyang ipatuyok ug ipatuyok ang usa ka tawong wala natawo diha sa Espiritu sa Dios! Ug wala’y paagi, sa intelektuwal, nga madaog mo sila niini. Wala gyu’y paagi.

¹¹⁸ Usa kini ka pagpang-ila pinaagi sa pagtoo, kita n’yo, usa ka pagpang-ila. Pagmakita nato kung unsay ginasulti sa Pulong, ginatoohan nato Kini.

¹¹⁹ “Dayon, Igsoong Branham, nagaingon sila nga aduna man kono sila og pagpang-ila.” Nan tugoti nga ang Balaang Espiritu maghimo sa eksakto gayud kung unsay Iyang gisaad nga

pagahimoon, dayon toohan nato kini. Kita n'yo? Mao kana ang kapanghimatuuran Niini.

¹²⁰ Giunsa man paglihok sa Hilong-panambal sa dihang miigo Kini sa tawo? “Kining mga ilhanan magauban kanila nga nagatoo,” miingon Siya. Kung ang Hilong-panambal miigo niana, nan husto lang kana. Kita n'yo? Busa nagadala sila kanato. . .

¹²¹ Nagadala kini kanato karon, diha sa pagtapos, sa sunod nga pipila ka mga minutos, busa nagadala kini kanato gikan kang Abel ug Cain, ngadto sa paghukom sa panahon ni Noe, gikan niadtong pinakasugod sa mga adlaw ni Noe. Karon, sa dili pa kita magkaaduna og linya sa pagpaampo, paminaw pagayo samtang pagahisgotan ko ang pipila ka mga Kasulatan dinhi diha sa usa ka gamay—usa ka gamay'ng teksto.

¹²² Nahibaloan nato nga human nga ang kalibutan naghimo sa iyang intelektuwal nga hunahuna bahin sa Pulong, kadto nga mga tawo nahimong inila nga mga tawo, bantugan nga mga tawo. Ang Biblia nagsulti sa ingon, diha sa Genesis 6:4. Bantugan nga mga tawo nga mangita og maanyag kaayo nga mga babaye ug ingon-anang mga butang, sama nga aduna kita sa tibuok kalibutan. Bag-o lang natong nahisgotan kini diha sa *Ang Pulang Mga Suga Nga Nagakidlap*, atong nahisgotan sa miaging gabii kung unsa nga ang mga kababayen-an mamahimong mas maanyag pa sa kaulahiang mga adlaw, kung unsa nga ang mga lalaki, bantugan nga mga lalaki, sama sa mga eskandalo didto sa Inglatera ug Estados Unidos. Ug padayon pa nga madiskubrehan kini usa sa niining mga adlaw. Kita n'yo, wala lang gyud mo mahibalo kung unsa ang mahitungod niining bigaon nga mga babaye ug tanang uban pa. Kita n'yo? Kabalo ba mo nga sa kada usa ka babaye nga anaa sa sekundarya o sa kolehiyo adunay tulo ka mga babaye nga nagatrabaho sa mga imnanan og mga ilimnon nga makahubog? Tulo ka mga babayeng nagatrabaho sa mga imnanan sa makahubog nga mga ilimnon sa kada usa ka babayeng anaa sa sekundarya o sa kolehiyo. Kabalo ba mo, kung pila ka porsyento, dili ko pa masulti kini tungod nga wala kini sa akong atubangan, wala ko lang gyud nasulat kini, apan hapit na sa ikatulo sa gidaghanon sa mga kabataan sa sekundarya sa tibuok nasud ang napamatud-an nga mga imoral o mga gipapauli na lang tungod nga nangaburo? Kabalo ba mo nga ang pag-inom og penicillin aron matangtang ang sakit nga nagagikan sa pakighilawas nagpasugod lamang og mga pagkadaut diha sa mga tawo, nga, kana nga sakit wala pa matangtang? Apan sa gihapon, kita n'yo, nag-ingon ang Dios nga moduwaw kini ngadto sa ikaupat nga kaliwatan. Nagpahinungdan kini sa mga Mongolian ug sa tanang uban pa, ug ang mga kabataan. . . Oh, daw sa unsa gayud ang sala, daw sa unsa gayud ka malinglahon kini! Daw sa unsa nga kining mga tawo, silang nga ministro mangtindog ug dili mowali batok sa

nianang mga paghubohubo diha sa kadalanan, ug tugotan pa sila nga magkanta diha sa choir, ug tanan na nga sama niana, ug tan-awa mao kana ang mismong butang nga naghatud sa atong nasud ngadto sa impiyerno, naghatud sa atong kaliwatan ngadto sa impiyerno. Husto kana. Busa atong nahibaloan karon nga human nga ang Dios napuno na niini, ingon nga nagatoo ako nga mao usab Siya karon. . .

¹²³ Karon paingon na ko sa akong teksto. Aduna ko'y talagsaon nga paagi sa pagdala og. . .Gusto kong magpadaghan usà og mga basihanang ug dayon hisgotan na ang akong teksto. Karon, nahibaloan nato nga sa kaniadtong mga adlaw ni Noe, sa diha nga pagahukman na sa Dios ang kalibutan, sa diha nga miabot na kaniadto sa punto nga sama niini karon, tungod kay miingon si Jesus nga ingon niini kaniadto, nagkahingawa ba Siya? Nagkahingawa ba gyud Siya? Siya, sa tinuod nagkahingawa Siya. Nagkahingawa Siya para sa unsa? Karon, human nga Iyang nahibaloan nga nagasingabot na ang paghukom, ug nga gipahayag na ang maong paghukom, nagkahingawa Siya alang niadtong mga nagkahingawa. Ug mao ra usab kini sa karon. Nagkahingawa Siya alang niadtong buot nagkahingawa. Ug atong nahibaloan nga nagpadala Siya kanila og usa ka propeta aron sa paggiya kanila, aron sa paggiya sa Iyang pinili nga mga tawo ngadto sa gikatagana nang pamaagi para sa ilang pagkalingkawas. Siya mao ra sa gihapon kagahapon, karon, ug hangtud sa kahangturan. Kita n'yo? Atong makita nga nagkahingawa gayud ang Dios para sa Iyang katawhan. [Blanko nga bahin sa teyp—Ed.]

¹²⁴ Ania na kita sa katapusan, ug atong makita gayud nga ania na kita sa katapusan! Dili puede nga magtukod pa ibabaw nianang kadunotan. Unsaon man nato sa pagtukod og siyudad ibabaw sa napaig na nga mga kagun-oban sa Sodoma ug Gomora? Unsaon man nato sa pagbuhat niini? Aduna na lamang og usa ka phoenix ang nahabilin, ug mao kana ang pag-abot ni Ginoong Jesus; oh, sus, usa ka pagpahinlo sulod sa tibuok panahon sa Kasakitan, aron ibalik ngadto sa kabag-ohan ang usa ka kalibutan, alang sa mga tawong matarung sa atubangan sa Dios ug nga nagkinabuhi pinaagi sa Iyang Pulong.

¹²⁵ Himatikdi, nagkahingawa Siya alang niadtong nagkahingawa nga makalingkawas didto sa mga adlaw ni Noe, ug nagpadala Siya kanila og usa ka propeta. Ug kini nga propeta naggiya kanila ngadto sa gikatagana nang pamaagi sa Dios. Karon, mao kana ang paagi sa Dios sa pagbuhat og mga butang. Kita n'yo? Ang Dios nagpakigsulti kang Noe, nga mao kaniadto ang Pulong (dili pa kadto ang sinulat nga Pulong), ug nagsulti kang Noe nga maghimo og usa ka arka alang sa pagluwas sa katawhan, ug aron sa pagpasidaan sa tanang mga tawo nga Siya aduna lamang og “usa ka paagi sa kaluwasan.” Ug kini nga tawo mao'y usa ka gipanghimatud-

an nga propeta kaniadto nga nagpamatuod kanila sa paagi sa paglingkawas. Himatikdi, ang mga mapainubsanon ug ang mga matinud-anon nagpatalinghug sa niini nga tawo ug mitoo kaniya, ug nga nakalingkawas sila. Nakalingkawas sila sa unsa? Sa kamatayon sa kalibutan nga puno sa kasal-anan nga gilaglag niadtong adlaw, milingkawas sila sa rota sa kamatayon nga napahimutang na kaniadto sa tibuok kalibutan. Nagkahingawa kaayo ang Dios! (Oh Dios, tabangi kini nga motuhop gayud karon, sa wala pa ang linya sa pagpaampo.) Nagkahingawa gayud ang Dios!

¹²⁶ Nagatan-aw Siya sa kalibutan karon, ug nagapanawag Siya ug nagapanawag Siya, ug ila usab ginasalikway ug ginabalibaran. Adunay kahigayonan kaniadto sa paghinulsol sa sinugdan. Sa diha nga misulti ang Dios kang Isaias nga moadto didto ug ibutang...sultihan si Ezechias nga kini mamatay na, naghinulsol si Ezechias ug aduna ang kalooy. Sa diha nga misulti ang Dios kang Jonas nga moadto ngadto sa Ninive ug nga magwali didto, tungod kay sulod sa kap-atan ka adlaw Iyang pagalaglagon ang maong siyudad, nanagtuaw sila alang sa kalooy ug aduna ang paghinulsol. Apan sa diha nga gisalikway nila kini, wala na'y nahibilin pa kondili ang paghukom! Ug gisalikway sa niining nasud si Cristo. Napakyas sila sa pagpatalinghug sa maong panawagan, busa wala na gayu'y nahibilin pa kondili atubangon ang paghukom.

¹²⁷ Karon, nagkahingawa ba ang Dios bahin niadtong mga nanaghinulsol? Naghimo ba Siya og usa ka paagi para kanila? Karon atong hibaloon kung unsay Iyang gihimo niadtong mga nangaging panahon.

¹²⁸ Sa panahon ni Noe, nagkahingawa Siya! Gipadala Niya ang maong propeta, ug Iyang—Iyang gihatud ang pamaagi ug Iyang gipakita kanila ang pamaagi, ug gihimoan Niya sila og paagi nga makalingkawas ug nakalingkawas gayud sila sa paghukom. Nagkahingawa usab Siya para kanila. Atong nahibaloan nga gidala Niya sila ngadto sa usa ka dapit kon diin Siya, sa kaulahiing mga adlaw, ngadto kon diin (ang tanan) sa dili pa moabot ang dakung paghukom, nagkahingawa kaayo Siya para kanila hangtud nga nag-andam Siya og usa ka paagi nga mahimong makasulod sila ug nga maluwas gikan sa tanang nagasingabot nga paghukom.

¹²⁹ Karon, gihimo Niya kana ngadto sa—sa mga Pinili. Karon, nahibalo kita niana. Gihimo Niya kana ngadto sa mga Pinili, sa mga Pinili lamang, ha! Sila ang mga nakadawat niining binhi sa Kinabuhi. Sila ang mga pinili nang daan nga makakita niini. Mao gayud sila. Kitang tanan, kung nagatoo kita sa Biblia, kinahanglan motoo kita sa predestinasyon. Kita n'yo? Husto kana. Dili igatugot sa Dios nga mag-antus ang si bisan kinsa, apan nahibalo Siya kung kinsa ang magadawat Niini ug kinsa ang dili.

¹³⁰ Nagkahingawa usab Siya alang sa Iyang pinili nga mga tawo niadtong mga adlaw sa kalaglagan didto sa Egipto. Atua sila kaniadto sa Egipto ug nangahimong mga ulipon. Sa mga adlaw ni Moises, nagkahingawa usab Siya alang sa maong mga tawo. Nagpadala Siya kanila og unsa man? Usa ka propeta, pag-usab. Husto ba kana? Ug gipahimulag Niya ang Iyang katawhan gikan sa mga dili-magtotoo nga kalibutan, gikan sa nagsingabot nga paghukom niadto nga adlaw. Gibuhat ba Niya kadto? Nagkahingawa Siya sa diha nga ang Egipto nagkatipun-og ang ilang mga sala sa hilabihan kaayo hangtud nga gikinahanglan na sa Dios nga mopadala og paghukom, tungod kay gisuginlan naman Niya si Abraham, “Ug Akong pagahukman kana nga nasud.” Busa imbis nga igabubo Niya ang Iyang kapungot ngadto kanilang tanan, gipadala hinoon Niya ang Iyang kahingawa ngadto kanila. Gipadala Niya ang Iyang Maglilipay ngadto kanila. Gipadala Niya ang Iyang Pulong ngadto kanila. Ug kanunay Niya nga ginapadala ang Iyang Pulong pinaagi sa Iyang propeta, sama sa Iyang gihimo sa panahon ni Noe. Gihimo Niya ang mao rang butang sa mga adlaw ni Noe. Sa mga adlaw ni Eli- . . . ni Moises, nahibaloan nato nga gibuhat Niya ang mao ra nga butang. Gipadala Niya kanila ang Iyang propeta, ug gipahimulag nila ang ilang mga kaugalingon gikan sa pagkawalay-pagtoo. Karon, mao kadto nga matang ang mga migula. Mao kadto nga matang ang mga mitoo Niini. Mitoo sila kang Moises, nga siya usa ka . . . Sa atubangan ni Faraon, usa siya ka panatiko, usa siya ka salamangkero, usa siya ka tigpakaaron-ingnon, usa siya ka butang nga makalilisang. Apan ngadto sa mga tawo nga pinili, nga ninggawas sumala sa Pulong sa Dios, (“Dal-on Ko sila pagawas”), usa siya ka propeta ngadto kanila. Siya kaniadto ang gikatagana nang pamaagi sa Dios. Ug siya usab . . . Himatikdi, mitoo sila kaniya ug nakalingkawas sa paghukom alang niadto nga adlaw. Mitoo gayud sila kang Moises.

¹³¹ Ug miigon Siya nga nagkahingawa usab Siya alang kanila aron nga mapahigawas sila, ug nagkahingawa Siya para kanila didto sa panaw human nga sila nahigawas na. Amen. Ingon nga anaa kini kaniadto sa pisikal, kini karon ania sa espirituhanon nga kahimtang. Nagkahingawa gayud Siya! Ngano man? Gihatag Niya ang tanan nga gikinahanglan nila samtang atua sila sa ilang panaw. Gibuhat ba Niya? Giayo Niya sila sa diha nga sila nagmasakiton. Naghatag Siya og pagkaayo, naghatag Siya og paagi alang sa ilang balatian. Naghatag Siya og usa—usa ka tumbaga nga bitin, nga mahimo nilang tan-awon kadtong tumbaga nga bitin, nga usa ka simbolo sa sala, ug mamaayo na. Gipakaon Niya sila samtang atua sila sa dalan, kon diin nga wala sila’y tinapay nagpaulan Siya kaniadto og tinapay gikan sa Kalangitan. Gipakaon Niya sila. Dili lamang kana, kondili Iyang gibistihan usab sila, sa pagpakita nga may kahangawa Siya alang niadtong mga nagkahingawa.

¹³² Kung andam sila nga mosugid ug maghinulsol ug motoo ug modawat, nagakahingawa ang Dios! Apan kinahanglan magkahingawa usà ka, kinahanglan nimo nga dawaton kung unsay Iyang gipadala kanimo. Nagkahingawa gayud Siya para kanila nga makasigurado gyud sila nga wala’y mahimong sayup, gipanghimatud-an Niya ang Iyang propeta pinaagi sa ilhanan sa usa ka Haligi nga Kalayo, aron nga makita sa mga tawo nga dili lamang kadto usa ka tawo nga nagalakaw-lakaw dinhi, nga ang Dios mismo kadto sa ibabaw niya, Siya mao ang Usa nga nagagiya sa kadalanan. Nagakahingawa ang Dios para sa mga tawo nga nagakahingawa. Nagakahingawa ang Dios alang niadtong mga nagakahingawa para Kaniya. Busa Iyang gipanghimatud-an kini nga tawo ug gipamatud-an nga siya alagad sa Dios, pinaagi sa pagpadala kanila og usa ka Haligi nga Kalayo aron sa paggiya kanila ngadto sa maong yuta. Ug nahibalo sila nga samtang nga kining ilhanan sa niining Kalayo, ang Haligi nga Panganod ug Kalayo nagauban kanila . . . Miingon Siya nga “Wala Niya gikuha ang Haligi nga Kalayo ug Panganod.” Atua gyud Siya uban kanila sa pila ka tuig ug mga tuig didto sa kamingawan, kuwarenta ka tuig. Husto ba kana? Gipangunahan sila niadtong Haligi nga Kalayo! Ania na kita sa atong ika trayntay-tres ka tuig, nga pito na lang ka tuig ang nahabilin ug motipo na kini nga pareho ra. Bueno, usa ka Haligi nga Kalayo ang naggiya kanila. Nagkahingawa Siya para kanila. Ug nga nagkahingawa kaayo Siya para kanila hangtud nga Iya gayud gipahibalo kanila nga—nga dili kadto usa ka siyentipikong butang, dili kadto nga nasayup lang, apan Iyang gipanghimatud-an ang maong Mensahe, ginapamatud-an Kini.

¹³³ Nagkahingawa Siya kaayo bisan gani sa usa ka babayeng taga-gawas, nga dili usa ka Israelita. Dili siya apil sa grupo, apan taga-gawas siya, Presbyterian, Methodist, o unsa man, atua siya sa pikas bahin. Apan sa diha nga nadungog niya! Ang iyang ngalan mao si Rahab, nagakinabuhi siya nga . . . usa siya ka bigaon. Apan sa diha nga nadungog niya kung unsa nga ang Dios atua sa Haligi nga Kalayo ug nga nagagiya sa mga Israelinhon, miingon siya nga . . . nagtawag ngadto sa Dios, ug nagpakita siya og kalooy ngadto sa mga tigpaniid nga miadto didto aron magpaniid sa lugar. Ug tungod kay nagkahingawa siya sa iyang kaugalingon ug sa iyang mga kabanay, nagkahingawa usab ang Dios para kaniya. Nga tungod niana ihatag sa maong bigaon ang iyang kinabuhi ngadto kang Cristo, ngadto sa Katuyoan, tungod kay nakita niya ang ilhanan sa usa ka Supernatural nga Dios, ug nag-alagad siya kaniadto sa iyang mga diosdios diha sa iya mismong denominasyon. Apan sa diha nga nakita niya kining dakung Supernatural nga ilhanan, mituaw siya ug mihangyo og kalooy, ug kalooy nga para sa iyang pamilya, ug nagkahingawa kaayo ang Dios para kaniya sa diha nga nalumpag gayud ang tibuk siyudad, nangapatong ang usa ibabaw sa usa pa, pero wala’y ni usa ka bato ang miilog diha sa

iyang balay. Nagakahingawa Siya! Bisan pa og taga-gawas siya, wala siya kaniadto sa maong grupo niadtong panahona, apan nagkahingawa ang Dios. Nagakahingawa Siya sa kanunay.

Nagkahingawa Siya para kang Elias sa diha nga siya, ug siya lamang, ang nagkahingawa para sa Dios.

¹³⁴ Alleluyah! Sa ingon nianang punto kini gapaingon. “Itugyan ngadto Kaniya ang inyong mga kabalaka, kay Siya may kahangawa man alang kaninyo.” Si Pedro, nga nagapakigsulti ngadto sa piniling mga anciano, sa mga anciano ug kanila diha sa iglesia, miingon siya, “Idangop ngadto Kaniya ang inyong mga kabalaka, tungod kay nagakahingawa Siya alang kaninyo. Idangop ang tanan dinha, tungod kay hinlo man kamo sa atubangan sa Dios. Kamo—nagakinabuhi kamo ingon nga mga alagad sa Dios.”

¹³⁵ Nagkahingawa ang Dios kang Elias tungod kay si Elias nagkahingawa man alang sa Dios. Ang tanang ubang mga magwawali kaniadto nawala kanila ang panan-awon bahin niadtong panahona, nawala kanila ang kababut-on sa Dios ug ang gugma sa Iyang Pulong, ug ang tanan nangahimo nang moderno. Apan bisan kung giunsa pa ni Jezabel paghimo kanilang moderno, ang unang ginang sa nasud, bisan kung giunsa pa pagtugot niadtong ubang mga magwawali ang ilang mga kababayan-an diha sa mga pagpanglihok ug mga pagbuhat niini. Nagsinggit si Elias batok niini, sa Ngalan sa Ginoo. Nagkahingawa siya alang sa kung unsay gisulti sa Dios, ug nagkahingawa ang Dios ngadto sa mga gisulti ni Elias kaniadto, tungod kay gisulti man niya ang Pulong sa Ginoo. Nagakahingawa ang Dios kung ikaw nagakahingawa, apan kinahanglan una ikaw nga magkahingawa. Oo.

¹³⁶ Himatikdi, nagkahingawa Siya sa diha nga gitawag Niya si Elias, pinaagi sa Iyang Pulong, palayo sa mga denominasyon. Daw sa mahimo siyang magutman na kaniadto ug mamatay, tungod kay wala na ma’y ikapulo ug mga halad nga nagaabot kaniya. Apan nagkahingawa gayud Siya kang Elias, wala Niya gitugotan nga magutman siya sa panahon nga siya nagatuman sa Pulong sa Dios. Gimandoan Niya ang mga uwak aron sa pagpakaon kaniya. Nagkahingawa Siya kang Elias tungod kay nagkahingawa man si Elias alang Kaniya, ug Siya mao ang Pulong.

¹³⁷ Nagkahingawa Siya kaniadto kang Daniel sa diha nga nagkahingawa si Daniel alang sa Pulong sa Dios sa igo gayud nga matinuuron siyang moampo. Bisan unsa pa’y giingon sa hari, “Dili ko gusto nga buhaton pa kana utro,” giablihan mismo ni Elias ang mga takop sa bintana ug miatubang ngadto sa Jerusalem ug nag-ampo. Nagkahingawa si Elias alang sa Dios, ug—ug ang Dios nagkahingawa alang kang Elias. Nagkahingawa si Daniel alang sa Pulong sa Dios, ug nagkahingawa ang

Dios alang kang Elias. Nagpadala Siya og Haligi nga Kalayo nga nagpahadlok niadtong leon palayo kaniya ug nagpabilin sa tibuok gabii didto. Nagkahingawa ang Dios tungod kay nagkahingawa man si Daniel. Oo, sir. Matinuuron nga nag-ampo, bisan nahibalo nga nagakahulogan kadto nga mahimo siyang itambog ngadto sa langub sa leon kung iyang supakon ang maong denominasyong mga sugo. Apan miluhod siya didto duol sa tamboanan, nga wala nagkahadlok sa kung unsa'y isulti sa tawo. Giablihan niya'g daku ang mga tamboanan tungod kay mao man ang sugo sa Dios, ug nag-ampo siya nga matinuuron ug matinud-anon gayud ngadto sa Iyang Dios sa matag adlaw. Nagkahingawa siya alang sa Dios ug sa Iyang kasugoan, ug miatubang ang Dios, ug nagkahingawa alang kang Daniel ug sa iyang katungdanan, sa iyang baroganan. Nagkahingawa si Daniel alang sa Dios ug sa Iyang Pulong, ug nagkahingawa ang Dios alang kang Daniel ug sa iyang pagbarog alang sa Pulong. Iyang pagabuhaton kini sa matag higayon. Amen.

¹³⁸ Nagkahingawa Siya alang sa mga anak nga mga Hebreohanon sa diha nga sila matinuuron nga nagtahod ug nagkahingawa alang sa tinoohan nga sa makausa gitugyan ngadto kanila, ang Pulong sa Dios. Nagkahingawa kaayo Siya para kanila hangtud nga sa dihang ila nang gihuyop ang trumpeta... Aduna sila og usa ka sugo gikan sa Dios, "Ayaw kamo pagyukbo atubangan sa bisan unsang pagano nga diosdios, sa bisan unsa nga mga rebulto. Ayaw kamo pagyukbo ug ayaw kamo pagsimba kanila." Mao kadto ang kasugoan. Ug sa diha nga gipatingog na sa mga pagano ang trumpeta ug miingon "igatambog namo ngadto sa hudno ang kadtong dili magyukbo," nagkahingawa kaayo sila hangtud nga gitalikdan nila ang rebulto. Husto kana. Nagkahingawa kaayo ang Dios para kanila, nga sa dihang gipainit na kadto, gipadala Niya ang ikaupat nga Tawo ngadto didto sulod sa hudno nga nagakalayo ug gibantayan nga dili sila mainitan. Nagkahingawa Siya tungod kay nagkahingawa man sila.

¹³⁹ Kung gusto ninyo nga manghawid ngadto sa kredo, dili magkahingawa ang Dios kung unsa ma'y buhaton ninyo. Kung gusto ninyo buhaton kana, dili gayud Siya magkahingawa kaninyo, tungod kay kamo nagabuhat man sa kung unsay gisulti sa tawo. Apan kung kamo manghawid ngadto sa Pulong sa Dios, sa inyong matinud-anon nga pagsugid ug motoo nga ang Dios usa ka Mananambal, ang mao ra sa gihapon kagahapon, karon, ug hangtud sa kahangturan, magkahingawa gayud Siya alang kaninyo.

¹⁴⁰ Nagkahingawa Siya kaniadto, nagkahingawa Siya alang sa mga anak nga mga Hebreohanon, ug gipadala Niya kanila ang ikaupat nga Lalaki aron sa pagluwas kanila, nga mao si Cristo. Nahibalo kita niana.

¹⁴¹ Sa diha nga mingtuaw ang sanlahon, "Ginoo!" Ang napulo ka

mga sanlahon minggula ug matinuuron nga mingtuaw, “Ginoo, kaloy-i kami.” Aduna na sila og igo aron magkahingawa para sa mismong panginahanglan nila, aduna Siya’y gahum aron atimanon sila. Nagkahingawa Siya alang sa sanlahon tungod kay nagkahingawa man ang mga sanlahon sa paghimo sa ilang mga pagsugid, nagtawag Kaniya “Ginoo!”

¹⁴² Nagkahingawa Siya, sa dihang nagkahingawa gayud ang kapitan sa iyang kaugalingon aron sa pagpasugo og tabang nga gikan kang Jesus. Sa diha nga ang kapitan nag-...nagpakita sa iyang pagtoo, gisalikway ang iyang mga diosdios sa Roma, ug nagkahingawa gayud (pinaagi sa dayag nga pagpahayag) aron magsugo para hangyoon Siya nga moadto ug ayohon ang iyang anak nga lalaki, nagkahingawa gayud si Jesus aron nga adtoan ug ayohon siya. Nagakahingawa Siya sa diha nga ikaw nagakahingawa. Kinahanglan mo una nga magkahingawa, bisan pa. Nagkahingawa Siya.

¹⁴³ Nagkahingawa Siya sa diha nga nagkahingawa gayud si Jairo mahitungod kang Jesus. Usa siya ka magtotoo sa tago lang. Nagtoo siya nga husto si Jesus, apan tungod sa iyang denominasyonhong baroganan dili niya mahimo ang magpaila ug magsugid niini, apan sa diha nga nagmasakiton ug namatay ang iyang gamay’ng anak nga babaye, nahibalo si Jairo, samtang nagatan-aw siya sa kamatayon sa iyang anak nga babaye, o aron nga maipahayag ang iyang pagkahingawa, nagkahingawa gayud siya og ayo nga wala niya gipanumbaling ang mga dili-magtotoo nga atua sa palibot niya, ug gisul-ob ang iyang gamay’ng kalo pang-ministro, ug milakaw ug gipangita si Jesus. Sa diha nga nagpakita si Jairo nga nagkahingawa siya, nagpakita si Jesus nga nagkahingawa usab Siya sa ingon ka igo nga moadto Siya ug bangonon ang maong bata gikan sa mga patay. Itugyan ngadto Kaniya ang inyong mga kabalaka, kay Siya nagakahingawa! Bisan unsa pa man kini, nagakahingawa Siya!

¹⁴⁴ Nagkahingawa Siya bisan nga wala ni usa ka kasugoan bahin niadto, walay bisan unsa nga nasulti, wala gayud Siya may gisangpit bahin niadto, apan nagkahingawa Siya tungod kay ang makaluluoy’ng babaye nga dili man lang makasulod didto sa linya sa pagpaampo, ug miingon ang maong babaye, “Kung mahikap ko lang unta ang borlas sa Iyang bisti, nagatoo ako gayud Kaniya.” Nagkahingawa si Jesus tungod sa iyang pagtooniana, nga tungod niadto milingi Siya ug gitawag ang maong babaye gikan sa mga tawong atua didto, ug gisultihan Niya kini nga ang iyang pagtoo mao’y nagpaayo kaniya. Nagkahingawa Siya tungod kay ang babaye nagkahingawa man.

¹⁴⁵ Nagkahingawa Siya sa diha nga ang buang nga si Legion nagkahingawa gayud, bisan nga may mga pagbabag, aron lang makagawas gikan niadtong mga lapida sa mga yawa ug makaadto aron sa pagsugat kang Jesus, ug miyukbo sa iyang kaugalingon. Sa diha nga, si Legion! Dili gyud unta moadto

didto ang mga yawa kung wala gipugos ni Legion ang iyang kaugalingon nga makagawas didto aron sa pagsugat Kaniya. Ug sa diha nga nagkahingawa gayud siya aron himoon kadto nga pagpanglimbasug, kadto nga pagbarug sa iyang hugot nga pagtoo, nagkahingawa usab si Jesus aron pagulaon kadtong daghan kaayong mga yawa pagawas gikan kaniya, ug nawala na ang iyang pagkabuang. Nagakahingawa Siya sa diha nga kamo magkahingawa. Oo, sir. Nagakahingawa Siya pagkamo nagakahingawa.

¹⁴⁶ Karon, sa diha nga ang tawong buta misinggit didto sa ganghaan sa Jerico, “Oh Jesus!” Ingon nga usa ka Judio, Orthodox, may maayong dungog didto sa sinagoga. Apan sa diha nga miingon siya, “Unsa man kana nga kasaba?”

Miingon sila, “Miagi si Jesus nga Nazarenon, usa ka Propeta.”

¹⁴⁷ Miingon, “Jesus, Anak ni David!” Oh, daw sa unsa kadto nga pagsaway sa iyang pastor ug sa mga pari nga nagatindog didto. Apan wala niya igsapayan kung unsa ma’y gisulti sa pastor, sa pari, o ni bisan kinsa, interesado gayud siya! Ug nagkahingawa gayud siya nga mahibalik ang iyang panan-aw, busa misinggit siya! Ug sa dihang andam na kadtong maong buta, ug may igo siyang kahingawa aron mosinggit, may igo usab nga kahingawa si Jesus aron ayohon siya. Siya mao ra sa gihapon kagahapon, karon, ug hangtud sa kahangturan! Nagakahingawa Siya sa diha nga kamo nagakahingawa, apan kinahanglan n’yo una nga magkahingawa. Kinahanglan ninyong pamatud-an nga nagakahingawa kamo.

¹⁴⁸ May kahangawa gayud Siya hangtud nga sa dihang ang usa ka babaye, nga nakigpuyo sa unom ka lalaki, nakaila ug nakahibalo ug nailhan ang Iyang pang-Mesias nga ilhanan sa pagpang-ila, may igo Siyang pagkahingawa hangtud nga gipasaylo Niya ang matag kalapasan ug gihatagan Niya kini og tubig nga dili mao ang giadto niini aron magtimba, tungod nga kini nakaila. Miingon siya, “Sir, naila ko nga Ikaw usa ka propeta,” sa diha nga Iyang gisulti kaniya kung unsay sayup kaniya. Ug sila, nagpaabot ang maong babaye alang nianang adlaw nga moabot, ang problema lang nga nahiapil siya niining mga pagpasakup sa iglesia, wala siya’y kahigayonan nga mabuhat kadto. Apan sa diha nga nakita niya ang usa ka Tawo Nga makasulti kaniya kung unsay sayup diha kaniya, miingon siya, “Sir, naila ko nga Ikaw usa ka propeta. Nasayod ako nga pagmoabot na ang Mesias pagabuhaton Niya kining mga butanga.”

Miingon Siya, “Ako mao Siya.”

¹⁴⁹ Igo na kadto! Nagkahingawa siya. Gibiyaan niya ang iyang banga, ug miadto siya sa siyudad, ug miingon siya, “Umari kamo tan-awa ninyo ang usa ka Tawo Nga nagsulti kanako

sa mga butang nga nabuhat ko. Dili ba kini mao mismo ang Mesias?” Daw sama siya ni Rahab, nagkahingawa siya hangtud nga iyang gialarma ang tibuok siyudad. Nagkahingawa siya tungod sa usa ka butang nga nahimo, ang gipanghimatud-an nga Kasulatan napahituman ug positibo gayud nga napamatud-an, ug nagkahingawa siya! Wala niya igsapayan kung unsay gisulti sa mga tawo o unsay gisulti ni bisan kinsa; nakita niya Kini, atua siya mismo didto sa dihang nahitabo kadto. Nagkahingawa siya. Ug nagkahingawa siya alang sa iyang mga kabanay hangtud nga gisuginlan niya ang matag usa kanila, ug naghinungdan kadto para sa tibuok siyudad nga motoo kang Jesus Cristo. Nagkahingawa siya, ug nagkahingawa si Jesus. Sa pagkatinuod, nagkahingawa gayud Siya.

¹⁵⁰ Nagkahingawa gayud si Jesus alang sa Mensahe para sa niining panahon aron ipahitabo kining mao ra nga mga butang ingon nga gisulti na Niya, hangtud nga namatay Siya ug nabanhaw pag-usab aron ipadala ang mga niini pinaagi sa Balaang Espiritu, ang Maglilipay, aron ipakita ang Iyang ministerio karon nga sa gihapon buhi Siya. Nagkahingawa gayud siya. Dili ba kita magkahingawa? Mao kana ang pangutana, dili ba kita magkahingawa? Namatay Siya alang niini nga ministerio. Namatay Siya aron nga ang Balaang Espiritu maania niining panahon aron ipakita kining mga butanga. Nagkahingawa Siya para kanimo. Nagkahingawa Siya aron sa pagdala Niini dinhi. Nagkahingawa Siya aron himoon ang maong mga pagpahayag. Nagkahingawa Siya tungod kay Siya nahigugma kaninyo. Nagkahingawa gayud Siya aron buhaton kini, ang pagpadala sa Balaang Espiritu para niini, ipahigayon kini nga ministerio sa karon.

¹⁵¹ Ingon niana kung giunsa Niya pagpamatuod nga nagkahingawa Siya niadto nga adlaw, tungod kay miabot Siya aron panghimatud-an kung unsay gisulti sa Dios sa kung unsa Siya. Mao kana’y hinungdan nga ang babaye nakaila Kaniya. Miingon siya, “Nasayod ako nga pagmoabot na ang Mesias, usa Siya ka propeta. Pagmoabot na ang Mesias, magasaysay Siya kanamo niining mga butanga.” Kita n’yo, nagkahingawa gayud Siya mahitungod sa Pulong sa Dios nga mapanghimatud-an Kini ngadto sa maong babaye. Amen.

¹⁵² Karon gipadala Niya ang Espiritu Santo, nga sa niining panahon sa intelektuwal nga mga pagpanghunahuna, nga pinaagi sa Balaang Espiritu mahimong mapamatud-an Niya nganhi kanato nga Siya sa gihapon mao ang Mesias, pamatud-an kini sa mao ra nga paagi. Siya mao ra sa gihapon kagahapon, karon, ug hangtud sa kahangturan. Ang pangutana karon mao’y, nagkahingawa ba kamo? Unsa ma’y hunahuna ninyo mahitungod niini? Ania na kini. Makadaghan na nga napamatud-an Kini. May igo ba kamong kahingawa aron toohan Kini? May igo ba kamong kahingawa sa pagsugid sa inyong mga

sala, nga sayup kamo? Nga isugid ang inyong mga kawalay-pagtoo ug dawaton kini. Aduna ba mo'y igong kahingawa aron dawaton kini? May igo Siyang kahingawa aron mamatay ug mabanhaw pag-usab, aron maihatud kini kaninyo. May igo ba mong kahingawa aron dawaton kini. Sa tan-aw ko human na gyud kining napamatud-an, gikan sa panahon ni Noe, gikan pa sa sinugdanan didto sa Genesis hangtud karon. Wala na kita'y oras sa paghisgot niining tanan. Apan makita n'yo nga nagakahingawa Siya, ug namatay Siya aron kamo magkahingawa, nga magkaaduna kamo'y paagi. Ug gihatud Niya kana nga paagi. Eksaktong giingon na Niya kung unsay mahimong buhaton sa nianang paagi, mahimo niining buhaton, ug karon ania Siya sa karong panahon nga ginapakita nga mao kini ang Kamatuoran. Karon, sa niining dautan nga takna nga atong gikapuy-an, aduna ba mo'y igong kahingawa mahitungod niini, diha sa tibuok ninyong kasingkasing, aron toohan kini?

¹⁵³ Bisan pa kon makaapil kamo diha sa linya sa pagpaampo o unsa man kini, dili kana mao, nagakahingawa ka ba gayud? Itugyan ninyo ang inyong mga kabalaka ngadto Kaniya, nagakahingawa Siya alang kaninyo. Magmatinuuron bahin niini. Magkahingawa gayud nga may pagkamatinuuron, tungod kay napamatud-an na Niya pinaagi sa Iyang usa ka-gipanghimatud-an nga Pulong nga nagakahingawa Siya. Nagsaad Siya nga ihatud Niya Kini, gituman na Niya kini! Nagsaad Siya diha sa Pulong, ania na Kini! Nagakahingawa Siya, karon kamo sa inyong kabahin? Kini, kinahanglan ninyo nga magkahingawa, sa sunod.

¹⁵⁴ Nagkahingawa gayud Siya, nagkahingawa gayud Siya sa pagbuntog sa matag kaaway alang kanimo, nga ang buhaton mo lamang mao ang magmatinuuron ug toohan kini. Gidaog na Niya ang kamatayon. Dili ko na kinahanglan nga buntogon pa ang kamatayon; human na kini nga nabuntog. Dili ko na kinahanglan pa nga buntogon ang balatian; dili na kinahanglan pa ni Cristo nga buntogon kini; human na kini nga nabuntog. Kinahanglan ko lang nga magkahingawa gayud aron toohan kini. Nahadlok ka ba sa kung unsay gisulti sa laing tawo kanimo? Nahadlok ka ba sa panghiling sa doktor? Nahadlok ka ba sa kung unsay isulti sa iglesia kanimo? Nahadlok ka ba makigharong, sa yawa? Moingon, "Gisugid ko na ang akong mga sala, gitalikdan ko na ang tanang butang. Gitooan ko ang matag Pulong. Ania ako, Ginoo. Buhatan mo ako og usa ka pagkahingawa. Ako. . . May kahangawa Ikaw alang kanako, nagakahingawa ako alang Kanimo."

¹⁵⁵ Madumduman ko kanang karaang kanta nga puno sa grasya, "Nagakahingawa Siya alang kanimo. Sa kalipay o sa kasubanan man, nagakahingawa Siya kanimo."

Atong iduko ang atong mga ulo karon, dili na kita mahimong mopadayon pa.

He careth for you,
 He careth for you;
 Throuhg sunshine or shadow,
 He careth for you.

Kantahon nato kini ngadto Kaniya, samtang nagaduko ang atong nga mga ulo, ug ang atong kasingkasing.

He careth for . . .

Atong tan-won ang tanan Niya nga gibuhat.

He careth for you,
 Through sunshine or shadow,
 He careth for you.

He care . . .

Karon, kung nagakahingawa kamo, ipataas ang inyong kamot samtang ginakanta ninyo kana.

He careth for you;
 Through sunshine or shadow,
 He careth for you.

¹⁵⁶ Langitnong Amahan, sa niini nga higayon sa ulahing takna sa adlaw, nagahimo kami og mga pagsugid gikan sa kinahiladman sa among kasingkasing, nga nasayran namo karon pinaagi sa Pulong nga kanunay Kang nagkahingawa alang sa mga Imoha. Apan ang problema, Ginoo, nagakahingawa ba kami? Gusto lang ba namo nga makaangkon og edukasyon, moingon, “Bueno, aduna ako’y pangdoktor nga digri, o—o LL.D.”? Kana’y *paghibalo* lamang sa Reseta, ug dili kana’y pagtumar Niini.

¹⁵⁷ Dios, ginaampo ko karon nga pagadawaton sa matag usa kanamo ang mga kasub-anan ni Cristo pasulod sa among kasingkasing, dawaton namo ang Iyang mga pag-antus, sa pag-amgo nga kinahanglan usab namo pagaantuson ang kaulawan tungod sa Iyang Ngalan, nga kinahanglan kaming mag-antus. Ug mahisama unta kami sa mga tinun-an kaniadto, nga sa pagbalik, nagakalipay kami nga naapil sa kadtong mga nahatagan og pribilehiyo aron sa pagpas-an sa kaulawan tungod sa Iyang Ngalan. Itugot kini, Amahan.

¹⁵⁸ Magaampo ako alang sa mga masakiton, Ginoo, magapandong og mga kamot nganha kanila. Gipataas nila ang ilang mga kamot, daghan kanila, ug daghan ang igaampo, ug nagakupot og mga prayer card. Ug ania ang uban dinhi nga wala makaapas para makakuha og mga prayer card sa pagpaampo, apan sila—sila—magatoo sila, Ginoo. Daw sa ipataas nila ang ilang mga kamot, mora’g ingon-ana, sa tan-aw ko, kining tibuok kongregasyon. Daghan kanila ang mga masakiton. Ania kining mga panyo nga nakapahimutang dinhi, nagabati sa Imong Balaanon nga Presensiya pinaagi sa

dinihogan nga Pulong, ayoha sila, Ginoo. Itugot nga matubag ang ilang mga paghangyo.

¹⁵⁹ Ug karon gikan sa mga panyo, ngadto sa mga mananambong, ngadto sa mga tawo nga nagalingkod dinha nga nagaantus. Oh, ang Presensiya sa Ginoo, itugot nga moanhi Kini, Amahan, ug ayoha silang tanan. Mahimo Mo ba, niining buntaga sa Balaanon nga grasya, sa diha nga ginasugid namo, Ginoo. . .? Ako nga alagad Mo, akong ginasugid ang akong pagkawalay-kapasidad. Wala ako ni usa ka butang, Ginoo, nga mahimo kong ipresentar nganha Kanimo ingon nga usa ka nahimo ko. Dili kami takus. Walay bisan usa kanamo ang makahimo niana, Ginoo. Dili kami takus alang sa mga butang nga pagapangayoon namo. Apan, Ginoo, nasayod kami nga si Jesus miadto, mikayab ngadto sa Himaya, ug didto nagaandam og usa ka dapit nga pagaadtoan ug aron dawaton kami ngadto sa Iyang Kaugalingon. Ug nagsulti Siya kanamo nga magpadala Siya kanamo og usa ka Maglilipay, nga mao ang Balaang Espiritu, ug pagabuhaton Niya ang Iyang buluhaton ug nga magpabilin kanamo sa walay katapusan.

¹⁶⁰ Oh Balaang Espiritu, Espiritu sa Dios, duol pag-usab nganhi kanamo niining buntaga, ug panghimatud-i ang Imong Presensiya, Ginoo, diha sa mao rang paagi nga Imong gibuhat sa diha nga naglakaw Ka pa kaniadto dinhi ibabaw sa yuta, aron mahibaloan sa niining mga mananambong nga ania Ka karon niining kaulahiing mga adlaw aron panghimatud-an ang Imong Pulong, ug aron pamatud-an nga “maingon sa nahitabo kaniadto sa mga adlaw ni Lot, maingon man usab sa pag-abot sa Anak sa tawo.” Ginoo, sa Imong kadunggan ug kahimayaan nga ginapangamuyo namo kini, ingon nga among ginatugyan ang among mga kaugalingon diha Kanimo uban sa among mga pagsugid. Hinloi kami sa Imong Dugo, Ginoo. Hugasi kami pinaagi sa tubig sa Pulong, ug hinloi kami diha sa Dugo. Ug ipresentar kami, Ginoo, ingon nga “mga panag-ingnan,” sama sa gikasulti ni Pedro diha sa pagbasa og teksto niining buntaga, ngadto sa mga dili-magtotoo nga kalibutan. Kay amo kining ginapangamuyo sa Ngalan ni Jesus Cristo. Amen.

¹⁶¹ Hangyoon ko ang igsoong babaye karon diha sa. . . ug diha sa piyano, sa makadiyut lang. Medyo naulahi lang kita karon, pero, oh, dili man gud ko makaanhi kanunay. Pasensiya na mo kanamo, kana lang, mahimo bang magpabilin ang tanan sa pipila lang ka mga minutos karon, magaampo kita para sa tanan. Si Billy, si Billy Paul, hain man—ania ba siya dinhi? Asa man nimo gipanghatag, nanghatag na ba ka og mga prayer card? Unsa man kadto? B, usa hangtud sa usa ka gatus. Magkuha lang kita og pipila sa mga B ug tan-awon kung hatagan ba Niya kita og pagpang-ila. Unsa man kana? Atong tan-awon kung ania ba Siya dinhi uban kanato. Hangyoa lamang Siya, nagatoo ba kamo nga pagabuhaton Niya kini? Nagwali na ko ug ako—nadihogan ako, apan karon human na ako sa pagwali niini, nakita n’yo.

¹⁶² Ug atong hangyoon nga manindog ang mga tawo. Bueno, magampo kita para kanilang tanan, bisan pa man, sugod lang sa numero uno. Kinsay nagkaaduna og B, numero uno? Pagtindog, kadtong adunay prayer card. Dili, dalhon ko lang sila libot dinhi mismo, mogawas sila niini nga lakwanan ug manaog. Letrang B, numero uno, kinsay nagkaaduna niini, numero uno nga prayer card? Ang pasabot ba niini nga wala kini sulod sa bilding? Sige, magsugod kita. . . Oh, pasayloa ko, gining. Okey, sige. B, numero dos, dayon kung nakasugod na kita gikan sa uno. Letrang B, numero dos. Kinsay aduna niini, mahimo mo bang ipataas ang imong kamot sama niana aron makita nato kini? Duol ka dinhi, gining, dinhi mismo. Tres, kinsay nagguni sa tres? Karon buhaton nato ang atong linya paingon dinha sa dingding, mosibog kita, o ngadto sa kung asa dinha dapit sa likod. Busa, sige, numero tres nga prayer card, kinsa ma'y moduol? Mao na ba kining gining nga nagaduol dinhi? Wala ko makita ang imong kamot, pasayloa ko, igsoon. Numero kuwatro, kinsay aduna og numero kuwatro nga prayer card? Mahimo mo bang ipataas ang imong kamot aron akong makita kung kinsa ka? Ang lalaki sa likod dinha, ang itum nga igsoong lalaki, mahimo ka bang moduol dinhi mismo, sir, numero kuwatro. Numero singko, kinsay aduna og numero singko? Ang lalaki sa likod dinha, mahimo ka bang moduol dinhi kung imo—mahimo mo? Numero sais, kinsay aduna og numero sais nga prayer card, mahimo mo bang ipataas ang imong kamot? Dinhi, sige, sais, sir. Siete. Karon, magpalikay kini kaninyo nga magkaguot. Siete, sige, duol ka dinhi mismo, siete. Karon numero otso, basta nga ikaw. . . Mahimo ka bang moanhi, sir? Numero nuebe. Sige, sir. Numero dyes. Sige, dong.

¹⁶³ Samtang gahunahuna kita niana, sa maong makahimuut nga bata; sa pagsulod ko kaganina, may usa ka gamay'ng batang lalaki, grabe kaayo para kanako nga hunahunaon kadto. Usa ka batang lalaki ang mitindog didto dili pa lang dugay, miingon siya, "Igsoong Branham, mahimo mo bang buhaton ang usa ka butang para kanako?" Mga ingon niani ang kadak-on sa niining batang lalaki.

Miingon ko, "Unsa man kana, dong?"

¹⁶⁴ Miingon siya, "Iampo mo ang akong inahan." Miingon, "Ginagamit lang niya ang Ngalan sa Dios sa walay kapuslanan, ug nagakinabuhi man gyud siya nga dili maayo."

Miingon ko, "Asa ka man nagpuyo? Dinhi lang ba sa siyudad?"

Miingon, "Oo, sir."

¹⁶⁵ Gusto niya nga ang iyang inahan mamahimong usa ka maayong babaye. Ug, dili ikatingala, nga miingon si Isaias "usa ka bata ang magapanguna kanila."

¹⁶⁶ Numero diyes, dili ba kini numero diyes? Sige, numero onse. Sige, numero dose, numero dose. Sige, numero trese, katorse. Sige, kinse. Ang kinse, dili ko makita, numero kinse. Dise-sais. Sige, diha ka agi, sir, kung mahimo mo, dise-sais. Dise-siete, dise-otso. Ang dise-otso, dili ko makita. Sige, gining, o igsoong babaye, dise-otso. Sige, karon dinha ka agi, gining, kung mahimo mo, dinha nga agianan. Karon tan-awa, ang linya sa pagpaampo, husto na kana para sila makatindog sa usa ka higayon.

¹⁶⁷ Sa diha nga nagakagamay na ang linya sa pagpaampo, kita n'yo, dayon tugoti si Billy Paul o ang pipila kanila dinhi gikan sa entablado. . . Si Igsoong Neville, Igsoong Neville, tugoti si Igsoong Neville pagkahuman, pagmakita ninyo sila. . . Karon, pagmakita ninyo si Igsoong Neville nga makita niya ang linya sa pagpaampo nga naga. . . nga mosinyas siya og sama niana, tungod magpaampo ako alang sa Balaang Espiritu nga. . .

¹⁶⁸ Karon, kini nga lalaki, aduna ka na ba'y prayer card, diha sa wheel chair, sir? Siya—siya—aduna na siya'y prayer card. Sige, karon puede na ninyo nga dalhon siya ngadto sa linya sa pagpaampo. Karon, aduna pa ba'y lain nga—nga—nga ania dinhi, nga dili makatindog? Aduna ma'y motabang kanila kung sila. . . pag ang ilang—ilang higayon moabot na, kita n'yo. Karon, timanan n'yo lang, sugdan ninyo sa akong gibiyaan diha sa mga dise-otso o baynte, mga ingon-ana, dayon magsugod kamo sa baynte-uno, baynte-dos, mahibalo na mo sa inyong puwesto sa diha nga nagaduol kamo.

¹⁶⁹ Karon nagakahingawa ba kamo? Nagatoo ba kamo nga nagkahingawa Siya sa kanunay? Nagatoo ba kamo niana nga Siya may kahangawa karon? Kung—kung Siya—kung nagkahingawa na Siya sa makausa, magkahingawa gayud Siya sa kanunay. Nagatoo ba mo niana? [Nagaingon ang kongregasyon, "Oo!"—Ed.] Karon gusto ko nga ang tanan magmatinahuron gayud, pabilin sa inyong nahimutangan, ug mag-ampo. Karon, kamo nga mga mananambong, mag-ampo usab. Karon, giunsa man Niya sa pagkahingawa? Tungod kay dili na Niya mahimong magkahingawa pa, ug walay tawo o walay propeta, wala na'y uban pa nga mahimong molagpas sa mga utlanan sa gisaad nga mga buhat sa Dios. Husto ba kana? Karon, dili ko igsapayan karon, mahimong miagi na kamo sa mga linya sa pagpaampo sa usa ka gatus na ka mga higayon, apan kamo nga nagapanindog karon ug kamo nga nagapanglingkod, kung adunay kasal-anan diha sa inyong kinabuhi, pagkawalay-pagtoo, isugid na kini karon dayon. Ayaw pagpangahas sa pagduol dinhi nga wala kana. Kung kamo—mahimo ninyong moduol dinhi ug bisan unsa pa ka dinihogan ang usa ka tawo, ug motindog ug magpandong sa iyang mga kamot nganha kaninyo, siguradong masipyat gyud kamo niini sa usa—usa ka gatus ka milyas gawas kon toohan ninyo kini. Kinahanglan gyud nga toohan ninyo kini. Kinahanglan nga isugid ninyo

kini. Kinahanglan gyud ninyo. Kita n'yo, dayon kung inyong tan-awon dinhi, kon giunsa nga adunay . . . nanghinaut ko nga nasabtan ninyo. Kita n'yo? Imposible gayud kaayo para sa Dios nga dili Niya tumanon ang Iyang Pulong nganha kaninyo, kung gituman ninyo ang inyong pulong ngadto sa Dios. Kita n'yo? Kung tinuod gayud nga inyong ginatoohan kini, wala gayu'y makapagpaduhaduha kaninyo niini. Ang panahon man, kawanangan man, wala na'y uban pa nga makapaduhaduha ninyo niini. Toohi ninyo kini. Nagatoo ba kamo niini? [Nagaingon ang kongregasyon, "Oo! Amen!"—Ed.]

¹⁷⁰ Karon, karon akong tan-awon kining linya sa pagpaampo. Sa ingon nga akong nasayran, gawas kung mao kini mismo ang lalaki dinhi, nakaila ko kaniya; ug nasayod ako niana, nailhan ko si Gene Slaughter dinha, nakaila ko kaniya; gawas niana . . . ug wala ako masayod kung unsay—kung para sa unsa nga nagapanindog sila dinha. Wala akoy ideya kung para sa unsa nga anaa sila dinha. Nasayod ang Dios. Ug karon kung kamo nasayod nga wala gayud ako'y nasayran mahitungod kaninyo, ipataas ang inyong mga kamot, kamo nga nagapanindog dinha. Karon, pila man niining mga mananambong ang nasayod nga wala gayud ako'y nasayran mahitungod kaninyo, ipataas ang inyong mga kamot. Karon pila man kaninyo ang nanghibalo nga si Jesus Cristo nasayod mahitungod kaninyo?

¹⁷¹ Ug pila man ang andam nga moingon niini? Nagatoo ako [Nagaingon ang kongregasyon, "Nagatoo ako"—Ed.] sa tibuok kong kasingkasing ["sa tibuok kong kasingkasing"] nga si Jesus ["nga si Jesus"] nag-ayo na kanako ["nag-ayo na kanako"] sa diha nga Siya gilansang sa krus ["sa diha nga Siya gilansang sa krus"] didto sa Kalbaryo ["didto sa Kalbaryo."] Husto kana. Kita n'yo? Karon, kung human na nga gibuhat Niya kini, nan sa inyo nang pagtoo kini aron dawaton kini. Karon, may igo Siyang kahingawa aron buhaton kadto, may igo ba kamong kahingawa aron isalikway ang tanang pagduhaduha, ug toohan kini? Itugyan ang inyong mga kabalaka ngadto Kaniya, kay Siya nagakahingawa alang kaninyo.

¹⁷² Karon, kung kamo nagmasakiton, kung kamo nag-antus, akong nakita, bueno, kabalo na mo, napulo ka linibo ka pilo ang mga butang nga nabuhat na sa Balaang Espiritu. Ug kabalo na mo niana; mga paralitiko na, bisan pa kadtung mga patay na.

¹⁷³ Usa ka lalaki ang namatay sa kalit lang dinhi mismo sa entablado, dinhi mismo sa atong atubangan, mga tulo ka semana na ang milabay. Ang iyang asawa usa ka rehistrado nga nars nga nagalingkod dinha karon. Ug ang maong lalaki kalit lang natumba. Nagalingkod siya sa usa ka dapit dinha karon. Ang iyang asawa ania nagalingkod dinha karon, ug—ug ania siya sa usa ka dapit dinhi karon. Oo, ania siya nagatindog dinhi mismo. Mingsulirap ang mga mata, nilagum nga sama niana, mismo sa . . . natumba na lang, ug giadtoan ko. Iyang gi-eksamin siya,

wala na'y pitik sa kasingkasing, wala na'y pulso. Gihikap ko siya sa akong mga kamot (patay na siya) ug gitawag lang ang iyang espiritu, sa Ngalan ni Jesus Cristo, ug mibangon siya. Kita n'yo? Kita n'yo?

¹⁷⁴ Unsa man kini? Siya mao ang Pagkabanhaw ug Kinabuhi. Dili ako kadto. Ang Maglilipay kadto nga mao'y namuhat, ang Balaang Espiritu nga nagapangamuyo alang kanato. Kita n'yo? Gidawat na nato Siya, karon anaa na Kaniya ang paghimo og mga pagpangamuyo alang kanato. Dayon unsaon ko man sa... Mahimo ba nga luwason kamo sa Dios nga batok sa inyong kabubut-on? Siguradong dili gayud. Dili Niya mahimong ayohon kamo nga batok sa inyong kabubut-on. Kinahanglan ninyo nga toohan kini.

¹⁷⁵ Karon, mahimong unsa man kini, kung—kung Iyang mapamatud-an, kung tugotan ako sa Dios pinaagi sa usa ka Balaanon nga gasa nga ipakita kaninyo nga ania si Jesus Cristo dinhi uban kanato, nga kini nga Maglilipay mao si Jesus Cristo, Siya mao ang Pulong. “Sa sinugdan mao ang Pulong.” Husto ba kana? “Ang Pulong mao ang Dios. Ug ang Pulong nahimong unod ug nagpuyo ipon kanato.” Ug ang Biblia miingon, diha sa Mga Hebreohanon 4, nga “Ang Pulong sa Dios labi pang mahait kay sa espada nga duhay sulab, ug Motugkad sa mga hunahuna sa kasingkasing.” Husto ba kana? Ug ingon niana ang gibuhay ni Jesus aron pamatud-an nga Siya mao ang dinihogan nga Pulong, ang Mesias. Oh, sus! Wala ba ninyo makita kana? Unsa man ang Mesias? Ang dinihogan. Ang dinihogan nga unsa? Ang dinihogan nga Pulong! “Ug ang Pulong nahimong unod.” Siya mao kadto ang dinihogan nga Pulong! Nakita mo ba kana, Igsoong Vayle? Kita n'yo, Siya mao ang dinihogan nga Pulong!

¹⁷⁶ Ug karon pag-itugyan ninyo ang inyong kaugalingon ngadto Kaniya, nan gamiton Niya kamo labaw pa sa kung unsay nahibaloan ninyo, nagapamatuod nga Siya mao sa gihapon ang dinihogan nga Pulong, ang Magtutugkad sa mga hunahuna sa kasingkasing. Oh, daw sa unsa, unsaon pa man pagduhaduha niini ni bisan kinsa man? Too hi lamang. Ayaw pagduhaduha. Ug karon kamo nga nagapanglingkod dinha, ako—gihisgutan ko kana nga hilisgutan niining buntaga. Sa diha nga nagkabalaka ang makaluluoy'ng babaye nga dili siya makaapil sa linya sa pagpaampo, tingali, apan gihikap niya ang borlas sa Iyang sapot ug milingi Siya sa palibot. Nagatoo ba kamo niana? Nagatoo ba mo nga mahimo kining mabuhay pag-usab karon? Oo. Karon, unsaon man ninyo sa paghikap niini?

¹⁷⁷ Ang Biblia miingon nga Siya mao ang Labaw'ng Sacerdote, ang usa ka Labaw'ng Sacerdote karon mismo, nagalingkod diha sa too sa Kahalangdon sa Dios, aron sa pagpangaliya sa atong mga pagsugid. Nagasugid kita nga nagatoo kita Kaniya, ug gusto nato nga mahikap ang maong Labaw'ng Sacerdote. Ug kung hikapon nato Siya, unsaon man Niya pagtubag? Ania Siya

karon sa porma sa Espiritu Santo. Kung ingon-ana mosulti Siya mismo og balik ug sultihan ka sa eksakto gayud. Husto ba kana? Karon toohi ninyo kana ug pabilin lang sa paglingkod, pabilin nga hilom, pabilin nga matinahuron ug himatikdi. Karon, kung pagabuhaton Niya kini bisan sa tulo lang ka higayon, igo na kana, dili ba? Sa tulo lang ka higayon, kung buhaton man Niya kini. Usa, duha, tulo, kung buhaton man Niya kini.

Kumusta ka?

¹⁷⁸ Karon, sa makadiyut lang samtang magampo kita. Kita n'yo, kini mao'y, dili ko... Kini usa ka butang nga medyo lahi karon; kaganina pa ako nagawali, ug dayon mopaingon niini. Karon, wala pa ko nakahangyo sa Ginoo bahin niini sa dugay na nga panahon, apan nasayod ang Ginoong Dios sa akong kasingkasing, ug hinaut nga itugot Niya ang inyong mga paghangyo. Ug nagatoo ako niini, nga pagabuhaton Niya kini.

¹⁷⁹ Karon, ania ang usa ka babaye nga nagatindog dinhi, dili kami magkaila sa usa'g usa. Sa pagkahibalo ko, wala pa gyud ko makakita kaniya sa tibuok kong kinabuhi. Mahimong nakatambong siya sa laing panagtigum sa usa ka dapit o nailhan ako pinaagi sa pipila ka mga literatura, apan nasayod ang Langitnong Amahan, sa pagkahibalo ko, wala ko pa gyud siya makita sa tibuok kong kinabuhi. Dili ko siya kaila.

¹⁸⁰ Karon, kung Siya mao sa gihapon, ania ang usa ka lalaki ug usa ka babaye nga nagtagbo dinhi sama nga nahinagbo ni Jesus ang usa ka babaye didto sa atabay, nga akong gihisgutan dili pa lang dugay. Nagkahingawa Siya para kaniya. Karon, kini nga babaye mahimong wala nakasala sa sala nga nahimo sa kaniadtong babaye, apan aduna gyu'y problema. Apan nagakahingawa Siya kaniya sama sa nagkahingawa Siya sa kaniadtong babaye. Kita n'yo, nagakahingawa Siya. Karon, ug sa pagkakita sa kaniadtong babaye niini, nailhan niya kini. Karon, ania kaming duha nga nagatindog dinhi sama niini. Karon, wala pa gyud ko makakita kaniya.

¹⁸¹ Karon, kung ang gamhanang Balaang Espiritu, ang Dili-Makita, karon kung ang mga pagbati sa pagtoo magapahayag Kaniya nganhi kanako. Gihatud Niya ang maong mga pagbati sa pagtoo, ug gihatud Niya ang Iyang Pulong sa ingon ka haduol kaayo niining kaulahiang mga adlaw hangtud nga nakuhaan Siya og hulagway Niini didto. Gihatud Niya kini sa ingon ka haduol kaayo ngadto sa atong mga pagbati, dinihogan, mihawa ug nakita Siya nga mianhi ug nagalihok sa palibot sa nianang porma sa usa ka Haligi nga Kalayo. Dili ba? Karon ania Siya, nasayod ko nga ania gayud Siya. Ang akong pagtoo nagaingon nga ania Siya. Karon kung mahimo lang Niya sa pagpakita sa Iyang Kaugalingon dinhi aron hibaloon ang kinabuhi sa niining babaye, kita n'yo, ingon nga gisaad na Niya nga Iyang

pagabuhaton. Ang Balaang Espiritu ang mohimo sa mao rang mga buhat nga Iyang gibuhat kaniadto.

¹⁸² Karon ako, ingon nga ako kaganina pa nagwali, gusto ko lang nga makig-istorya kanimo sa kadali aron nga ako lang makita.

¹⁸³ Sama sa Iyang gibuhat sa babaye didto sa atabay, miingon Siya, “Dal-i Ko og mainom.” Kabalo na mo, Siya. . . Tingali nagalingkod lang Siya didto nga naghunahuna bahin kanila nga nagpanglakaw aron sa pagpangita og makaon, ug dayon Siya—kinahanglan Niya nga makigsulti kadali ngadto sa babaye, kabalo na mo. Gipadala Siya sa Amahan didto. Kinahanglan Niya. Paingon Siya unta ngadto sa Jerico; ug misaka Siya ngadto sa Samaria, nga atua ibabaw sa bukid, Siya “kinahanglan gayud nga moadto didto.”

¹⁸⁴ Bueno, sa unsa mang paagi, gikinahanglan ko, gipadala ako sa Amahan gikan sa Arizona, dinhi, ug mianhi ka. Busa pareho ra kini sa gihapon. Walay bisan unsa mang panghitabo nga nahitabo tungod lang nga nasalagmaan, nagakahitabo kini tanan tungod sa kung unsa nga mga hinungdan. Tungod sa grasya sa Dios, mao gayud.

¹⁸⁵ Karon, ingon nga wala ko nakaila kanimo, ug himsog kaayo kang tan-awon, ug tingali mahimong dili tungod niini nga ania ka dinhi. Mahimong tungod kini sa usa ka laing butang. Mahimong tungod kini sa usa ka minahal, mahimong tungod kini sa panimalay, sa pinansyal. Wala ako’y paagi sa pagpakahibalo, kabalo na ka niana. Apan kung Iyang isaysay kanako kon para sa unsa nga ania ka dinhi, mahibaloan nimo kon kamatuoran ba kini o dili. Ug mahimo ba sa mga mananambong nga toohan ninyo kini sa tibuk ninyong kasingkasing kung ingon-ana? Karon madungog ninyo kami, ug gi-teyp kini, ug nagatindog lamang kami dinhi sa entablado.

¹⁸⁶ Ang babaye, makita ko siya nga nagagunit sa iyang ulo sama niini. Aduna siya’y, aduna siya’y sakit sa ulo nga nagapaproblema kaniya, sama sa migraine headache nga sakit. Nagapadayon kini nga labad sa ulo nga kanunay’ng motukar. Tinuod kana. Kung husto kana, ipataas ang imong kamot. Kita n’yo? Husto kana. Ang usa pa, aduna siya’y sakit sa thyroid, nga gikasulti na kaniya, bisan pa, kana—nagapahasol kana kanimo, ug husto siya, usa kini ka thyroid. Ug dayon aduna ka’y mga komplikasyon, daghang mga butang nga dili maayo diha kanimo; pagkanerbyoso, pagkasuko, mga pagkalibog, “usahay mahibulong ko kon hain ako nagatindog, ug kon anaa ba ako sa sulod o sa gawas.” Ug husto kana. Mao kini ang kamatuoran. Karon, nakahibalo Siya kanimo, dili ka makatago karon bisan kung gikinahanglan pa nimo. Kita n’yo? Nagatoo ka ba nga mahimo Niyang isulti kanako kung unsa ka, kung kinsa ka? Bueno, Viola, pauli na sa imong panimalay, si Jesus Cristo nag-ayo na kanimo.

Nagatoo ba kamo?

¹⁸⁷ Wala ako mahibalo. Si Jesus Cristo ang nakahibalo sa tanang butang. Lain na usab kini nga dili ko kaila. Nakaila ang Dios kanatong duha. Nagatoo ka ba kanako nga Iyang propeta, Iyang alagad? Nagatoo ka ba nga kining mga butang nga akong giwali gikan niini nga Pulong mao ang Kamatuoran? Nagatoo ka? Kung ang Ginoong Jesus mosulti kanako kon para sa unsa nga ania ka dinhi, motoo ka kanako nga Iyang alagad. Ug ginabuhat Niya kini tungod kay nagakahingawa Siya para kanimo. Siya, para kanimo ang Iyang kahingawa, ginabuhat Niya kana tungod kay nagakahingawa man Siya para kanimo. Nagakahingawa Siya alang niining uban nga ania sa linya. Nagakahingawa Siya alang kanila. Aduna ka og sakit, sa pagkadisgrasya, disgrasya sa sakyanan. Nalisang gyud kaayo ka tungod niini. Husto kana. Aduna ka'y sakit diha bahin sa imong lawas. Husto kana. Mamaayo na kini, ug ang pagkanerbiyoso mobiya na kanimo, busa makalakaw kana pauli, nga ginapasalamatan ang Ginoo, ug nagaingon, “Dalaygon ang Ginoo!”

“Kung ikaw makahimo sa pagtoo, ang tanang mga butang mahimo.” Sige.

¹⁸⁸ Nagatoo ka ba? Wala ako makaila kanimo, dili ko ikaw igkaila. Apan nakaila ang Dios kanimo. Nagatoo ka ba nga mahimong itug-an Niya kanako ang hinungdan nga ania ka dinhi, o ang usa pa ka butang mahitungod kanimo? Motoo ka ba niini? [Nagaingon ang babaye, “Oo.”—Ed.] Adunay usa pa ka babaye. Dili ikaw kadto, kita n'yo. Dili, dili. Ikaw mao kadto, ania ka dinhi para sa usa ka tawo. Ania ka para sa uban, para sa imong inahan kini. Husto kana. Aduna siya'y problema diha sa iyang bitiis, usab. Husto kana. Wala siya dinhi. Anaa siya duol sa usa ka dapit nga daw, sa akong tan-aw daw sa English, duol sa, gikan sa maong dapit dinhi. Ikaw, husto kana, nagatoo ka ba? Sige, lakaw. Naayo na siya. Padayon lang.

¹⁸⁹ Adunay duha ka babaye. Ang usa kanila mao'y mas tigulang, busa ako—ako nahibulong kon hain na kadto. Akong gitan-aw kon hain—hain na kadto. Ang Ginoong Dios nasayod sa tanang butang, dili ba? Ug mahimo Niya ang tanang butang. Nagatoo ba kamo niana? Amen. Dili ba Siya kahibulongan? Gihigugma ko Siya. Siya, Siya mao ang akong Kinabuhi. Siya ang tanan nga aduna ako. Siya ang tanan nga akong gusto. Padayon lang sa unahan, Siya nag-ayo na kanimo, sir.

¹⁹⁰ Ang pagdihog nagsunod nianang babaye. Adunay laing babaye nga nagalingkod dinha nga nahasol sa kanerbyos, ug aduna siyay bukol diha ilalum sa iyang bukton. Husto ba kana? Sa diha nga gipandong niya ang iyang mga kamot diha kanimo, nibati ka og dili-masabtan nga pagbati. Dili ba husto kana? Mao kadtong tungora nga giayo ka na Niya. Mamaayo ka gayud. Si Jesus Cristo. Tan-awa kon hain siya. Ang babaye nga nagaampo

kaganina, o dinhi, kita n'yo. Nahimatikdan ba ninyo sa diha nga nag-ampo siya, nag-ampo ko alang kaniya, unsa ma'y nahitabo? Kita n'yo? Nakita ko ang laing babaye, ug mitan-aw ko dinha. Aduna gayuy dili maisip nga pagbati. Siguro magkaila gayud sila sa usa'g usa, o ingon-ana, o nagkailhanay sila, tungod kay kana nga babaye aduna man og kalooy para niining babaye dinhi. Ug dayon miadto kini nga babaye ug gipandongan siya, ug, sa diha nga gipandongan niya, mitan-aw ko ug aduna ko'y nakita didto, ug anaa siya nga mao siya nga nagatindog mismo dinha. Wala ko pa sukad nakita kana nga babaye sa tibuok kong kinabuhi. Ang Dios sa Langit nahibalo niana. Oh, sus! Nganong magduhaduha man kamo?

¹⁹¹ Kung ikaw makahimo sa pagtoo, mahimo gani Niya sa pagtangtang kanang mga dautang gawi gikan kanimo. Nagatoo ka ba niana? Nagatoo ka ba nga mahimo ka Niyang ayohon sa hingpit? Lumakaw ka, ug pagaundangan na nimo kini karon mismo, ug dili ka na gayud magapanigarilyo pa. Lakaw, ug toohi sa tibuok nimong kasingkasing. Magmaaduna og pagtoo sa Dios. Ayaw pagduhaduha.

¹⁹² Nagatoo ba kamo? Aduna pa ba kita'y tulo? Magmaaduna og pagtoo sa Dios. Ayaw pagduhaduha. Toohi lamang. Nagatoo ba kamo nga ang Iyang pagdihog ania dinhi karon? [Nagaingon ang kongregasyon, "Oo. Amen."—Ed.] Amen. Ayaw pagduhaduha. Toohi!

¹⁹³ Igapandong ko ang mga kamot diha kanimo, ug toohi. Motoo ka ba uban kanako? [Ang tawo nagaingon, "Oo, sir."—Ed.] Sa Ngalan ni Jesus Cristo, itugot nga mamaayo kining igsoong lalaki. Amen. Magmaaduna og pagtoo karon, ayaw pagduhaduha. Kadali lang.

¹⁹⁴ Adunay usa ka butang nga nahitabo dinha sa mga mananambong ug dili ko makita kini, ania kini sa luyo mismo dinhi. Siguro natago lang kini gikan kanako karon. Ania na. Makita ko kini diha sa usa ka landong. Usa kini ka lalaki, ug siya nagaantus sa pagkanerbyos. Aduna siya'y usa ka batang lalaki nga aduna og patol. Toohi sa tibuok nimong kasingkasing, sir. Nagatoo ka ba? Ingon niana. Sige, ipandong ang imong kamot dinha sa batang lalaki ug mamaayo na siya. Amen. Dalaygon ang Ginoo.

¹⁹⁵ Nagatoo ba kamo? Nagdahum gyud kana nga yawa nga mahimo siyang motago dinha, apan napakyas siya niini. Nagatoo ba kamo? Kana nga butang nagalihok pa gihapon sa usa ka dapit. Oh, sus, alang lang gayud sa grasya og kahingawa! Adunay usa pa ka patolon nga ania kon asa man. Oo, ania kini dinhi mismo. Nagatoo ka ba? Magmaaduna ka og pagtoo. Nagatoo ka ba nga ang Dios nakaila kanimo? Puede ka nang mobalik sa Ohio, mamaayo ka na, Mr. Nelson T. Grant. Mao kana'y imong ngalan. Kung motoo ka, kana nga mga butang magabiya na kanimo ug

dili na gayud maghasol kanimo. Wala ko pa sukad nakita ang maong tawo sa tibuok kong kinabuhi, wala ko'y nahibal-an og bisan unsa man mahitungod kaniya.

Dili ninyo kini matago karon, ania ang Balaang Espiritu dinhi!

¹⁹⁶ Iduko nato ang atong mga ulo ug maghatag og pagdayeg sa Dios. Ginoong Jesus, nagapasalamat kami Kanimo. Ikaw ang mao ra sa gihapon kagahapon, karon, ug hangtud sa kahangturan. Ang Imong grasya wala gayud nagakapakyas, Ginoo, mao ra kini sa tanang panahon. Ako nagaampo nga ang Imong dakung kalooy ug kamaayo maanaa diha sa mga tawo. Nagkahingawa Ka gayud Ginoo, aron sa pag-anhi ug pagpanghimatuod sa Imong Kaugalingon. Ikaw mao ang Dios. Ikaw ang gamhanan nga Maong Balaan, ang gamhanang Balaang Espiritu. Karon hinaut nga motoo kini nga mga tawo, Ginoo, samtang nagapangagi sila dinhi, ug mamaayo ang matag usa kanila. Samtang ang Imong pagdihog ania dinhi, akong ginapandongan mismo kini nga mga panyo. Ako nagaampo, Ginoo, nga igatugot Mo kini nga mga paghangyo, Amahan. Itugot kini, Ginoo, sa mga ania dinhi ug sa mga mananambong.

¹⁹⁷ Ug hinaut nga ang matag tawo nga anaa diha sa Balaanong Presensiya magkahingawa gayud karon aron toohan nga may igo Ka nga kahangawa sa pagtungha sa kaulahiang adlaw sa taliwala sa Imong katawhan, ug aron sa pagpamatuod! Dili Nimo mahimong ayohon sila, Ginoo, dili na Nimo mahimong buhaton pa kon unsa ang gibuhat na Nimo kaniadto. Giayo na Nimo sila. Ug kini lang ang mahimong buhaton, ang ipatoo sila. Ug may igong kahangawa gyud Ikaw, nga miagi kami sa dakung mga kawalay-pagtoo, sa gihapon may igong kahangawa Ikaw aron ipakita nga Ikaw buhi ug nabanhaw gikan sa mga patay, sa among taliwala. Hinaut nga maitugyan namo ang among mga kabalaka diha Kanimo, ug ang matag tawo diha sa Balaanong Presensiya mamaayo, diha sa ilang kalag ug lawas. Pinaagi sa Ngalan ni Jesus Cristo. Amen.

¹⁹⁸ Sige, pagduol mo niini nga agianan mismo, paduola ang mga tawo subay niini mismo. Sige, magatawag si Billy kanila, hugpong-hugpong. Ayaw, dili na kita mag-inistoryahanay karon, ang—ania na kanako ang pagdihog, kita n'yo. Gusto ko nga magpandong og mga kamot diha kaniya samtang ania pa Kini. Kita n'yo? Dili ko mahimo nga mohunong niana nga pagpang-ila. Kung akong buhaton...Pila man ang ania dinhi aron maiampo, ipataas ang inyong kamot. Mga setenta porsyento. Kita n'yo? Karon mismo diyes minutos na lang para mag ala-una. Magasunod na ang pangbautismo nga panerbisyo human niini. Dili ko mahimo kini, apan mahimo ninyo nga motoo. Kung may igo Siyang kahangawa aron ipakita ang Iyang Kaugalingon, kinahanglan nga aduna kamo'y igong kahangawa usab aron nga motoo. Husto ba kana? Sige, mag-ampo ang

tanang mananambong. Ug si Billy o si Igsoong Neville, ang usa, mogamit niini, mogamit niini nga mikropono. Pabilin natong iduko ang atong mga ulo ug mag-ampo samtang nagapangagi sila sa linya. Karon, iampo ko ang matag usa kaninyo karon, magapandong sa mga kamot diha kaninyo ug mangamuyo nga ang matag nakuptan sa yawa, diha kaninyo, matangtang kaninyo sa diha nga nagalabay kamo ilalum niining dinihogan nga dapit karon mismo, kung akong isulti kini sa ingon nianang pagkasulti. Ang pagdihog anaa dinha sama ra nga ania kini dinhi. Apan ginahimo ko kini alang sa inyong pagtoo, nagaingon niana. Mag-ampo ang tanan karon.

¹⁹⁹ Sa Ngalan ni Jesus Cristo, itugot nga mamaayo kining gamay'ng bata nga lalaki. Amen. Dios, sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo. Ako nagatuman sa Imong mga sugo, Ginoo. Miingon Ka, "Kining mga ilhanan magauban sa mga magtotoo." Mga magtotoo, pareho kaming duhang magtotoo. "Kung igapandong nila ilang mga kamot sa mga masakiton, mangaaayo sila." Sa Ngalan ni Jesus, ginabuhat ko kini nga buluhaton. Sa Ngalan ni Jesus Cristo, ginapandong ko ang akong mga kamot niining igsoong lalaki. Amen. Sa Ngalan ni Jesus Cristo, ginapandong ko ang akong mga kamot sa among igsoong lalaki, alang sa iyang kaayohan. Amen.

²⁰⁰ Nagakahingawa Siya alang kanimo, igsoon. Nagakahingawa ko aron sa pagpandong og mga kamot. May igo ka bang kahangawa aron motoo? Amen. Sa Ngalan ni Jesus Cristo, itugot kini nga mahimong mamaayo ang among igsoong babaye.

²⁰¹ Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong babaye. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus Cristo, itugot nga mamaayo ang among igsoong lalaki. Sa Ngalan ni Jesus, ayoha kining akong igsoong babaye, Ginoo. Sa Ngalan ni Jesus, ayoha kining akong igsoong babaye. Sa Ngalan ni Jesus, ayoha kining akong igsoong lalaki. Sa Ngalan ni Jesus Cristo, ayoha kining akong igsoong babaye. Sa Ngalan ni Jesus Cristo, ayoha kining akong igsoong babaye. Sa Ngalan ni Jesus Cristo, ayoha kining akong igsoong babaye. Sa Ngalan ni Jesus Cristo, ayoha kining akong igsoong babaye. Sa Ngalan ni Ginoong Jesus Cristo, ayoha kining akong igsoong babaye.

Igsoong lalaki, nagakahingawa Siya. Nagakahangawa ka ba? Sa Ngalan ni Jesus, ayoha siya!

²⁰² Ang tanan diha sa pag-ampo karon, mag-ampo ang tanan. Imo kining mga tawo nga nagapangduol.

²⁰³ Sa Ngalan ni Jesus, ayoha akong igsoong babaye. Sa Ngalan ni Jesus, ayoha kining akong igsoong lalaki. Amen. Sa Ngalan ni Jesus, ayoha kining akong igsoong lalaki. Sa Ngalan ni Jesus Cristo, ayoha akong igsoong babaye. Sa Ngalan ni Jesus Cristo, ayoha akong igsoong babaye. Sa Ngalan ni Jesus Cristo, ayoha akong igsoong babaye. Sa Ngalan ni Jesus, ayoha akong gamay'ng igsoong babaye. Sa Ngalan ni Jesus Cristo, ayoha kining akong igsoong babaye. Sa Ngalan ni Jesus Cristo, ayoha kining akong igsoong babaye. Sa Ngalan ni Jesus, ayoha kining akong igsoong babaye. Sa Ngalan ni Jesus Cristo, ayoha kining akong igsoong babaye, akong igsoong lalaki. Ayoha kining akong igsoong babaye. Ayoha kining akong igsoong babaye, Ginoo. Ayoha kining akong igsoong babaye, akong giampo sa Ngalan ni Jesus. Ayoha akong igsoong babaye, Amahan, sa Ngalan ni Jesus. Ayoha akong igsoong babaye, sa Ngalan ni Jesus.

²⁰⁴ Igsoong babaye, nagakahingawa Siya. Nagakahangawa ka ba? Sa Ngalan ni Jesus, dawata ang imong pagkaayo. Sa Ngalan ni Jesus, dawata ang imong kaayohan, igsoong babaye. Sa Ngalan ni Jesus, dawata ang imong kaayohan. Sa Ngalan ni Jesus Cristo, dawata ang imong kaayohan. Sa Ngalan ni Jesus Cristo, ayoha kining akong igsoong babaye. Ayoha kining akong igsoong babaye, Amahan, sa Ngalan ni Jesus. Ayoha kining akong igsoong lalaki, sa Ngalan ni Jesus. Ayoha kining igsoong babaye, sa Ngalan ni Jesus. Ayoha among igsoong babaye, sa Ngalan ni Jesus. Ayoha akong igsoong lalaki, Ginoo, sa Ngalan ni Jesus Cristo. Ayoha akong igsoong babaye, Amahan, sa Ngalan ni Jesus. Ayoha kining akong igsoong lalaki, sa Ngalan ni Jesus. Ayoha akong igsoong babaye, sa Ngalan ni Jesus. Ayoha among igsoong babaye, sa Ngalan ni Jesus. Ayoha ang gamay'ng batang lalaki, sa Ngalan ni Jesus. Ayoha si Igsoong Creech, Ginoo, sa Ngalan ni Jesus. Ayoha kining among igsoong babaye, sa Ngalan ni Jesus. Ayoha kining among igsoong babaye, sa Ngalan ni Jesus Cristo. Ayoha sila, Amahan, ang duruha, sa Ngalan ni Jesus Cristo. Amen.

²⁰⁵ Panalanginan ka sa Dios, igsoon. Mao ba kana imong anak? Imong asawa? Bueno, wala ako makahibalo niini. Panalanginan ka sa Ginoo, igsoon. Ayoha kining akong igsoong lalaki, sa Ngalan ni Jesus. Ayoha kining akong igsoong babaye, Amahan, sa Ngalan ni Jesus. Ayoha kining akong igsoong babaye, sa Ngalan ni Jesus. Ayoha kining akong igsoong lalaki, sa Ngalan ni Jesus. Ayoha kining akong igsoong babaye, sa Ngalan ni Jesus Cristo. Ayoha kining akong igsoong lalaki, Ginoo, sa Ngalan ni Jesus Cristo. Ayoha kining akong igsoong babaye, sa Ngalan ni Jesus Cristo. Ayoha kining akong igsoong lalaki, sa Ngalan ni Jesus. Ayoha sila, Amahan, sa Ngalan ni Jesus.

²⁰⁶ Ginahatag ko ang akong kinasingkasing nga pag-ampo,

para sa matag usa. Pagkahingawa kamo karon. Nagakahingawa si Jesus. Gipadala na ni Jesus ang Mensahe. Gipadala na ni Jesus ang Iyang Espiritu. Gipadala na ni Jesus ang Iyang Pulong. Gipadala na ni Jesus ang Iyang sulogun. Kitang tanan nagakahingawa. Karon nagakahingawa ba kamo? Kung ikaw nagakahingawa, toohi kini, dawata kini sa matinuuron gayud, mamahimo kini.

Sa Ngalan ni Jesus, ayoha akong igsoong lalaki.

Sa Ngalan ni Jesus, ayoha kini, akong igsoong babaye.

Sa Ngalan ni Jesus, ayoha akong igsoong babaye.

Sa Ngalan ni Jesus, ayoha akong igsoong lalaki.

²⁰⁷ Dios, sa Ngalan ni Jesus Cristo, ayoha kini, akong igsoong babaye. Itugot kini, Amahan.

Sa Ngalan ni Jesus Cristo, ayoha kining akong igsoong babaye.

Sa Ngalan ni Jesus, ayoha kini, akong igsoong babaye.

Sa Ngalan ni Jesus Cristo, ayoha kining akong igsoong babaye.

Ginoo, sa Ngalan ni Jesus, ayoha kini, akong igsoong lalaki.

²⁰⁸ Oh Dios sa Langit, malooy Ka aron sa pag-ayo; itugot kini, Ginoo. Hinaut nga ang kapiskay ug kalig-on magapangabot sa Ngalan ni Jesus Cristo.

Dios, sa Ngalan ni Jesus Cristo, ayoha kini, akong igsoong lalaki.

Dios, ang among igsoong babaye dinhi sa lingkoranan, ginaampo ko nga ayohon Nimo siya ug himoa siya nga naayo na gayud, Ginoo, sa Ngalan ni Jesus.

²⁰⁹ Dios, ayoha ang among igsoong babaye dinhi, sa iyang maayong buhat sa gugma, tabangi kini nga babaye, sa Ngalan ni Jesus.

Dios, sa Ngalan ni Jesus Cristo, ayoha kini, akong igsoong babaye.

Dios, ayoha akong igsoong lalaki, ako nagaampo, sa Ngalan ni Jesus Cristo.

Dios, sa Ngalan ni Jesus Cristo, ayoha kining tigulang nga babaye.

Sa Ngalan ni Jesus Cristo ayoha kining babaye.

Sa Ngalan ni Jesus ayoha . . . ? . . .

Sa Ngalan ni Jesus Cristo, ayoha kini, akong igsoong babaye.

Sa Ngalan ni Jesus, ayoha . . . ? . . . Ginoo.

Sa Ngalan ni Jesus, ayoha akong igsoong lalaki.

Sa Ngalan ni Jesus, ayoha kining usa, Ginoo.

Sa Ngalan ni Jesus Cristo, ayoha akong igsoong lalaki, Ginoo.

Sa Ngalan ni Jesus Cristo, ayoha kini, akong igsoong babaye.

Sa Ngalan ni Jesus Cristo, ayoha . . . ? . . .

Ayoha akong igsoong lalaki sa Ngalan ni Jesus Cristo.

Ayoha ang igsoong lalaki sa . . . ? . . . [Blangko nga bahin sa teyp—Ed.]

²¹⁰ Pagduol nga sinsero gayud; ayaw pagduhaduha sa bisan unsa; toohi lang kini. Nagaampo na ang tanan karon. Ato kining mga katawhan nga nagapangagi dinhi, mga anak sa Dios. Toohi.

Ayoha among gamay'ng igsoong babaye, Amahan, sa Ngalan ni Jesus.

²¹¹ Ayoha akong mahal nga higala, Ginoo. Dios, dugay-dugay siya nga naghulat; hinaut nga mao na kini ang mismong takna. Amen.

Sa Ngalan ni Jesus, ayoha kini, akong igsoong babaye.

Sa Ngalan ni Jesus . . . ? . . .

Sa Ngalan ni Jesus, ayoha siya, Amahan.

Kang Jesus . . . ? . . .

Sa Ngalan ni Jesus, ayoha siya, Amahan.

Sa Ngalan ni Jesus, ayoha kini, akong igsoong lalaki.

Sa Ngalan ni Jesus Cristo, ayoha akong igsoong babaye.

Ayoha akong igsoong babaye, Amahan, sa Ngalan ni Jesus.

Sa Ngalan ni Jesus, ayoha akong igsoong lalaki.

Sa Ngalan ni Jesus, ayoha kini, akong igsoong lalaki, Ginoo.

Sa Ngalan ni Jesus, ayoha akong igsoong babaye, Amahan.

Sa Ngalan ni Jesus . . . ? . . .

Dios, sa Ngalan ni Jesus Cristo, ayoha akong igsoong babaye.

²¹² Dios, sa Ngalan ni Jesus kuhaa ang paralisis gikan sa akong igsoong lalaki, Ginoo, himoa nga maayo na siya, Amahan.

Dios, sa Ngalan ni Jesus, ayoha kini, akong igsoong lalaki.

Sa Ngalan ni Jesus, ayoha kini, akong bayaw nga lalaki, akong giampo.

²¹³ Sa Ngalan ni Jesus, ayoha kini, akong igsoong babaye, Ginoo; Dios ayoha siya, sa Ngalan ni Jesus Cristo.

Ayoha among igsoong babaye, Amahan, sa Ngalan ni Jesus Cristo . . . ? . . .

²¹⁴ Oh Dios, karon, aniy pipila ka mga paghangyo, itugot kini sa ingon, sa Ngalan ni Jesus.

²¹⁵ Karon, mao Kana ang paagi sa pagdawat niini, igsoon. Karon, tungod niana gibuhat kini sa Ginoo.

216 Nakita n'yo kung kana nga bata dili . . . ? . . . Karon, gitugotan Niya ako nga mahibalo kon unsay sayup diha kanimo. Dili ko lang ipahibalo kini . . . ? . . . sa Ngalan ni Jesus Cristo . . .

217 Oh Dios, aniyay nagatindog . . . ? . . . nagatindog siya dinhi para kang Edith. Ginahunahuna namo ang bahin sa nianang makalolooy'ng igsoon, Ginoo. Ania siya dinhi nga gihangyo, karon mismo. Ania nagatindog ang iyang igsoong babaye para kaniya, Ginoo. Itugot, Oh Dios, itugot kini nga mga paghangyo, sa Ngalan ni Jesus, alang kaniya.

218 Dios, kaloy-i among igsoong lalaki ug ayoha siya, Amahan, sa Ngalan ni Jesus.

219 Dios, sa Ngalan ni Jesus Cristo, hikapa kini, akong mahal nga igsoong lalaki ug himoa nga maayo siya, Amahan.

Diha sa Ngalan ni Jesus Cristo, ayoha among igsoong babaye.

Diha sa Ngalan ni Jesus Cristo, Ginoo, ayoha among igsoong babaye.

Ayoha among igsoong lalaki, Amahan, sa Ngalan ni Jesus.

Diha sa Ngalan ni Jesus Cristo, ayoha kini, among igsoong babaye.

Oh Dios, diha sa Ngalan ni Jesus Cristo, ayoha kini . . . ? . . .

Dios, ayoha kining gamay'ng batang lalaki, sa Ngalan ni Jesus Cristo.

Diha sa Ngalan ni Jesus Cristo, ayoha among igsoong lalaki, Ginoo.

Diha sa Ngalan ni Jesus, ayoha ang among . . . ? . . .

Oh Dios, diha sa Ngalan ni Jesus Cristo, ayoha ang among igsoong babaye.

Diha sa Ngalan ni Jesus Cristo, ayoha . . . ? . . .

Ayoha among igsoong babaye . . . ? . . . sa Ngalan ni Jesus.

Oh Dios, ayoha kini, among igsoong babaye, akong giampo, sa Ngalan ni Jesus.

Dios, ayoha among igsoong babaye, kay ako nag-ampo sa Ngalan ni Jesus.

Dios, himoa nga maayo siya; itugot kini, Ginoo, sa Ngalan ni Jesus.

220 Dios, hikapa among igsoong lalaki; imo Kining Pulong; Gisaad Nimo kini, Ginoo, ug nagaduol kami nga nagatoo niini, sa Ngalan ni Jesus.

221 Sa Ngalan ni Jesus Cristo, ayoha among igsoong babaye, Ginoo; miduol siya nga sinsero gayud, nga nagatoo karon; hinaut nga mouli siya ug nga maayo na.

Sa Ngalan ni Jesus hinaut nga mouli siya ug nga maayo na, Ginoo.

222 Dios, ipandong Imong nagaayo nga mga kamot diha sa . . . ? . . . hinaut nga sila magapanguli sa iyang panimalay uban sa iyang paghangyo. Oh Dios, ihatag ang kaayohan, Ginoo.

Ayoha among igsoong babaye, Amahan, sa Ngalan ni Jesus.

Ayoha akong igsoong babaye, sa Ngalan ni Jesus.

Dios sa Langit, ayoha akong igsoong lalaki, sa Ngalan ni Jesus Cristo.

Ug akong igsoong babaye, sa Ngalan ni Ginoong Jesus.

Ayoha kini . . . ? . . . sa Ngalan ni Jesus.

Ayoha kini, akong igsoong Daulton, sa Ngalan ni Jesus.

Ayoha akong igsoong babaye, Amahan, sa Ngalan ni Jesus.

Ayoha akong igsoong lalaki, Ginoo, sa Ngalan ni Jesus.

223 Karon, nagakahingawa Siya; nagakahingawa usab ikaw, igsoon. Lakaw pagdayeg Kaniya ug pagpasalamat Kaniya, sa Ngalan ni Jesus Cristo . . . ? . . . Itugot kini, Ginoo, daghan ang iyang mga palas-anon; ipagaan kini karon, Amahan, sa Ngalan ni Jesus Cristo, ayoha among igsoong lalaki.

224 Hinaut nga magpadala Ikaw og kalooy ngadto kaniya . . . ? . . .

225 Dios, ihatag ang kaayohan sa akong igsoong babaye, dinhi. Makita ko nga siya nagatindog diha sa pultahan, nagahulat, ang Balaang Espiritu anaa sa palibot niya. Dios, hinaut nga mopauli siya ug nga nagatoo Kanim. Itugot kini, Amahan.

Sa Ngalan ni Jesus, hinaut nga mopauli siya nga gawasnon, Amahan.

Dios, sa Ngalan ni Jesus Cristo . . . ? . . .

Sa Ngalan ni Jesus, ako nag-ampo nga ayohon Nimo akong igsoong babaye.

Sa Ngalan ni Jesus, ayoha kini, akong igsoong babaye.

Dios, sa Ngalan ni Jesus Cristo, ayoha akong igsoong lalaki.

Dios, sa Ngalan ni Jesus Cristo . . . ? . . .

Dios, himoa nga maayo akong igsoong lalaki, sa Ngalan ni Jesus Cristo.

Dios . . . ? . . . duol nga pinaagi sa . . . ? . . . ang gahum maghimo nga moayo kaniya.

226 Oh Dios, ayoha . . . ? . . . ug ipakita kaniya . . . ? . . . ang usa ka dapit dinhi. Himoa nga manaog kini, Ginoo, ug hinaut nga mabati niya ang gahum sa Dios, sa Ngalan ni Jesus . . . ? . . .

Dios, ayoha among igsoong lalaki, Ginoo, ug hinaut nga maayo siya.

Sa Ngalan ni Jesus Cristo, ayoha among igsoong babaye, Dios.

227 Dios, ayoha...?...nakita ka Niya nga nagpamuhat og daghan kaayo. Itugot karon nga silang tanan mahimong...?...

Ayoha...?...Ginoo, nagaampo ako alang sa kalooy, minahal nga Ginoong Jesus.

228 Dios, ayoha kini...?...himoa nga maayo na siya...?... Ginoo, ug daghan ang iyang mga kasub-anan ug nagapakig-ambit kami niini. Karon, hinaut nga siya...?...

Sa Ngalan ni Jesus, ayoha kini, akong igsoong babaye, Ginoo.

Ayoha akong igsoong lalaki, sa Ngalan...?...

Dios, ayoha kining akong igsoong lalaki, ug himoa nga maayo siya...?...

Ayoha among igsoong babaye, Ginoo, diha kang Jesus Cristo...?...

Ayoha akong igsoong babaye, sa Ngalan ni Jesus.

Ayoha akong gamay'ng batang igsoong lalaki, sa Ngalan ni Jesus Cristo.

Dios, ayoha kini, akong igsoong lalaki, sa Ngalan ni Jesus Cristo.

Dios, sa Ngalan ni Jesus Cristo, ayoha kini, akong igsoong lalaki.

Dios, ayoha akong igsoong babaye. Sa Ngalan ni Jesus, hinaut nga mamaayo na siya.

229 Dios, ayoha kini, akong igsoong lalaki, hinaut nga siya, sa Ngalan ni Jesus Cristo mahimong...?...

Oh Dios, ayoha akong igsoong babaye, sa Ngalan ni Jesus Cristo.

230 Ayoha kining akong igsoong babaye dinhi, Ginoo, sa Ngalan ni Jesus Cristo, hinaut nga mopauli siya ug...?...

231 Dios, ihatag ang iyang hangyo, sa Ngalan ni Jesus Cristo, ako nagaampo nga ihatag Mo kana nga hangyo.

232 Dios, si Igsoong Simmon, itugot nga ang gracia ug kalooy sa Dios, nanghinaut ingon nga naghulat siya para niini nga takna, ang panahon kon diin mahimo niya nga maisalibay kini...?... Ug hinaut nga mamaayo na siya...?...

233 Dios, si Igsoong Ungren...?...Dios, aduna siya og bulawanon nga tingog, nga nagabudyong sa Maayong Balita. Ipabilin siya nga himsog, Dios; itugot kini, sa Ngalan ni Jesus.

234 Dios, ang among Igsoong babaye'ng Kidd nagatawag sa Ngalan nianang...?...ako nagaampo nga ang Imong gahum mopalingkawas kaniya karon...?...nga sinsero gayud kini nga makaluluoy'ng inahan...?...sa pito ka adlaw kinahanglan nga uban na siya sa iyang inahan. Itugot kini, Amahan, sa Ngalan ni Jesus Cristo.

²³⁵ Dios, alang usab sa iyang mga anak, Oh Dios, nagalatagaw sila, ug daghan kanila mga masakiton, ug masakiton kana nga babaye, ug...?.. Oh Dios, ako nagaampo nga itugot Mo kini, pinaagi sa Ngalan ni Jesus Cristo.

²³⁶ Mapasalamaton ako kaayo para kang Igsoong Tom, Ginoo, nagaampo ako nga Ikaw magaayo kaniya ug motabang kaniya. Bulahan ang Ngalan...?..

²³⁷ Adunay usa ka lalaki dinhi...?..Gusto mo ba nga mai-ampo usab, igsoon? Ginoong Jesus... .

[Blangko nga bahin sa teyp—Ed.]

He careth for you,
He careth for you;
Through sunshine or shadow,
He careth for you.

He careth for you,

Itugyan lang ang inyong mga kabalaka ngadto Kaniya, kung ingon-ana.

He careth for you;
Through sunshine or shadow,
He careth for you.

²³⁸ Nagakahingawa ba mo alang Kaniya? Nagakahingawa ba mo alang sa Iyang Pulong? Amen. Panalanginan kamo sa Ginoo. Atong iduko sa makadiyut ang atong mga ulo. Nagatoo ko nga ako nang gitubag kini nga mga hangyo. Gitubag ko na ang mga hangyo, dili ba, ang matag usa kaninyo.

²³⁹ Dili pa lang dugay nakahimo ko og usa ka gamay'ng sayup sa panagtigum, sigurado ko nga adunay nakamatikod niini. Ug bag-o lang kini karon gipahinumdom sa Dios kanako. Nakasulti ko og usa ka butang ngadto sa usa ka tawo sa diha nga pagsulti ko kadto para unta kadto diay sa laing tawo. Wala ko—wala ko makita ang maong tawo kon asa siya, apan usa kadto ka tawo nga nahatagan ko og panalangin nga para unta sa laing tawo. Ug ako...nanagduol man gud sila nga paspas kaayo, ug nga wala ko nakamatikod. Ug wala ko...Oo, mao kadto, nakita ko kini karon. Mao kini ang lalaki ug babaye nga nagalingkod dinhi mismo. Kung wala ko masayup, gilamano ko sila sa miaging gabii didto sa—didto sa—sa usa ka lawak sa motel, o morag ingon-ana, didto sa nataran sa motel, dinhi sa Jefferson Villa. Misulti ko og usa ka butang ngadto sa lalaki, gitawag kini og “igsoong babaye” imbes nga “igsoong lalaki,” sa diha nga miagi kamo. Nahimatikdan ba ninyo kadto? Ang pasabot ko unta kadto ang imong asawa. Karon, medyo dugay-dugay na nga aduna siya’y problema, usa ka sakit sa tinai sa dugay na nga panahon. Taga-Illinois ka. Mrs. Mongaland, husto kana, mao kana’y imong ngalan. Karon, nahibalo ka nga wala ako makaila kanim, apan nagapakig-kontak ka karon mismo. Toohi

sa tibuok mong kasingkasing, ug magkaaduna ka'y hingpit nga paglibang sama sa kasagaran nga ginahimo mo kaniadto, kung motoo ka. Aron nga masaksihan mo kana sa tanang panahon, karon akong. . .

²⁴⁰ Ang butang lang nga nahibaloan ko, nahinumduman ko sa paghunahuna ko sa maong lalaki sa miaging gabii, nahunahunaan ko nga aduna siya og ingon niana ka maanindot nga buhok, ginatunga ang iyang buhok, sama niining ubanon nga lalaki nga nagalingkod dinhi. Natan-awan ko lang, ug aduna kadtong Kahayag nga nagasidlak palibot sa ibabaw nila nga sama niana. Ug ingon niana kadto. Ug dayon nakita ko nga mitungha ang panan-awon. Wala ako makaila kung kinsa sila ni bisan unsa man mahitungod niini. Ang babaye atua didto sa gawas sa miaging gabii, miingon ko, “Motambong ka ba sa panagtigum?” Miingon siya, “Oo.” Apan tungod sa grasya sa Dios gitul-id kini balik, ug mao kana siya kung kinsa kini. Nahimatikdan ba nimo diha sa linya sa pagpaampo, igsoon, nga nasulti ang usa ka butang nga miadto sa uban? Para kadto kang igsoong babaye imbes nga sa imo. Kana, husto kana, para sa—para unta sa igsoong babaye dinha.

²⁴¹ Karon aron nga mahibalo kamo niini, diha nianang linya sa pagpaampo, kana nga Manolunda sa Ginoo anaa dinha. Nagapanawag Kini. Apan sa diha nga nagapanawag ka, nagakaluya ka, nga nagakaluya, nga nagakaluya. Kita n'yo? Busa nagakahingawa Siya kaninyo, ug ako—nagakahingawa ako kaninyo. Mahimo ko nga modugang og upat o sa lima pa, ug dayon, mahibaloan mo na lang, ania si Billy dinhi nga ginakuha na ako gikan sa pulpito. Apan naghunahuna ko kung, sigurado gayud, ako—ako nga nagpuyo na dinhi uban kaninyong tanan niining mga tuiga, ug sa palibot ug sa tibuok nasud, kamo—kabalo na kamo nga gimahal ko kamo. Oh, gimahal ko kamo nga sama nga kamo akong kaugalingon nga mga anak, ug kamo ang akong mga anak diha sa Maayong Balita. Gipanganak ko kamo ngadto kang Cristo, pinaagi sa Maayong Balita. Ug karon sa hunahuna ko nga kini, kini nga mga paghangyo ug ang uban pa dinhi, natagbaw ko na kini.

²⁴² Karon, gihiguma ko kamo. Ug naghunahuna ko, kung ako moanha ug magpandong og mga kamot diha kaninyo, ug makita ninyo nga ang Balaang Espiritu mao'y nagapamuhat niana, ug magsugod na dayon ang kung unsa nga mga pagduhaduha diha sa panagtigum dinha sa linya nga sama niana. Nasipyat ko niadto, tungod sa kapaspas, ug nalitok ang panalangin ngadto sa dili unta, ug unya gipatul-id kadto sa Balaang Espiritu pagkahuman sa panagtigum ug gipakita kadto balik. Kita n'yo? Makita ba ninyo, nagakahingawa Siya! Karon nagakahingawa ba mo? Aduna ba mo'y igong kahingawa nga moingon, “Sugod niining taknaa, aduna na'y butang sulod sa akong kasingkasing nga nagaingon kanako nga tapos na ang

akong mga problema. Ako—naayo na ko, mamaayo na ko?” Nagatoo ba mo niini? Ipataas ang inyong mga kamot, “Nagatoo ako Niana!” Panalanginan kamo sa Dios.

Through sunshine or shadow,
He careth for you.

²⁴³ Usa kini ka labing daku nga kumbira sa gugma. Atong kantahon kini ug pagpakiglamano sa usa'g usa.

He careth for you,
He careth for you;
Through sunshine or shadow,
He careth for you.

²⁴⁴ Napapabilin ko kamo sa dugay kaayo niining buntaga hangtud nga ako—ako. . . Dili ingon niana ka dugay magwali ang akong pastor sama sa ginabuhat ko. Paningkamotan niya nga mohatud og mensahe para kaninyo karong gabii, ug amo lang ipahibalo kaninyo kon aduna ba og panerbisyo para sa sunod Domingo ilalum sa. . . niana nga ulohan. Kung dili ko man mahimo, aduna lang sa gihapon og mga panerbisyo. Busa kamong tanan, panalanginan kamo sa Ginoo, ang matag usa. Siguro adunay pang-bautismo nga panerbisyo nga mosunod karon mismo.


²⁴⁵ Busa kung motindog kamo sa makadiyut, para sa pagpanguli. Atong kantahon kana pag-usab. “Itugyan ang inyong mga kabalaka ngadto Kaniya, kay Siya nagakahingawa man alang kaninyo.” Ug karon kung nagakahingawa kamo para Kaniya, moingon kita, “Ginoo, ako. . .” Pagbuhaton ninyo kini, kamo—nagahimo kamo niini nga pagsaysay, “Ginoo, nasayod ako nga nagakahingawa Ka para kanako. Ug ginapataas ko ang akong mga kamot, nagakahingawa ko para Kanimo.” Ug atong ipataas ang atong mga kamot karon sa niining kumbira sa gugma sa paghigugmaay, samtang magakanta kita.

He careth for you,
He careth for you;
Through sunshine or shadow,
He careth for you.

²⁴⁶ Karon samtang atong ginaduko ang atong mga ulo, moingon. . . [Si Igsoong Branham nagalaylay sa *He Careth For You*—Ed.] Oh, ang pagkamahigugmaon sa akong Ginoo! Dili ba ninyo mabati ang Iyang gugma nga nagabira kaninyo mismo paduol diha Kaniya? Moingon, “Ug, Ginoo, gihigugma ko Ikaw. Gihigugma ko Ikaw. Nagakahingawa Ka para kanako, Ginoo. Nagkahingawa gyud Ka kaayo hangtud nga sa dihang usa pa ako ka makasasala kaniadto namatay Ka para kanako. Gisamaran Ka tungod sa akong mga sala, tungod sa Imong mga labod ako naayo.”

He careth for you,
He careth for you;

Through sunshine or shadow,
He still careth for you.

²⁴⁷ Hinumdumi lang kana samtang inyong ginaduko ang inyong mga ulo karon. Akong hangyoon si Igsoong Edwards dinhi kung mahimo ba niya kita paulion na diha sa usa ka pulong sa pag-ampo. Apan, una, atong laylayon kana pag-usab. [Si Igsoong Branham nagasugod sa paglaylay og *He Careth For You*—Ed.] Hinumdumi, sa kalipay o sa kasub-anan man, sa gihapon Siya nagakahingawa. Nagkahingawa Siya. Nagakahingawa ka ba? Moingon, “Oo, Ginoo, ako nagasaad nga magkahingawa ako. Magpadayon ko karon mismo. Sugod karon, magakahingawa na ako. Magakahingawa ako para sa akong mga testimonyo.” [Si Igsoong Branham padayon nga nagalaylay og *He Careth For You*.] “He careth for you.” Igsoong Edwards. 

63-0721 Siya May Kahangawa. May Kahangawa Ka Ba?
Branham Tabernacle
Jeffersonville, Indiana U.S.A.

CEBUANO

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org